

॥ नमः श्रीपाशवंताय ॥

स्वर्गीय कविवर भूधरदास विरचित

# पार्श्व पुराण

( जैन सिद्धान्त गर्भित सुन्दर काव्य ग्रंथ )



प्रकाशक—

आचार्य शिवसागर दि० जैन ग्रंथमाला

शान्तिवीर नगर

श्री महावीरजी ( राजस्थान )

१०००  
प्रतियां



गुरु पूर्णिमा  
बि० सं० २०३०

## प्रकाशकोय

कवि भूधरदासजी का पार्श्व पुराण वर्तमान में उपलब्ध नहीं है। इसकी काफी मांग है। कवि ने इस काव्य में भगवान पार्श्वनाथ के जीवन चरित्र के साथ साथ जैन सिद्धान्त की बहुतसी चर्चाएँ इसमें लिखी हैं—जो सर्व साधारण के लिए बड़ी उपयोगी हैं। जब इस काव्य के छपाने की चर्चा आई तो आचार्य श्री १०८ श्री शांतिसागरजी महाराज के संघ के संघपति श्री सेठ पूनमचंदजी घासीलालजी के सुपुत्र सेठ श्री मोतीलालजी (वर्तमान मुनि १०८ श्री सुबुद्धिसागरजी महाराज) के सुपुत्र श्री राजमलजी एवं उनके परिवार ने इस ग्रंथ के मुद्रण का सारा भार वहन करने की स्वीकारता प्रदान की और जल्दी ही छपाने की प्रेरणा दी। तदनुसार यह ग्रंथ छपकर पाठकों के हाथों में दिया जा रहा है। इस आर्थिक सहयोग के लिए आचार्य शिवसागर ग्रंथ माला की ओर से श्री राजमलजी एवं उनके परिवार को हार्दिक धन्यवाद है। आशा है पाठक इस काव्य-ग्रंथ का पठन-मनन कर आत्म-लाभ करेंगे।

ब्र० लाडमल

गुरु पूर्णिमा  
सं० २०३०

अधिष्ठाता—श्री शांतिवीर दि० जैन संस्थान  
शांतिवीर नगर, श्री महावीरजी (राज.)

## कविवर भूधरदासजी

इस पार्श्वपुराण के रचयिता कविवर भूधरदासजी हैं। अठारहवीं शती के उत्तरार्द्ध में कविवर ने आगरा में इसकी रचना की। कवि आगरा के रहने वाले खंडेलवाल दि० जैन थे। इनका समय विक्रम सं० १७५० से १८०६ माना जाता है। पार्श्वपुराण की रचना से पूर्व आध्यात्मिक एवं उपदेशी एकसौ से अधिक छन्द उनने लिखे, जिन्हें जयपुर नरेश सवाई जयसिंहजी के सूबेदार (सूबा के हाकिम) श्री गुलाबचंदजी के कहने से एकत्र कर पौष कृष्णा त्रयोदशी रविवार वि० सं० १७८१ में पूर्ण किया। शतक में १०६ छन्द हैं। अन्तिम छन्द में अपना परिचय देते हुए उनने लिखा है—

आगरे में बाल-बुद्धि भूधर खंडेलवाल, बालक के ब्याल सौ कवित्त कर जानै हैं  
 ऐसे ही करत मयी जैसिह सवाई सूबा-हाकिम गुलाबचंद आये तिहि थानै हैं।  
 हरीसिंह साह के सुवंश-धर्मरागी नर, तिनके कहै सौ जोरि कीनी एक ठानै है।  
 फिरि फिरि प्रेरे मेरे आलस को अंतमयी, उमकी सहाय यह मेरी मन मानै है।

दोहा-सतरह सँ इक्यासिया, पोह पाख तमलीन।

तिथि तेरस रविवार को, सतक समापत कीन।

शतक के पश्चात् पार्श्वपुराण की रचना हुई जो आषाढ़ शुक्ला पंचमी वि सं १७८६ में पूर्ण हुई। इन दो ग्रंथों के अतिरिक्त कवि के बनाये लगभग ७० पद भी उपलब्ध हैं जो विभिन्न राग रागनियों में गाये जा सकते हैं। खोज करने पर संभवतः और भी पद मिलें। पर जितने उपलब्ध हैं वे बड़े ही महत्वपूर्ण और हृदय को छूनेवाले हैं। कवि के पद, छन्द आदि एक से एक बढ़कर हैं और सांसारिक प्राणी को झकझोर देने वाले हैं। संसार की असारता, भोगों की निःसारता और मानव जीवन की उपादेयता पर कवि ने खूब ही लिखा है। इतने प्रभावक है शतक के छन्द एवं भजन कि जो कार्य लम्बे चौड़े अनेक उपदेशों और शास्त्रों के अध्ययन से नहीं हो सकता—वह पद्य की दो लाइनों से हो जाता है। बड़ा आनन्द आता है इनके पढ़ने मात्र से ही।

पाश्वंपुराण में भी कवि ने कमाल कर दिया है। सचमुच पाश्वं पुराण जैन काव्य-साहित्य में एक उच्च कोटिका काव्य-ग्रंथ है। इसमें भगवान पाश्वंनाथ का जीवन चरित्र है—पर साथ ही जैन सिद्धान्त का सार भी इसमें कवि ने भर दिया है। पंच कल्याणक वर्णन के साथ तत्त्वचर्चा और आध्यात्मिक उपदेशों से सराबोर है—यह ग्रंथ। शब्द विन्यास, भावगांभीर्य और प्रसादादिगुण स्थान स्थान पर देखने को पलते हैं इस छोटे से पुराण में। विभिन्न छन्दों में निबद्ध यह ग्रंथ कवि की छन्द-शास्त्र की जानकारी प्रकट करता है। यद्यपि कवि ने अपनी लघुता प्रकट करते हुए लिखा है कि—

अमर कोष नहि पढ्यो, मैं न कहि पिगल पेख्यो।

काव्य कंठ नहि करो, सारसुत सो नहि सीख्यो।

अच्छर-संधि-समास-ज्ञान वजित बुधि हीनी।

धर्म-भावना हेत-किमपि भाषा यह कीनी।

किन्तु वे एक विद्वान् थे—साहित्य, दर्शन और सिद्धान्त के अच्छे जानकार। यह पाश्वंपुराण किसी का अनुवाद नहीं यह कवि की एक स्वतंत्र मौलिक रचना है। जैन काव्यों में ऐसा अन्य कोई चरित्र ग्रंथ नहीं है। कवि का प्रभाव इसीसे स्पष्ट है कि उनका पाश्वंपुराण, जैन शतक एवं पद संग्रह का समाज में काफी प्रचार है और बड़े चाव से लोग इन्हें पढते हैं। इसीलिए इनकी रचनाओं के बार २ प्रकाशन की आवश्यकता पड जाती है। प्रस्तुत संस्करण भी ग्रंथ उपलब्ध नहीं होने से छपाया गया है। उनके भजन तो सैकड़ों प्रकाशनों में मिलेंगे। कोई भजन संग्रह इनके पद बिना अधूरा ही समझा जावेगा।

अब तक के प्रकाशित पाश्वंपुराणों के संस्करणों में यह संस्करण विशेष महत्व रखता है। इसमें कठिन शब्दों के अर्थ भी दिये गये हैं—यद्यपि सर्व साधारण को समझने के लिए और भी शब्दार्थ अपेक्षित हैं फिर भी जितने दिये हैं—वे भी बड़े उपयोगी हैं। इस शब्दार्थ का कार्य जयपुर के विद्वान् श्री गुलाबचंदजी जैन दर्शनाचार्य, एम.ए. ने किया है।

भँवरलाल न्यायतीर्थ

## शुद्धि-पत्रक

प्रस्तुत पार्श्वपुराण में प्रारंभ के १६ पृष्ठों के शब्दार्थ नहीं छप सके हैं। अतः निम्न प्रकार पाठ शुद्धि करके शब्दार्थ यथास्थान पढ़ने का कष्ट करें।

### शुद्धाशुद्धि

पृष्ठ संख्या	पंक्ति संख्या	अशुद्ध	शुद्ध
१	१५	॥१॥	॥३॥
२	२	॥१॥	॥४॥
१२	२२	भूताचलपवं	भूताचलपवंत
२७	२१	शास्त्र भंडार	शस्त्र भंडार
२८	२०	द्रोणाचार्य जैसे	चारसौ ( या संख्या विशेष) ग्रामों में प्रधान

पृष्ठों के अनुसार शब्दार्थ निम्न प्रकार हैं—

पृष्ठ १. भुवनतिलक=तीनलोक में महान, दिवायर=सूर्य, गुणसायर=गुणों के समुद्र, नाग=हाथी, मयमंत=मतवाला, उच्छेपन=उखाड़नेवाले, रमाकंत=घनत चतुष्टय रूप लक्ष्मी के पति, बोध=ज्ञान, मार=कामदेव, मार्तंग=हाथी, मृगेसर=सिंह, मुखमयंक=मुखरूपी चन्द्रमा, रंक=गरीब, रजनीपति=चन्द्रमा, पन्नग=सांप।

पृष्ठ २. शक=इन्द्र, चक्र=चक्रवर्ती, भवजलधि=संसार-समुद्र, तरड=नाव, विषधर=सांप, डंकै=काटे, व्याल=सांप, नेरे=नजदीक, बादि=व्यर्थ, उर-कोप=हृदय रूपी खजाना, रंक-धन=गरीब के धन के समान, हेठ=हीन, विगतविरोध=विरोध को दूर करनेवाला।

— कविवर भूधरदासजी विरचित —

## पार्श्व-पुराण

श्रीपाश्वंतायजी की स्तुति ।

दोहा ।

मोह-महा-तम-दलन दिन, तपलक्ष्मी भरतार ।  
ते पारस परमेस मुक्त, होहु सुमतिदातार ॥ १ ॥  
चामानंदन-कलपतरु, जयो जगत-हितकार ।  
मुनिजन जाकी आस करि, जाचें सिवफल सार ॥ २ ॥

छप्पय ।

भुवनतिलक भगवंत, संतजन-कमल-दिवायर ।  
जगतजंतु-बन्धव अनंत, अनुपम गुणसायर ॥  
राग-नाग-मयमंत, -दंत-उच्छेपन बलि अति ।  
रमाकंत अरहंत, अतुल जसवन्त जगतपति ॥  
महिमा महंत मुनिजन जपत, आदि अंत सबको सरन ।  
सो परमदेव मुक्त मन बसो, पासनाह मंगलकरन ॥ १ ॥  
विमल-बोध-दातार, विश्व-विद्या-परमेसर ।  
लक्ष्मीकमलकुमार, मार-मातंग-मृगेसर ॥  
मुखमयंक अवलोकि, रंक रजनीपति लार्ज ।  
नाम-मंत्र-परताप, पाप पद्मग डरि भाजें ॥

जय अस्वसेन-कुल-चन्द्र जिन, सक्र-चक्र-पूजित-चरन ।  
 तारो अपार भव-जलधितं, तुम तरंड तारन तरन ॥१॥  
 बाघ सिंह बस होहि, विषम विषधर नहि डंक ।  
 भूत प्रेत बेताल, ब्याल बैरी मन संकं ॥  
 साकिनि डाकिनि अगनि, चोर नहि भय उपजावें ।  
 रोग सोग सब जाहि, विपत नेरे नहि आवें ॥  
 श्रीपासंदेवके पदकमल, हिये धरत निज एकमन ।  
 छूटें अनादि बंधन बंधे, कौन कथा विनसै विघन ॥५॥  
 चहुंगति भ्रमत अनादि, वादि बहुकाल गमायो ।  
 रही सदा सुख-आस, प्यास, जल कहूं न पायो ॥  
 सुख-करता जिनराज, आज लौ हिये न आये ।  
 अब मुझ माथे भाग, चरन-चितामनि पाये ॥  
 राखौ संभाल उर कोषमै, नहि बिसरौ पल रंक-धन ।  
 परमावस्योर ढालन निमित्त, करौ पासंजिनगुनकथन ॥

चौपई [ १५ मात्रा ]

बन्दौ तीर्थकर चौबीस । बन्दौ सिद्ध बसं जगसीस ।  
 बन्दौ आचारज उवभाय । बन्दौ परम साधु के पाय ॥७॥  
 ये ही पद पांचौ परमेठ । ये ही सांच और सब हेठ ।  
 ये ही मंगल पूज्य अतीव । ये ही उत्तम सरन सदीव ॥८॥  
 बंदौ जिनवानी मन सोध । आदि अंत जो विगत-विरोध ।  
 सकलवस्तु दरसावनहार । भ्रमविषहरन शोषधी सार ॥९॥

दोहा ।

वरतो जग जयवंत नित, जिनप्रदचन अमलान ।  
लोक-महलमें जगमगै, मानिक-दीप समान ॥१०॥  
हरो भरम दारिद्र दुख, भरो हमारी आस ।  
करो सारदा लच्छमी, मुझ उर अंबुज बास ॥११॥

चीपई ।

बन्दी वृषभसेन गनराज । गुरु गौतम भवजलधिजहाज ।  
कुंदकुंद-मुनि-प्रमुख सुपंथ । जे सब आचारज निरग्रंथ ॥१२॥  
जंनतत्त्व के जाननहार । भये जयारथ कथक उदार ।  
तिनके चरनकमल कर जोरि । करौ प्रनाम मान-मद-छोरि ॥

दोहा ।

सकल पूज्य-पद पूजकै, अलपबुद्धि अनुसार ।  
भाषा पासंपुरान की, करौ स्वपरहितकार ॥१४॥

चीपई

जिनगुनकथन अगमविस्तार । बुधिबल कौन लहै कवि पार ।  
जिनसेनादिक सूहि महंत । वरनन करि पायो नहि अंत ॥१५॥  
तो अब अलपमति जन और । कौन गिनतिमें तिनकी दौर ।  
जो बहुभार गयंद न बहै । सो क्यों दोन ससक निरबहै ॥१६॥

दोहा

कह जानें ते यों कहैं, हम कछु वरन्यो नाहि ।  
जे कह जानें ही नहीं, ते अब कहा कहाहि ॥१७॥  
नभ विलस्त नापे नहीं, चुलू न सागर तोय ।  
श्रीजिनगुनसंख्या सुजस, त्यों कवि करे न कोय ॥१८॥



चौपई

पं यह उत्तम नर अवतार । जिनचरचा बिन प्रफल असार ।  
 सुनि पुरान जो घुमें न सीस । सो थोथे नारेल सरीस । १६।  
 जिनचरित्र जे सुने न कान । देहगेह के छिद्र समान ।  
 जामुख जैनकथा नहि होय । जीभ भुजंगनिको बिल सोय । २०।  
 या प्रकार यह उद्यम जोग । कहत पुरानन पंडित लोग ।  
 जिनगुनगान सुधारसन्याय । सेवत अल्प जनम-जुर-जाय । २१।

घनाक्षरी ।

जो ली कवि काव्यहेत आगम के अच्छर कौ,  
 अरथ विचारें तौलों सिद्धि सुभ ध्यान की ।  
 और वह पाठ जब भूपर प्रगट होय,  
 पढ़ें सुनें जोब तिन्हें प्रापति ह्वं ग्यानकी ॥  
 ऐसें निज-परकौ विचार हित हेतु हम,  
 उद्यम कियो है नहि बान अभिमानकी ।  
 ग्यानअंस चाखा भई ऐसी अभिलाखा अब,  
 करूं जोरि भाखा जिन पारसपुरानकी ॥ २२ ॥  
 आगे जैन ग्रन्थनि के करता कवोन्द्र भये,  
 करी देवभासा महाबुद्धिफल लीनों है ।  
 अच्छर-भित्ताई तथा अर्थ की गभीरताई,  
 पदललितताई जहां आई रीति तीनों है ॥  
 काल के प्रभाव तिन ग्रन्थनिके पाठी अब,  
 दोसत अल्प ऐसो, आयौ दिन हीनों है ।

तातें इह समै जोग पढे बालबुद्धि लोग ।

पारसपुरानपाठ भाषाबद्ध कीनों है ॥२३॥

दोहा ।

सक्तिभक्तिबल कविनपे, जिनगुन बरनें जाहि ॥

में अब बरनों भक्तिवस, सक्ति मूल मुझ नाहि ॥२४॥

वरनों पूरवकथितक्रम, प्रथमर्थ अबधारि ।

सुगमरूप संक्षेपसौ, सुनौ सबहि नरनारि ॥२५॥

चौपई ।

मगधदेस देसनि-परधान । राजगृही नगरी सुभथान ॥

राज करे श्रेनिक भूपाल । नीतवंत नृप पुन्यविसाल ॥२६॥

छायक-सम्यकदरसनसार । रूप सील सबगुनआधार ॥

तिनके घर अंतेवर घना । पटरानी रानी चेलना ॥२७॥

जाके गुन बरनत बहु भाय । बिरिया लगे कथा बढि जाय ॥

एक दिना निज सभा नरेस । निवसे जसे सुरग-सुरेस ॥२८॥

रोमाञ्चित बनपालक ताम । आय राय प्रति कियौ प्रनाम ॥

छह रितुके फल फूल अनूप । आगे धरे अनूपम रूप ॥२९॥

हाथ जोरि बिनबं बनपाल । विपुलाचल पवंत के भाल ॥

बद्ध मान तीर्थकर आप । आये राजन-पुन्यप्रताप ॥३०॥

महिमा कछु बरनी नहि जाय । इन्द्रादिक सेवे सब पाय ॥

समोसरनसंपतिकी कथा । मोपे कही जाय किमि तथा ॥३१॥

माली बचन सुनें सुखदाय । हरष्यौ राजा अंग न माय ॥

दीनें भूषन वसन उतार । बनमाली लीनें सिरधार ॥३२॥

सात पेंड गिरिसम्मुख जाय । कियौ परोच्छ विनय नरराय ॥  
 आनंदभेरि नगरमें दई । सबहीकों बरसनरुचि भई ॥ ३३ ॥  
 चह्यो संग पुरजन समुदाय । बंदे बद्धमान जिनराय ॥  
 लोकोत्तर लछमी अवलोक । गये सकल भूपतिके सोक ॥ ३४ ॥  
 युति आरंभ करी बहुभाय । बार बार भुवि सोस नवाय ॥  
 गीतम गुरु पूजे कर जोरि । नरकोठ बैठ्यौ मद छोरि ॥ ३५ ॥  
 कियौ प्रश्न श्रेणिक बड़ भूप । प्रभु पारस निजकथा अनूप ॥  
 जाके सुनत पाप छय होय । कहिये देव कृपाकरि सोय ॥ ३६ ॥  
 तब गनधर बोले हितकाज । जोग प्रस्न कीनों नरराज ॥  
 सुन पुनीत पारसजिनकथा । सफल होय मानुषभव जथा ॥ ३७ ॥

दोहा ।

इहि विधि जो मगधेस प्रति, कहाँ चरित गनराज ॥  
 ताही क्रम आये कहत, आचारज परकाज ॥ ३८ ॥  
 तिनहीके अनुसार अब, कहूं किमपि विस्तार ॥  
 जैनकथा कल्पित नहीं, यह जानो निरधार ॥ ३९ ॥  
 जैनवचनवारिधि अगम, पानो अर्थ अनूप ॥  
 मतिभाजन भर भर लिये, यह जिनआगमरूप ॥ ४० ॥

इति पीठिका ।



## पहला अधिकार

चौपई ।

जंबूदीप दिपे इह सार । सूरज मंडल की उनहार ॥  
 मध्य सुमेरुर्काणिकाभास । बने छेत्र दल दीरघ जास ॥४१॥  
 तारागन मकरंद मनोग । सुरनरसंग भ्रमरकुलजोग ॥  
 लवनसमुद्र सरोवरधान । दीप किधौ यह कमल महान ॥४२॥  
 लच्छ महा जोजन विस्तार । बसे विविध-रचना-आधार ॥  
 दच्छिन भरत धनुष-संठान ॥ पर्वत फणच नदीजुग बान ॥४३॥  
 मानों सागरप्रति अनुमानि । तानत तीर छार-जल जानि ॥  
 ऐसी भांति विराजत खेत । छहों-खंड-मंडित छबि देत ॥४४॥  
 पांच भलेच्छ बसे ताभांहि । धर्म कर्म कछु जाने नाहि ॥  
 उत्तम आरजखंडमभार । देस सुरम्य बसे मनहार ॥४५॥  
 जनकुल जहां रहै बहु भांति । पास पास सोहै पुर-पांति ॥  
 सरवर नदी सैल उद्यान । बन उपवनसौं सोभामान ॥४६॥  
 तहां नगर पोदनपुर नाम । मानों भूमितिलक अभिराम ॥  
 देवलोककी उपमा धरे । सब ही बिध देखत मनहरे ॥४७॥

दोहा ।

तुंग कोट खाई सजल, सघन बाग गृह-पांति ॥  
 चौपथ चौक बजारसौं, सोहै पुर बहुभांति ॥४८॥  
 ठाम ठाम गोपुर लसे, बापी सरवर कूप ॥  
 किधौ स्वर्ग ने भूमिकौं, भेजी भेंट अनूप ॥४९॥

चौपई ।

जैनी प्रजा जहां परवीन । बसै दानपूजाव्रतलीन ।

जैनभवन ऊंचे अति बने । सिखर धुजासौं सोभित घने ॥५०॥

इहि विधि पुरसोभा अधिकार । वरनन करत लगै बहुवार ।

राज करै राजा अरविद । सोहै मानों स्वर्ग सुरिद ॥५१॥

पालै प्रजा कुमति जिन बली । नीतिबेलमंडित भुजबली ।

द्वयाधाम सज्जन गंभीर । गुनरागी त्यागी रनधीर ॥५२॥

तिस भूपतिकं विप्र सुजान । विस्वभूति मंत्री बुधिवान ।

ताकै तिया अनूदरि सती । रूपसील-गुन-लच्छनवती ॥५३॥

दोय पुत्र तिनकै अवतरे । पापपुन्य की पटतर धरे ।

जेठो नंदन कमठ कुपूत । दूजो पुत्र सुधी महभूत ॥५४॥

॥ ५४ ॥ दोहा ।

॥ जेठो मतिहेठो कुटिल, लघुसुत सरल सुभाय ।

॥ विष अमृत उपजे जुगल, विप्र जलधिके जाय ॥ ५५ ॥

॥ बड़े पुत्रने भारजा, व्याहो बरुना नाम ।

॥ लघुने बरो विसुन्दरी, रूपवती अभिराम ॥ ५६ ॥

चौपई ।

यों सुख निवसै बांधव दोय । निज निज टैव न टारै कोय ।

वक्र चाल विषधर नहि तजै । हंस वक्रता भूल न भजै ॥५७॥

दोहा ।

उपजे एकहि गर्भसौं, सज्जन दुर्जन येह ।

लोह-कवच रच्छा करै, खांडो खंडे देह ॥५८॥

चोपई ।

अति सज्जन मरुभूति-कुमार । नीति-शास्त्रको जाननहार ॥  
सबको इष्ट सकलगुनगेह । राजा प्रजा करें सब नेह ॥५६॥  
एक दिना भूपति-मंत्रीस । सेत बाल देख्यौ निज सीस ॥  
उपज्यो विप्र-हियें बेराग । जान्यौ सब जग अथिर सुहाग ॥६०॥

दोहा ।

जरा मौतकी लघु बहिन, यामें संसै नाहि ॥  
तौ भी सुहित न चितवैं, बड़ी भूल जगमाहि ॥६१॥

चोपई ।

यह विचार मंत्री मनमाहि । निज सुत सौपि रायकी बाहि ॥  
सुगुरु-साखि जिन-चारित लियो । बनोवास प्रातमहित कियो ॥  
अब मरुभूति विप्र सुख करे । अहनिन नीतिपंथ पग धरे ॥  
राजा प्रीति करे बहु भाय । सोमप्रकृति सबको सुखदाय ॥६३॥  
एक समय आपन अरविद । मंत्री सेनासहित नरिद ॥  
राय वज्रवीरजपर चढ़े । क्रोधभाव उरमें अति बढ़े ॥६४॥  
पीछे कमठ निरंकुश होय । लग्यौ अनोति करन सठ सोय ॥  
जो मत्त आवैं सो हठ गहै । 'मैं राजा' सबसो इम कहै ॥६५॥  
एक दिना निजभ्रातानारि । भूषन-भूषितरूप निहारि ॥  
रागअंध अति विह्वल भयो । तोच्छन कामताप उर तयो ॥६६॥  
महाँ मलिन उर बसे कुभाव । दुर्गतिगामी जीव सुभाव ॥  
पुत्री सम लघुभ्रातानारि । तहां कुदिष्ट धरो अविचारि ॥६७॥

दोहा ।

पाप कर्मकौ डर नहीं, नहीं लोककी लाज ॥  
 कामी जनकी रीति यह, धिक तिस जन्म अकाज ॥६८॥  
 कामी काज अकाजमें, हो हैं अंध अवेव ॥  
 मदनमत्त मदमत्त सम, जरो जरो यह टेव ॥६९॥  
 पिता नीर परसै नहीं, दूर रहै रवि यार ॥  
 ता अंबुजमें मूढ़ अलि, उरभि मरै अविचार ॥७०॥  
 त्यो ही कुविसनरत पुरुष, होय अवस अविवेक ॥  
 हितअनहित सोचें नहीं, हिये विसनकी टेक ॥७१॥

चौपई ।

बनमें सघन लतागृह जहां । गयौ कमठ कामातुर तहां ॥  
 बड़ी बेवना कल नाहि परें । छिन छिन काम-विधा दुख करे ॥  
 कमठ सखा कलहंस बिसेख । पूछत भयौ दुखी तिह देख ॥  
 कौन व्याधि उपजी तुम अंग । अतिव्याकुल दीखत सरबंग ॥  
 तब तिन लाज छोरि सब सही । मनकी बात मित्रसौं कही ॥  
 सुनि कलहंस कथा बिपरीति । सिच्छावचन कहे करि प्रीति ॥  
 अति अजोग कारज इह बीर । सो तुम चित्यौ साहस-धीर ॥  
 परनारीसम पाप न आन । परभवदुख इह भव जस-हान ॥७५॥  
 इस ही बंध्यासौं अघ भरे । रावण आदि नरकमें परे ॥  
 जगमें जेठ पितासमतूल । बात कहत लाजें नाहि मूल ॥७६॥  
 तातें यह हठ मूल न करौ । सुहित सीख मेरी मन धरौ ॥  
 लोकनिद कारज यह जान । धर्मनिद निहचें उर आन ॥७७॥

दोहा ।

यों कलहंस अनेक विध, दई सीख सुखदेन ॥  
 ते सब कमठकुसीलप्रति, भये विफल हितवेन ॥ ७८ ॥  
 आयुहीन नर को जथा, श्रोषधि लगै न लेस ॥  
 त्यों ही रागी पुरुष प्रति, वृथा धरम-उपदेश ॥ ७९ ॥  
 बोह्यौ तब कामी कमठ, सुनो मित्र निरधार ॥  
 जो नहि मिलै विसुंदरी, तो मुझ मरन विचार ॥ ८० ॥  
 देख कमठकी अधिक हठ, कुमति करी कलहंस ॥  
 जाय कहे ता नारिसों, भूठ वचन अपसंस ॥ ८१ ॥

मडिल्ल छंद ।

सुन विसुंदरी आज कमठ बनमें दुखी ।  
 तू ताकी सुध लेहु होय जिहि विधि सुखी ॥  
 सुनते ही सतभाव गई बनमें तहाँ ।  
 निवसै कर परपंच कमठ कपटी जहाँ ॥ ८२ ॥

दोहा ।

छलबल कर भीतर लई, वनिता गई अजान ।  
 राग वचन भाखे विविध, दुराचारकी खान ॥ ८३ ॥

बाल छंद ।

गजमातो कमठ कलंकी । अघसों मनसा नहि संकी ।  
 भावज वन-करनी रंजो । निज सीलतरोवर भंजो ॥ ८४ ॥  
 रिपु जीत विजयजस पायो । अरविंद नृपति घर आयो ॥  
 जे कर्म कमठने कीने । राजा सब ते सुन लीने ॥ ८५ ॥



मंत्री मरुभूति बुलायौ । ताकोँ सब भेद सुनायो ॥  
 कहु विप्र सुधी क्या कीजै । क्या दंड इसै अब दीजै ॥८६॥  
 दुज कहे सरल परिनामो । अपराध छिमा कर स्वामी ॥  
 जो एक दोष सुन लीजै । ताकोँ प्रभु दंड न दीजै ॥ ८७ ॥  
 तब भूप कहै सुन भाई । जो निग्रहजोग अन्याई ॥  
 तातें करुना किम होहै । यह न्याय नृपति नहि सोहै ॥८८॥  
 तातें गृह गच्छ सयाने । मत खेद हियें कछु आने ॥  
 ऐसं कह विप्र पठायौ । तिस पीछे कमठ बुलायौ ॥८९॥  
 अति निंदो नीच कुकर्मी । जानो निरधार अधर्मी ॥  
 राजा अति ही रिस कीनी । सिर मुंड दंड बहु दीनी ॥९०॥  
 मुखके कालोस लगाई । खर रोप्यौ पीर न आई ॥  
 फिर सारे नगर फिरायौ । प्रति बीथी ढोल बजायौ ॥९१॥  
 इस भांति कमठकी खवारी । देखें सब ही नरनारी ॥  
 पुरवासी लोक धिकारें । बालक मिलि कंकर मारें ॥९२॥  
 यों दंड दियौ अति भारी । फिर दीनीं देश निकारी ॥  
 जो दीरघ पाप कमाये । ततकाल उदै बहु आयै ॥ ९३ ॥

दोहा ।

इहि विधि फूल्यौ पाप तरु, देख्यौ सब संसार ॥

आगे फल है नरक फल, धिक दुर्विसन असार ॥ ९४ ॥

चीपई ।

महादंड भूपति जब दयौ । कमठ कुसील दुखी अति भयौ ॥

बिलखत बदन गयौ चल तहां । भूताचलपर्व है जहां ॥९५॥

रहै तहां तपसी-समुदाय । ग्यान बिना सब सोखें काय ॥  
 केई रहे अधोमुख भूल । धूँआं पान करे अधमूल ॥६६॥  
 केई ऊरधमुखी अघोर । देखें सब गगनकी ओर ॥  
 केई निवसे ऊरध बाहिं । दुविध दयासों परचं नाहिं ॥६७॥  
 केई पंच अगनि भूल सहै । केई सदा मोनमुख रहै ॥  
 केई बंठे भसम चढाय । केई मृगछाला तन लाय ॥६८॥  
 नख बढ़ाय केई दुख भरें । केई जटा-भार सिर धरें ॥  
 यों अग्यान तपलोन मलोन । करें खेद परमारथ हीन ॥६९॥  
 तिनमें एक तापसीनाथ । प्रनम्यौ ताहि धरे सिर हाथ ॥  
 तिन असीस दे आदर कियौ । दिच्छादान कमठ तहें लियौ १०  
 करन लग्यौ तब कायकलेस । उर वैराग विवेक न लेस ॥  
 ठाढ़ो भयौ सिला कर लिये । किधौं फनी फन ऊँचो किये १०  
 मंत्री बंधवकी सुधि पाय । राजासों बिनयो इमि आय ॥  
 भूताचलपवंतकी ओर । भ्राता कमठ करे तप घोर ॥१०२॥  
 जो नरनायक आग्या होय । देखूं जाय सहोदर सोय ॥  
 पूछै नृपति कौन तप करे । भो प्रभु तापसके व्रत धरे ॥१०३॥  
 एक बार मिलि आऊं ताहि । राय कहै मंत्री मत जाहि ॥  
 खलसों मिलै कहा सुख होय । विषधर भेंटे लाभ न कोय ॥१०४॥  
 बरजौ रह्यो न बारंबार । महा सरलचित विप्रकुमार ॥  
 भ्रातमोहबस उद्यम कियौ । कोमल होत सुजनको हियौ १०

दोहा

दुर्जनदूखित संतकौ, सरल सुभाव न जाय ।  
 दर्पणकी छवि छारसों, अधिकहि उज्ज्वल थाय ॥१०६॥

सज्जन टरं न टेवसों, जो दुर्जन दुख देय ।

चंदन कटत कुठारमुख, अरवसि सुवास करेय ॥१०७॥

चौपाई

गयो विप्र एकाकी तहाँ । कमठ कठोर करै तप जहाँ ॥

बिनयवंत हो बिनयो तास । महा सरलवायक सुख भास ॥

भो बंधव तो उर गंभोर । यह अपराध छिमा कर वोर ॥

मैं तो राय बहुत बिनयो । मानी नाहिं तुमं दुख दयो ॥१०६॥

होनहारसों कहा वसाय । तुम बिन मोहि कछू न सुहाय ॥

यों कह पावन लाग्यो जाम । कोप्यौ अधिक कमठ दुठ ताम ॥

दोहा ।

दुर्जन और सलेखमा, ये समान जग माहि ।

ज्यों ज्यों मधुरो दीजिये, त्यों त्यों कोप कराहि ॥१११॥

सिला सहोदर सीसपै, डारी वज्र समान ।

पीर न आई पिसुनकों, धिक दुर्जन को बान ॥११२॥

दुर्जन को विस्वास जे, करि हैं नर अविचार ।

ते मंत्रो मरुभूमि सम, दुख पावै निरधार ॥११२॥

दुर्जन जनकी प्रीतसों, कहो कैसे सुख होय ।

विषधर पोषि पियूषकी, प्रापति सुनी न लोय ॥११४॥

मंत्रो तनतें रुधिरकी, उछली छींट कराल ।

दुर्जनहिततरतें किधों, निकसी कौपल लाल ॥११५॥

इहिविधि पापी कमठने, हत्या करी महान ।

तब तपसी मिलि नीच नर, काढ दियो दुठ जान ॥११६॥

चौपई ।

फेरि दुष्ट भोलनतें मिल्यो । भयो चोर घर मूसन हिल्यो ॥  
पाप करत कर आयो जब । बांधि बुरी विधि मारचौ तब ॥

दोहा ।

जंसी करनी आचरं, तंसो ही फल होय ।

इन्द्रायनकी बेलिकं, आंब न लागं कोय ॥११८॥

चौपई ।

एक दिना अरविद नरिद । पूंछे कर जुग जोरि मुनिद ॥  
भो प्रभु मुक्त मंत्री मरुभूत । क्यों नहि आयौ ब्राह्मणपूत ॥११९॥  
यह सुनि अवधिवंत मुनिराय । सब बिरतंत कह्यौ समुभाय ॥  
राजा मन अति भयौ मलीन । हा मंत्री सजजनता लीन ॥१२०॥  
बरजत गयो दुष्टके पास । कुमरन लह्यौ सह्यौ बहु त्रास ॥  
होनहार सोई विधि होय । ताहि मिटाय सकं नहि कोय ॥१२१॥  
यों विचारि मन सोक मिटाय । साधु पूजि घर आये राय ॥  
यह सुनि दुष्टसंग परिहरो । सुखदायक सतसंगति करो ॥१२२॥

छप्पय ।

तपे तथापर आय, स्वातिजलबूंद विनट्टी ।

कमलपत्रपरसंग, वही मोतीसम दिट्टी ॥

सागरसीप समीप, भयो मुक्ताफल सोई ।

संगतको परभाव, प्रगट देखो सब कोई ॥

यों नीचसंगतें नीचफल, मध्यमतें मध्यम सही ॥

उत्तमसंजोगतें जीवको, उत्तमफलप्रापति कही ॥१२३॥

इति श्रीपाश्र्वपुराणभाषायां मरुभूतिभववर्णनं नाम प्रथमोऽधिकारः ॥१॥

## दूसरा अधिकार

दोहा ।

अस्वसेन-कुल-चंद्रमा, बामा-उर-अवतार ।

बंदों पारसपदकमल, भविजनअलि आधार ॥१॥

पद्धरी छंद

इसभांति तजे मरुभूति प्राण । अब सुनो कथा आगे सुजान ॥  
 अतिसघन सल्लकी बन विशाल । जहं तरुवर तुंग तमाल ताल ॥  
 बहु बेलजाल छाये निकुंज । कहिं सूखि परे तिन पत्रपुंज ॥  
 कहिं सिकताथल कहिं सुद्ध भूमि । कहिं कपि तरुडारन रहे भूमि  
 कहिं सजलथान कहिं गिरि उतंग । कहिं रोछ रोज विचरें कुरंग ॥  
 तिस थानक आरतध्यानदोष । उपज्यौ वनहस्ती वजूघोष ॥  
 अति उन्नत मस्तकसिखर जास । मद-जीवनभरना भरहिं तास  
 दीसैं तमवरन विसाल देह । मनो गिरिजंगम दूसरो येह ॥५॥  
 जाको तन नख शिख छोमवंत । मुसलोपम दीरघ धवल दंत ॥  
 मदभीजे भलकें जुगल गंड । छिन छिनसौं फेरें सुंड दंड ॥६॥  
 जो बरना नामैं कमठ नार । पोदनपुर निवसैं निराधार ॥  
 सो मरि तिहि हथिनो हुई आन । तिससंग रमें नित रंजमान ॥  
 कबही बहु खंडं बिरछबेलि । कबही रजरंजित करहिं केलि ।  
 कबही सरवरमें तिरहिं जाय । कबही जल छिरकें मत्ताकाय ॥  
 कबही मुख पंकज तोरि देय । कबही दह-कादो अंग लेय ॥६॥

दोहा ।

यों सुछंद क्रीड़ा करें, बरुना-हथिनी सत्थ ।

वन निवसं बाराण<sup>१</sup> बली, मारण-सील समत्थ<sup>२</sup> ॥ १० ॥

चौपई ।

एक दिवस अरविंद नरेस । ज्यों विमानमें स्वर्ग सुरेस ॥

यों निजमहलन निवसं भूप । देख्यौ बादल एक अनूप ॥११॥

तुंग<sup>३</sup> सिखर अति उज्जल महा । मानों मंदिर ही बनि रहा ॥नर<sup>४</sup>बै निरखि चितवं ताम । ऐसो ही करिये जिनघाम ॥१२॥

लिखन हेत कागद कर लयौ । इतने सो सरूप मिटि गयौ ॥

तब भूपति उरकरं विचार । जगतरीति सब अथिर असार ॥१३॥

तन धन राज-संपदा सब । यों ही विनसि जायगो अब ॥

मोहमत्त प्राणी हठ गहै । अथिर वस्तुकों थिर सरदहै ॥१४॥

जो पररूप पदारथजाति । ते अपने मानं दिनराति ॥

भोगभाव सब दुखके हेत । तिनहीकों जानं सुखखेत ॥१५॥

ज्यों माचै<sup>५</sup>-कोदों<sup>६</sup> परभाव । जाय जथारथ दिष्टि स्वभाव ॥

समभे पुरुष औरकी और । त्यों ही जगजीवनको दौर ॥१६॥

पुत्र कलत्र<sup>७</sup> मित्रजन जेह । स्वारथ लगे सगे सब एह ॥

सुपनसरूप सकल संभोग । निजहितहेत विलंब न जोग ॥१७॥

यों भूपति वैराग विचारि । डारी पोट परिग्रह भारि ॥

राजसमाज पुत्रकों दियौ । सुगुरुसाखि नृप चारित लियौ ॥१८॥

धरी दिगंबरमुद्रा सार । करै उचित आहार विहार ॥

१. हाथी २. समथं ३. ऊंचा ४. राजा ५. उम्मत ६. एकघान ७. स्त्री ।

बारहविध दुद्धर तपलीन । छहोंकाय पोहर<sup>१</sup> परवीन ॥१६॥  
 एकसमय अरविद मुनीस । सारथवाहीके संग ईस ॥  
 सिखर सुमेरु बंदनाहेत । चले ईरज्यापथ पग देत ॥२०॥  
 गये सल्लकी बनमें लंघ । तहां जाय उतरयो सब संघ ॥  
 निजसिञ्जाय<sup>२</sup> समय मन लाय । प्रतिमाजोग दियो मुनिराय ॥२१॥  
 तावत द्वाजघाष गजराज । आयौ कोपि कालसम गाज ।  
 सकलसंघमें खलबल परी । भाजे लोग कीकि<sup>३</sup> धुनि करी ॥२२॥  
 गजके धकं परयो जो कोय । सो प्राणी पहुंच्यौ परलोय ॥  
 मारे तुरग<sup>४</sup> तिसाये गैल । मारे मारगहारे बेल ॥ २३ ॥  
 मारे भूखे करहा<sup>५</sup> खरे । मारे जन भाजे भय भरे ॥  
 इहिविध हाथी करत सँघार । मुनि सनमुख आयौ किलकार ॥२४॥  
 अति विकराल रोषविष भरौ । मुनि मारनकौ उद्यम करौ ॥  
 साधु सुदसंन मेरु समान । सिरीवच्छ लच्छन उर थान ॥२५॥  
 सो सुचिन्ह गज देख्यौ जाम । जाती-सुमरन उपज्यौ ताम ॥  
 ततखिन सांत भयौ गजईस । मुनिके चरन धरयो निज सोस ।  
 तब मुनि चर्व<sup>६</sup> मधुर धुनि महा । रे गयंद<sup>७</sup> यह कीनी कहा ॥  
 हिंसा करम परम अघहेत । हिंसा दुरगतिके दुखदेत ॥२७॥  
 हिंसासौं भमिये संसार । हिंसा निजपरकौं दुखकार ॥  
 तं ये जीव विधुंसे आय । पातकतं न डरयो गजराय ॥२८॥  
 देखि देखि अघके फल कौन । लई विप्रतं कुंजर<sup>८</sup>-जौन ॥

१. पीर हरने वाले । २. गवाघवाय ३. किलकारी ४. घोड़ा ५. ऊँट ६. कहे  
 ७. हाथी ८. हाथी ९. योनि ।

तू मंत्री मरुभूति सुजान । मैं अरविद क्यों न पहिचान ॥२६॥  
 धर्मविमुख आरतके दोष । पसु-परजाय लई दुखकोष ॥  
 अब गजपति ये भाव निवारि । धर्मभावना हिरदं धारि ॥३०॥  
 सम्यकदरसन-पूरब जान । पालि अणुव्रत जब लौं प्रान ॥  
 सुन करिद<sup>१</sup> उर कोमल थयौ । किये पाप निज निदत भयौ ॥३१॥

दोहा ।

फिर गुरु-पाँयन सिर धरचौ, धर्म गहन उर हेत ॥  
 तब सत्यारथ धर्मविधि, कही साधु समचेत ॥३२॥

चौपई ।

सुन हस्ती सासन अनुकूल । सकल धरमकौ दसन मूल ॥  
 सब गुनरत्नकोष यह जान । मुक्ति-धौरहर<sup>२</sup>-धुर<sup>३</sup>-सोपान<sup>४</sup> ॥३३॥  
 तातें यह सबहीकौ सार । या बिन सब आचरन असार ॥  
 जो सरदहै औरकी और । सो मिथ्यातभावकी दौर ॥३४॥  
 दोष अठारह-वरजित देव । दुविधसंगत्यागी<sup>५</sup> गुरु एव ।  
 हिंसावरजित धरम अनूप । यह सरधा समकितकौ रूप ॥३५॥

दोहा ।

संकादिक दूषन बिना, आठों अंग समेत ।  
 मोख-बिरछ-अंकूर यह, उपजं भवि-उर-खेत ॥३६॥

चौपई ।

अंगहीन दरसन जगमाहि । भवदुखमेटन समरथ नाहि ॥  
 अच्छरऊन<sup>६</sup> मंत्र जो होय । विषवाधा मेटं नहि सोय ॥३७॥



तातें यह निरनय उरग्रान । यह हिरदं सम्यक् सरधान ।  
 पंच उदंबर तीन मकार । इनकों तजि बारह व्रतधार ॥३८॥  
 इहि विध गुरु दीनों उपदेस । बारण<sup>१</sup> हरषित भयौ विसेस ।  
 सुगुरुवचन सब हिरदं धरें । सम्यक् पूरव व्रत आदरें ॥३९॥  
 बार बार भुविसौ<sup>२</sup> सिर लाय । मुनिवर चरन नमै गजराज ।  
 चले साधु तिहिं हित उपजाय । तब हाथी आयौ पहुंचाय ॥४०॥

दोहा ।

करि उपगार मुनीस तहँ, कीनों सुविधि विहार ।  
 बन निवसै गजपति व्रती, सुगुरु सीख उर धार ॥४१॥

चाल छन्द ।

अब हस्ती संजम साधै । असजीव न भूलि विराधै ॥  
 समभाव छिमा उर ग्राने । अरि मित्र बराबर जानै ॥४२॥  
 काया कसि इन्द्री दंडे । साहस धरि प्रोषध मंडे ॥  
 सूखे तृन पल्लव भच्छे । परमदित<sup>३</sup> मारग गच्छे ॥४३॥  
 हाथीगन डोह्यौ<sup>४</sup> पानी । सो पीवै गजपति ग्यानी ॥  
 देखे बिन पांव न राखै । तन पानी पंक न नाखै ॥४४॥  
 निजसोल कभी नहिं खोवै । हथिनीदिस भूलि न जौवै ।  
 उपसंग सहै अति भारी । दुरध्यान तजै दुखकारी ॥४५॥  
 अघके भय अंग न हालै । दिढ़ धीर प्रतिग्या पालै ॥  
 चिरलों दुद्धर तप कीनों । बलहीन भयौ तन छीनों ॥४६॥

१. हाथी २. पृथ्वी से ३. दूसरों के द्वारा उपयोग में लिया हुआ ४. बिलोडित किया हुआ ।

परमेष्ठि परमपद ध्यावे । ऐसे गज काल गमावे ॥  
 एकै दिन अधिक तिसायी । तब वेगवती तट आयी ॥४७॥  
 जल पीवन उद्यम कीधी । कादो द्रह कुंजर बीधी ॥  
 निहर्च जब मरन विचारौ । संन्यास सुधी<sup>१</sup> तब धारौ ॥४८॥  
 सो कमठ कलंकी भूवो । ता बन कुरकट अहि हूवौ ॥  
 तिन आय डस्यौ गज ग्याता । यह बैर महादुखदाता ॥४९॥

दोहा ।

मरन करचौ गजराज तब, राखे निर्मल भाव ।  
 सुरग बारवे सुर भयौ, देखौ धर्मप्रभाव ॥५०॥

चौपई ।

तहां स्वयंप्रभ नाम विमान । ससिप्रभदेव भयो तिहि थान ॥  
 अवधि जोड़ सब जान्यौ देव । द्रतकौ फल पूरबभव भेव ॥५१॥  
 जिनसासन संसौ बहुभाय । धर्मविषे दिढ़ता मन लाय ॥  
 सदा सासते श्रीजिनधाम । पूजा करी तहां अभिराम ॥५२॥  
 महामेरु नन्दीसुर आदि । पूजे तहां जिनबिब अनादि ।  
 कल्याणक-पूजा बिस्तरै । पुन्य भंडार देव यों भरै ॥५३॥  
 सोलह सागर आयु प्रमान । साढ़े तीन हाथ तन जान ।  
 सोलह सहस वर्ष जब जाहि । असन<sup>२</sup>-चाह उपज उरमाहि ॥५४॥  
 अनुपम अमृतमय आहार । मनसौ भुजै देवकुमार ।  
 आठदुगुन<sup>३</sup> पख बीतै जास । तब सो लेय सुगंध उसास ॥५५॥  
 अवधि चतुर्थ अवनि परजंत । यही विक्रियाबल विरतंत ।

अवधिछेत्र जावत परमान । होय विक्रिया तावत मान ॥५६॥

दोहा ।

वदनचंद्र<sup>१</sup> उपमा धरै, विकसित बारिज<sup>२</sup> नैन ।  
 अंग अंग भूषन लसै, सब बानक<sup>३</sup> सुखदेन ॥५७॥  
 सुन्दर तन सुन्दर वचन, सुन्दर स्वर्गनिवास ।  
 सुन्दर वनितामंडली, सुन्दर सुरगन दास ॥५८॥  
 अणिमा महिमा आदि दे, आठ रिद्धि फल पाय ॥  
 सुर सुछंदक्रीड़ा करै, जो मन वरतै आय ॥५९॥  
 सुनत गीत-संगीत-धुनि, निरखत निरत रसाल ॥  
 सुखसागरमें मगन सुर, जात न जानै काल ॥६०॥  
 लोकोत्तम सब संपदा, अनुपम इन्द्री-भोग ॥  
 सुफल फलयौ तपकल्पतरु, मिल्यौ सकल सुखजोग ॥६१॥  
 जंबंतो बरतो सदा, जैनधर्म जग माहि ।  
 जाके सेवत दुखसमुद, पसुपंछी तिर जाहि ॥६२॥

छन्द ।

इसही जम्बूदीप, पूर्व विदेह मभारै ,  
 पुहकलावतो देस, विकसत नैन निहारै ॥६३॥  
 तहां विजयारध नाम, सौहै सैल रवानो<sup>४</sup> ।  
 उज्जल वरन विसाल, रूपमई गिरिरानो<sup>५</sup> ॥६४॥  
 जोजन परम पचास, भूमिविसै चौड़ाई ।

तुंग<sup>१</sup> पचीस प्रमान, सोभा कही न जाई ॥६५॥  
 चौथाई भूमांभ, नौ सिर कूट विराजें ।  
 सिद्धसिखर जिनधाम, मणिप्रतिमा तहां छाजें ॥६६॥  
 उत्तर दक्षिन ओर, श्रेणी दोय जहां हैं ।  
 दोय गुफा गिरि हेठ<sup>२</sup>, अति अंधियार तहां है ॥६७॥  
 तापर स्वर्ग समान, लोकोत्तम पुर सोहै ।  
 षापी-कूप-तलाब,—मंडित सुर मनमोहै ॥६८॥  
 विद्युत्गति भूपाल, न्याय प्रजा प्रतिपाल ।  
 नीतिनिपुन धर्मज्ञ, संत सुमारग चाल ॥६९॥  
 विद्युत्माला नांव, ता घर नारि सयानी ।  
 मानों मनमथ<sup>३</sup> जोग, आय मिली रतिरानी ॥७०॥  
 तिनकं सो सुर आय, पुत्र भयौ बड़भागी ।  
 अगनिवेग तसु नाम, अति सुन्दर सौभागी ॥७१॥  
 सोमप्रकृति<sup>४</sup> परवीन, सकलसुलच्छनधारी ।  
 जिनपदभक्ति पुनीत, सबहीकों सुखकारी ॥७२॥  
 राजसंपदा भोग, भुंजत पुन्यनियोग ।  
 एक दिना इन साधु, भेंटे भाग संजोग ॥७३॥  
 स्रवन सुन्यौ उपदेश, भर जोबन वंराग्यौ ॥  
 आसनभव्य<sup>५</sup> कुमार, संजमसौ अनुराग्यौ ॥७४॥  
 तजि परिग्रह गुरुसाख, पंचमहाव्रत लीने ।

दुद्धर तप आराध, रागादिक कृस कीनें ॥७५॥  
 छीन किये परमाद, विचरें एकबिहारी ।  
 बारह अंग समुद्र, पार भयी श्रुतधारी ॥७६॥  
 एक दिवस धरि जोग, हिमगिर कंदर<sup>१</sup>माहीं ।  
 निवसे<sup>२</sup> आतमलीन, बाहरकी सुधि नाही ॥७७॥

दोहा ।

कुरकट नामा कमठचर, दुष्टनाग दुखदाय ।  
 सो मरि पंचम नरकमें, परचौ पापवस जाय ॥७८॥  
 छेदन भेदन आदि बहु, तहां वेदना घोर ।  
 सहस जीभसों वरनिये, तऊ न आवें ओर ॥७९॥  
 ऐसे दुखमें कमठ जिय, कीनी पूरन आव ।  
 सत्रह सागर भुगतकें, निकस्यौ कूरसुभाव ॥८०॥

चौपई ।


बैर भाव उरतें नहिं टरचौ । फेरि आय अजगर अवतरचौ ॥  
 संस्कारवस आयौ तहां । हिमगिरिगुफा मुनीसुर जहां ॥८१॥  
 मिले साधु संजमधर धीर । समभावनतें तज्यौ सरीर ॥  
 लीनों स्वर्गसोलवे बास । जो नितनिरुपमभोगनिवास ॥८२॥  
 जन्म-सेजतें जोवन पाय । उठचौ अमर<sup>३</sup> संपूरन काय ॥  
 देखि संपदा विस्मय भयो । अवधि होत संसे सब गयो ॥८३॥  
 पूजा करी जिनालय जाय । भक्ति-भाव-रोमांचित काय ॥  
 पूरवसंचित पुन्यसंजोग । करे तहां सुर वांछित भोग ॥८४॥

गये बरस बाईस हजार । भोजन भुंजें मनसाहार ॥  
 तावतमान पच्छ जब जाय । तब ऊसांसौ<sup>१</sup> दिसि<sup>२</sup> महकाय ।  
 देखें पंचम-<sup>३</sup> भूपरजंत । अबधिग्यानबल मूरतिवंत ॥  
 तितनें मान विक्रिया करे । गमनागमन हिये जब धरे ॥  
 तीन हाथ अति सुन्दर काय । लेस्या सुकल महा सुखदाय ।  
 थिति सागर बाईस विसाल । इहिविध बीते सुखमें काल ॥

दोहा ।

आदि अंत जिस धमैसौं, सुखी होय सब जीव ।  
 ताको तनमनवचनकरि, हे नर सेव सदीव ॥८८॥  
 इति श्रीमत्पाश्र्वनाथपुराणभाषायां गजस्वर्गमनविद्याधरभव-  
 विद्युत्प्रभदेव भववर्णनं नाम द्वितीयोऽधिकारः ॥२॥

## तीसरा अधिकार



दोहा

अस्वसेनकुल-कमल रवि<sup>४</sup>, वामाकुंवर कृपाल ।  
 बन्दौ पारसचरन जुग, सरनागत-प्रतिपाल ॥१॥

चौपई

जम्बूदीप बसं चहुंफेर । जाके मध्य सुदर्शन मेर ।  
 कंचनमनिमय अतुलसुहाग । ता पर्वतके पच्छिम भाग ॥२॥  
 अपरविदेह<sup>५</sup> विराजै खेत । सो नित चौथेकाल समेत ।

१. उच्छ्वास २. दिशा ३. पाचवें नरक ४. सूर्य ५. पश्चिम विदेह ।

पदपद जहां दिपै<sup>१</sup> जिनधाम । नहीं कुदेवनको विसराम ॥३॥  
 जैनजतीजन दीखै सोय । नहीं कुलिगी<sup>२</sup> दीखै कोय ।  
 उत्तमधर्म सदा थिर रहे । हिंसाधर्म प्रकाश न लहै ॥४॥  
 तीनों वरन बसें जहां लोय । ब्राह्मणवरन कभी नहिं होय ।  
 तामें पदमदेस अभिराम । सोहै नगर अस्वपुरनाम ॥५॥  
 तहां वज्जवीरज भूपाल । न्याय प्रजा करै प्रतिपाल ।  
 गुणनिवास सूरजसम दिपे । आन<sup>३</sup> भूप उडगन<sup>४</sup> छवि छिपै ॥६॥  
 विजया नामें नरपति-नारि । रूपवंत रतिकी उनहारि ।  
 पटरानी सबमै परधान । पूरबपुन्य उदय गुणखान ॥७॥  
 एक समय निसिपच्छिमजाम । पंच सुपन देखे अभिराम ।  
 मेरु दिवाकर-चंद्र-विमान । सजल सरोवर सिंधुसमान ॥८॥  
 प्रात भये आई पियपास । विकसत लोचन हियें हुलास ।  
 रातसुपन अवलोके जेह । नृप आगें परकासे तेह ॥९॥  
 तब नरिन्द बोले बिहसाय । सुन्दर बचन श्रवन-सुखदाय ।  
 सुनि रानी इनको फल जोय । पुत्र प्रधान तिहारे होय ॥१०॥  
 ऐसे वच पियके अवधारि । अति आनन्द भयौ नृपनारि ।  
 अचुत स्वर्गतें सो सुर चयौ । वज्रनाभि नामा सुत भयौ ॥११॥  
 चौसठ लच्छन लच्छित काय । पुन्यजोग जिमि उतरचौ आय ।  
 जनममहोच्छव राजा कियौ । जिन पूजे जाचक धन दियौ ॥१२॥  
 बढ़े बाल जिमि बालक-चंद्र । सुजनलोकलोचन सुखकंद ।

१ शोभा पावे २. छोटे भेषधारी ३. दूसरा ४. तारा ५. सज्जन लोगों के नेत्रों को ।

क्रमक्रमसौं सिसु भयौ कुमार । पढ़ लीनी विद्या सब सार ।  
 जोवनवंत कुमर जब भयौ । निमल नीतिपंथ पग ठयौ ।  
 रूप-तेज-बल-बुद्धि-विज्ञान । सकल सारगुणरत्ननिधान ॥१४॥  
 कीनी पिता व्याहविधि जोग । राजसुता बहु बरीं मनोग ।  
 क्रमकरि कुमर पितापद पाय । राज करै थुति<sup>१</sup> करिय न जाय  
 पुन्यजोग आयुधगृह<sup>२</sup> जहां । चक्ररतन वर उपज्यौ तहां ।  
 छहोंखंडवरती भूपाल । वस कीने नाये निजभाल ॥१६॥  
 देव दंत्य विद्याधर नये । नृप मलेच्छ सब सेवक भये ।  
 बढ़ी संपदा पुन्यसंयोग । इन्द्रसमान करै सुखभोग ॥१७॥

दोहा ।

संपूरन सुख भोगवै, वज्रनाभि चक्रेस ।

तिस विभूतिबल वरनऊं, जथासकति लबलेस<sup>३</sup> ॥१८॥

चौपई ।

सहस बतीस सासते देस । धनकनकंचन भरै विसेस ।  
 विपुल<sup>४</sup> बाड़ बेड़े चहुँओर । ते सब गांव छानवै कोर ॥१९॥  
 कोट कोट दरवाजे चार । ऐसे पुर छबिसहजार ।  
 जिनकों लग पांचसौं गांव । ते अटंब चउ<sup>५</sup>सहस सुठांव ॥२०॥  
 पर्वत और नदीके पेट । सोलह सहस कहे वे खेट ।  
 कर्वट नाम सहस चौबीस । केवल गिरिधर बेड़े दीप ॥२१॥  
 पत्तन अड़तालीस हजार । रतन जहां उपजै अति सार ।

१. मुन्दर २. स्तुति ३. शास्त्र भंडार ४. षोड़ी ५. घने ६. चार हजार ।



एकलाख द्रोणीमुख<sup>१</sup> वीर । सहस्र घाट सागरके तीर ॥२२॥  
 गिरि ऊपर संबाहन<sup>२</sup> जान । चौदह सहस्र मनोहर थान ।  
 अट्ठाईस हजार असेस । दुर्ग<sup>३</sup> जहां रिपुको न प्रवेस ॥२३॥  
 उपसमुद्रके मध्य महान । अंतरदीप छपन परिमान ।  
 रतनाकर छब्बीस हजार । बहु विध सार वस्तुभंडार ॥२४॥  
 रतनकुच्छ<sup>४</sup> सुन्दर सातसैं । रतनधरा थानक जहें लसैं ।  
 इन पुरसौ बस राजे खरे । जनधाम धरनी जनभरें ॥२५॥  
 वर गयंद चौरासीलाल । इतने ही रथ आगम-साख ।  
 तेज तुरंग अठारह कोर । जे बड़ चलें पदनतें जोर ॥२६॥  
 पुनि चौरासी कोटि प्रमान । पायक<sup>५</sup> संघ बड़े बलवान ।  
 सहस्र छानवें वनिता<sup>६</sup> गेह । तिनको अब विवरन सुन लेह ॥२७॥  
 आरजखंड बसैं नरईस । तिनकी कन्या सहस्र बतीस ।  
 इतनी ही अतिरूप रसाल । विद्याधरपुत्री गुणमाल ॥२८॥  
 पुनि मलेच्छ भूपनकी जान । राजकुमारी तावतमान ।  
 नाटकगन बत्तीस हजार । चक्री नृपकों सुखदातार ॥२९॥  
 आदि सरीर<sup>७</sup> आदि<sup>८</sup> संठान । पूर्वकथित तन लच्छन जान ।  
 बहुविध विजन<sup>९</sup> सहित मनोग । हेमवरन<sup>१०</sup> तन सहजनिरोग ॥३०॥  
 छहों खंड भूपति बलरास । तिनसौं अधिक देहबल जास ।  
 सहस्र बतीस चरनतल रसैं । मुकटबंधराजा नित नमैं ॥३१॥

१. द्रोणाचार्य जैसे २. निवास स्थान ३. किले ४. रत्नों की खान  
 ५. पैदल सिपाही ६. स्त्री ७. परमौदारिक शरीर ८. समचतुरस्रसंस्थान  
 ९. तिल आदि चिह्न १०. स्वर्ण के समान रंग ।

भूप मलेच्छ छोरि अभिमान । सहस्र अठारह मानें आन ।  
 पुनि गनबद्ध बखानें देव । सोलह सहस्र करें नृप सेव ॥३२॥  
 कोटि थाल कंचननिर्मान । लाखकोटि हलसहित किसान ।  
 नाना वरन गऊकुल<sup>१</sup> भरे । तीनकोटि व्रज<sup>२</sup> आगम धरे ॥३३॥

दोहा ।

अब नवनिधिके नाम गुन, सुनो जथारथरूप ।  
 जेनी बिन जानें नहीं, जिनको सहज सरूप ॥३४॥

चौपई ।

प्रथम कालनिधि सुभ आकार । सो अनेक पुस्तकदातार ।  
 महाकालनिधि दूजी कही । याकी महिमा सुनियौ सही ॥३५॥  
 असि मसि आदिक साधन जोग । सामग्री सब देय मनोग ।  
 तोजी निधि नैसर्प महान । नाना विध भाजनको खान ॥३६॥  
 पांडुक नाम चतुरथी होय । सब रसधान समर्प सोय ।  
 पदम पंचमी सुकृत खेत । बांछित वसन निरंतर देत ॥३७॥  
 मानव नाम छठी निधि जेइ । आयुधजात<sup>३</sup> जन्मभू देह ।  
 सप्तम सुभग पिंगला नाम । बहुभूषन आपे अभिराम ॥३८॥  
 संख निधान आठमी गनो । सब वाजित्र-भूमिका बनी ।  
 सर्वरत्न नवमी निधि सार । सो नित सर्वरत्नभंडार ॥३९॥

दोहा ।

ये नौनिधि चक्रैसकै, सकटाकृत<sup>४</sup> संठान<sup>५</sup> ।  
 आठचक्रसंजुक्त सुभ, चौखूंटो सब जान ॥४०॥

१. गोशाला २. पशु स्थान ३. शस्त्र निर्माण ४. गाड़ी के आकार ५. आकार

जोजन आठ उतंग अति, नव जोजन विस्तार ।  
 द्वारह मित<sup>१</sup> दीरघ सकल, बसं गगन निरधार ॥४१॥  
 एक एकके सहस मित, रखवाले जखदेव<sup>२</sup> ।  
 ये निधि नरपति पुन्यसौं, सुखदायक स्वयमेव ॥४२॥

चौपई ।

प्रथमसुदरसन चक्रपसत्थ<sup>३</sup> । छहोंखंडसाधन समरत्थ ।  
 चंडवेग दिढबंड दुतोय । जिस बल खुलं गुफा गिरिकीय ॥४३॥  
 चर्मरत्न सो तृतीय निवेद । महा वज्रमय नीर अभेद ।  
 चतुरथ चूडामनि मति-रंन । अंधकारनासक सुखदेन ॥४४॥  
 पंचम रत्न काकिनी जान । चिंतामनि जाकौ अभिधान<sup>४</sup> ।  
 इन दोनोंतं गुफामंभार । ससिसूरज लखिये निरधार ॥४५॥  
 सूरजप्रभ सुभ छत्र महान । सो अति जगमगाय ज्यौं भान<sup>५</sup> ।  
 सोनंदक असि<sup>६</sup> अधिक प्रचंड । डरै देखि बैरो बलबंड ॥४६॥  
 पुनि अजोध सेनापति सूर । जो दिगविजय करे बल भूर ।  
 बुधसागर प्रोहित परबीन । बुधिनिधान विद्यागुनलीन ॥४७॥  
 थपित<sup>७</sup> भद्रमुख नाम महंत । सिल्पकलाकोविद<sup>८</sup> गुनवंत ।  
 कामबृद्ध गृहपति विख्यात । सब गृहकाज करे दिनरात ॥४८॥  
 व्याल विजयगिरि अति अभिराम । तुरग<sup>९</sup> तेज पवनंजय नाम ।  
 वनिता नाम सुभद्रा कही । चूरै वज्र पानि<sup>१०</sup> सौं सही ॥४९॥

१. प्रमाण २. यक्षदेव ३. प्रशस्त ४. नाम ५. सूर्य ६. तलवार ७. शिल्पकार  
 ८. विद्वान ९. घोडा १०. हाथ ।

महादेहबल धारें सोय । जा पटतर<sup>१</sup> तिय अवर न कोय ।  
मुख्यरतन यह चौदह जान । और रतनकी कौन प्रमाना<sup>२</sup> ५०  
दोहा ।

राजश्रंग चौदह रतन, विविध भांति सुखकार ।  
जिनकी सुर सेवा करें, पुन्यतरोवर-डार ॥५१॥  
चक्र छत्र असि दंडमनि, चर्म काकिनी नाम ।  
सात रतन निर्जोव यह, चक्रवर्ति के धाम ॥५२॥  
सेनापति गृहपति थपित, प्रोहित नाम तुरंग ।  
वनिता मिलि सातों रतन, ये सजीव सरबंग ॥५३॥  
चक्र छत्र असि दंड ये, उपजें आयुधथान ।  
चर्म काकिनी मनिरतन, श्रीगृह उतपति जान ॥५४॥  
गज तुरंग तिय तीन ये, रूपाचलतें होत ।  
चार रतन बाकी विमल, निजपुर लहैं उदोत ॥५५॥  
चौपई ।

मुख्य संपदाकी विरतंत । आगें और सुनी मतिवंत ।  
सिंहबाहनी सेज मनोग । सिंहारूढ<sup>३</sup> चक्रवं<sup>४</sup> जोग ॥५६॥  
आसन तुंग अनुत्तर नाम । मानिकजालजटित अभिराम ।  
अनुपम नामा चमर अनूप । गंगातरल-तरंग-सरूप ॥५७॥  
विद्युत्तदुति मनिकुंडल जोट । छिपे और दुति जाकी ओट ।  
कवच अभेद अभेद महान । जामें भिदें न बैरीवान ॥५८॥  
बिसमोचिनी पादुका<sup>५</sup> दोय । परपदसों विष मुंचें सोय ।

१ तुलना में २. सिंहों पर रखी हुई ३ चक्रवर्ति के योग्य ४. खड़ाऊ ।

अजितंजै रथ महारवन्न<sup>१</sup> । जलपें थलवत करै गवन्न<sup>२</sup> ॥५६॥  
 वज्रकांड चक्रीधर चाप । जाहि चढ़ावत नरपति आप ।  
 वान अमोघ<sup>३</sup> जबै कर लेत । रनमें सदा विजय वर देत ॥६०॥  
 विकट वज्रतुंडा अभिधान<sup>४</sup> । सत्रुखंडिनी सकती जान ।  
 सिहाटक बरछी विकराल । रतनदंड लागी रिपुकाल ॥६१॥  
 लोहबाहिनो तोखन छुरी । जिमि चमकै चपलादुति<sup>५</sup> दुरी<sup>६</sup> ।  
 ये सब वस्तुजाति भूमार्हि । चक्री छूट और घर नाहि ॥६२॥

दोहा ।

मनोवेग नामा कणय (?), ग्रंथन कह्यौ विख्यात ।  
 खेटभूतमुख नाग है, दोनों आयुध जात ॥ ६३ ॥  
 चोपई ।

आनन्दन भेरो दस दोय । बारह जोजन लौ धनि होय ।  
 वज्रघोस पुनि जिनकौ नाम । बारह पटह<sup>७</sup> नृपति के धाम ॥६४॥  
 वर गंभोरावतं गरीस । सोभनरूप संख चौबीस ।  
 नानावरन धुजा रमनीय । अड़तालीस कोट मित कीय ॥६५॥  
 इत्यादिक बहुवस्तु अपार । वरनन करत न लहिये पार ।  
 महलतनी रचना असमान । जिनमत कही सो लीजै जान ॥

दोहा ।

चक्री नृपकी संपदा, कहै कहां लौ कोय ।  
 पुन्यबेल पूरब बई, फली सांधनी<sup>८</sup> सोय ॥६७॥

१. सुन्दर २. गमन ३. अचूक ४. नाम ५. विजली ६. तेज ७. नवकारे ८. धनी

इहि विध वज्रनाभि नरराय । करै भौग चक्रीपव पाय ।  
 धर्मध्यान अह्निसि<sup>१</sup> आचरै । निर्मल नीतिपंथ पग धरै ॥६८॥  
 पूजा करै जिनालय जाय । पूजे सदा गुरु के पाय ।  
 सामायिक सार्ध अघनास । करै परव<sup>२</sup> प्रोषधउपवास ॥६९॥  
 चारप्रकार दान नित देय । औगुन त्यागै गुन गह लेय ।  
 सप्त सोल पालं बड़भाग । मनवचकाय धर्मसौं राग ॥७०॥  
 सिंहासनपर बैठि नरेश । करे पुनीत<sup>३</sup> धर्म उपदेश ।  
 सुजन सभाजन किकरलोग । देय सुहितसिच्छा सब जोग ॥७१॥

दोहा ।

बीजराखि फल भोगवै, ज्यों किसान जगमाहिं ।  
 त्यों चक्रीनृप सुख करै, धर्म बिसारै नाहिं ॥७२॥

नरेन्द्र अथवा जोगीरासा

इहिविध राज करै नरनायक, भोगै पुन्य विसालो ।  
 सुखसागरमें रमत निरंतर, जात न जानै कालो ॥७३॥  
 एक दिना सुभकर्मसंजोगे, छेमंकर मुनि बन्दे ।  
 देखे श्रीगुरु के पदपंकज, लोचन अलि आनन्दे ॥७४॥  
 तीन प्रदच्छन दे सिरनायौ, करि पूजा युति कीनी ।  
 साधु समीप विनय कर बैठ्यौ, पांयनमें दिठ<sup>४</sup> दीनी ॥७५॥  
 गुरु उपदेश्यौ धर्म सिरोमनि, सुनि राजा वंरागे ।  
 राज रमा<sup>५</sup> वनितादिक जे रस, ते-रस बेरस<sup>६</sup> लागे ॥७६॥

१. रात-दिन २. अष्टमी चतुदशी ३. पवित्र ४. दृष्टि ५. लक्ष्मी ६. नुरे  
 स्वाद वाले ।

मुनिसूरजकथनी किरनावलि, लगत भरमबुध भागी ।  
 भव-तन-भोगसरूप विचारें, परम-धरम-अनुरागी ॥७७॥  
 इस संसार महावनभोतर, भ्रमते ओर न आवें ।  
 जामन-मरन-जरा-दों<sup>१</sup> दाइयौ, जीव महादुख पावें ॥७८॥  
 कबहो जाय नरकथिति भुंजें छेदन भेदन भारी ।  
 कबहो पसु परजाय धरें तहें, बध बंधन भयकारी ॥७९॥  
 सुरगतिमें परसंपति देखें, रागउदय दुख होई ।  
 मानुष जोनि अनेक विपतिमय, सर्वसुखी नहिं कोई ॥८०॥  
 कोई इष्टवियोगी बिलखें, कोई असुभसँजोगी ।  
 कोई दोन दारिद्र बिगूचे<sup>२</sup>, कोई तनके रोगी ॥८१॥  
 किसही घर कलिहारी<sup>३</sup> नारी, कं बरी सम भाई ।  
 किसहीके दुख बाहर दीखें, किसही उर दुचिताई<sup>४</sup> ॥८२॥  
 कोई पुत्र बिना नित भूरें, होय मरें तब रोवें ।  
 खोटी संततिसौं<sup>५</sup> दुख उपजें, क्यों प्राणी सुख सौवें ॥८३॥  
 पुन्यउदय जिनके तिनको भी, नाहि सदा सुख साता ।  
 यों जगवास जथारथ देखत, सब दीखें दुखदाता ॥८४॥  
 जो संसारविषं सुख हो तो, तीर्थङ्कर क्यों त्यागें ।  
 काहेको सिवसाधनकर ते, संजमसौं अनुरागें ॥८५॥  
 देह अपावन अथिर घिनावन, यामें सार न कोई ।  
 सागरके जलसौं सुचि<sup>६</sup> कीजें, तौ भी सुचि नहिं होई ॥८६॥  
 सात कुधातमई मलमूरति, चामलपेटी सोहै ।

१ भाग २ दुखी ३ लड़ाई करने वाली ४ चिन्ता ५ सन्तान से ६ पवित्र ।

अंतर देखत या सम जगमें, और अपावन को है ॥८७॥  
 नव मलद्वार<sup>१</sup> खवें निसिवासर नांव लियें धिन आवें ।  
 व्याधि उपाधि<sup>२</sup> अनेक जहां तहां, कौन सुधी सुख पावें ॥८८॥  
 पोखत तौ दुख दोख करै सब, सोखत सुख उपजावे ।  
 दुर्जन देहसुभाव बराबर, मूरख प्रीति बढ़ावें ॥८९॥  
 राचनजोग<sup>३</sup> स्वरूप न याकौ, विरचनजोग<sup>४</sup> सही है ।  
 यह तन पाय महा तप कीजै, यामें सार यही है ॥९०॥  
 भोग बुरे भवरोग बढ़ावें, बँरी हैं जग जीके ।  
 बेरस<sup>५</sup> होहि विपाक<sup>६</sup> सम अति, सेवत लागें नीके ॥९१॥  
 वज्र अग्नि विषसों विषधरसों,<sup>७</sup> ये अधिके दुखदाई ।  
 धर्मरतनके चोर चपल ये, दुर्गतिपथ सहाई ॥९२॥  
 ज्यों ज्यों भोग सँजोग मनोहर, मनवाँछित जन पावें ।  
 तिसना नागनि त्यों त्यों डंकै, लहर जहरकी आवें ॥९३॥  
 मोह उदय यह जीव अग्यानी, भोग भले कर जानै ।  
 ज्यों कोई जन खाय धतूरो, सो सब कंचन<sup>८</sup> मानै ॥९४॥  
 मैं चक्री पद पाय निरंतर, भोगे भोग घनेरे ।  
 तौ भी तनिक भये नहि पूरन, भोगमनोरथ मेरे ॥९५॥  
 राज-समाज महा अघकारन, बँर बढ़ावनहारा ।  
 वेस्यासम लछमी अति चंचल, याकौ कौन पत्यारा<sup>९</sup> ॥९६॥

( १ दो कान, दो नाक, दो घ्रांख, मुँह, गुदा, लिंग या योनी—ये ६ मल द्वार हैं ) २ मानसिक चिन्ता ३ प्रेम करने योग्य ४ विरक्त होने योग्य ।  
 ५ भ्रान्तहीन ६ फल ७ साँप ८ सोना ९ विश्वास ।



मोह महा रिपु बैर विचारा, जगजिय संकट डाले ।  
 घर कारागृह बनिता बेड़ी, परिजन जन रखवाले ॥६७॥  
 सम्यकदरसन-ग्यान-चरन-तप, ये जियके हितकारी ।  
 ये ही सार असार और सब, यह चक्री चित धारी ॥६८॥  
 छोड़े चौदह रतन नवौं निधि, अरु छोड़े संग साथी ।  
 कोड़ि अठारह घोड़े छोड़े, चौरासी लख हाथी ॥६९॥  
 इत्यादिक संपति बहुतेरी, जीरन-तिन<sup>१</sup> ज्यों त्यागी ।  
 नीति विचार नियोगी<sup>२</sup> सुतकौं, राज दियौ बड़भागी ॥१००॥  
 होय निसल्य अनेक नृपति संग, भूषन वसन उतारे ।  
 श्री गुरुचरन धरी जिनमुद्रा, पंच महाव्रत धारे ॥१०१॥  
 धन यह समझ सुबुद्धि जगोत्तम<sup>३</sup>, धन यह धीरजभारी ।  
 ऐसी संपति छोरि बसे बन, तिन पद ढोक हमारी ॥१०२॥

दोहा ।

परिग्रहपोट उतारि सब, लीनों चारित पंथ ।  
 निज सुभावमें थिर भये, वज्रनाभि निरग्रंथ ॥१०३॥

चौपई ।

बारहबिध दुद्धरतप करं । दसलच्छनी धरम अनुसरं ॥  
 पढ़ं अंग-पूरब<sup>४</sup> श्रुत सार । एकाकी विचरं अनगार ॥१०४॥  
 ग्रीषमकाल बसं गिरिसीस । बरसामें तरुतल मुनिईस ॥  
 सोतमास तटिनीतट<sup>५</sup> रहैं । ध्यान अगनिमें कर्मनि दहैं ॥१०५॥

१ पुराना तिनका २ हकदार (बड़ा) ३ संसार में उत्तम ४ ग्यारह अंग चौदह पूर्व । ५ नदी किनारे ।

एक दिना बनमें थिर काय । जोग दिये ठाड़े मुनिराय ॥  
 कमठजीव अजगर-तन छोरि । उपज्यौ छठे नरक अतिघोर ।  
 थिति सागर बाईस प्रमान । देखे दुख जानें भगवान ॥  
 पूरनआयु भोगकर मरचौ । बनहि कुरंग भोल अवतरचौ ॥ १०७ ॥  
 कालसरूप वदन विकराल । घनचर जीवनकी छयकाल<sup>२</sup> ।  
 धनुषवान लीये निजपान<sup>३</sup> । भ्रमै मांसलोभी बन थान ॥ १०८ ॥  
 सो पापी चल आयी तहां । जोगारूठ खड़े मुनि जहां ॥  
 सत्रुमित्रसौं सम कर भाव । लगे आपमें सुद्धसुभाव ॥ १०९ ॥  
 कुंकुम<sup>४</sup> कादो<sup>५</sup> महल मसान । कोमल सेज कठिन पाषान ।  
 कंचन काच दुष्ट अरु दास । जीवन मरन बराबर जास ॥ ११० ॥  
 निर्ममत्त तनकी सुधि नाहि । सातौं भय-वरजित उरमाहि ॥  
 देखि दिगंबर<sup>६</sup> कोप्यौ नीच । कंपित अधर दसनतल<sup>७</sup> भींच ॥ १११ ॥  
 तान कमान कान लौं लई । तीखन<sup>८</sup> सर<sup>९</sup> मारचौ निरदई ॥  
 मुनिवर धर्मध्यान आराध । दुखमें धीरज तज्यौ न साध ॥ ११२ ॥  
 दरसनग्यानचरन तप सार । चारौं आराधन चित धार ॥  
 देहत्याग तब गये मुनिद्र । मध्यम प्रवेयिक अर्हमिद्र ॥ ११३ ॥  
 तहें उपपादसिला निकलंक<sup>१०</sup> । हंसतूल<sup>११</sup> जुत रतन पलंक ॥  
 उठचौ सेज तजि दीपत<sup>१२</sup> काय । अल्पकाल में जोबन पाय ॥ ११४ ॥  
 देखें दिसि अतिविस्मयरूप । महा मनोग विमान अनूप ॥  
 ल तेज अर्हमिद्र निहार । अवधिज्ञान उपज्यौ तिहि बार ॥ ११५ ॥

१ बदसूरत २ नष्ट करने वाला ३ अपने हाथ में ४ केशर ५ कीचड़

६ दात ७ तीक्ष्ण ८ बाण ९ कलंकरहित १० रुई ११ चमकती हुई ।

जान्यौ सब पूरब-भव-भेव । चारित विरछ फल्यौ सुखदेव ॥  
 अनुपम आठौ दरब सँजोय । रतनबिब पूजे धिर होय ॥११६॥  
 आयौ सुर हषित निजथान । महारिद्धि महिमा असमान ॥  
 तीनभवनवरती जिनधाम । भावभक्ति नित करै प्रनाम ॥११७॥  
 तीथंङ्कुर केवलिसमुदाय । निजथानक थित पूजे पाय ॥  
 पंचकल्याणक काल विचारि । प्रनमं हस्तकमल सिरधारि ॥११८॥

दोहा ।

अनाहूत<sup>१</sup> अहमिद्रगन, आवं सहज सुभाय ।  
 धर्मकथा जिनगुणकथन, करं सनेह बढ़ाय ॥११९॥  
 कबहीं रतनबिमानमैं, कबहीं महलमभार ।  
 कबहीं बनक्रीड़ा करं, मिलि अहमिद्रकुमार ॥१२०॥  
 और बास<sup>२</sup> निज बासतैं, उत्तम दीसैं नाहि ॥  
 ताहींतैं ते अमरगन<sup>३</sup>, और कहीं नहि जाहि ॥१२१॥  
 प्रीत भरे गुण आगरे<sup>४</sup>, सुभग<sup>५</sup> सोम<sup>६</sup> श्रीमन्त ।  
 सातघात मलसौं रहित, लेस्या सुकल धरंत ॥१२२॥  
 सब समान-संपतिधनी, सब मानैं हम इन्द्र ।  
 कला ग्यान विग्यानसम, ऐसे सुर अहमिद्र ॥१२३॥  
 सुकल धरन तनमनहरन, दौय हाथ परिमान ।  
 मानौं प्रतिभा फटिककी<sup>७</sup>, महातेज दुतितवान ॥१२४॥

१ बिना बुलाये २ निवासस्थान ३ देवता ४ भंडार ५ सुन्दर ६ सोम प्र  
 ७ स्फटिकमणि ।

कामदाह उरमें नहीं, नहि वनिताकौ राग ।  
 कल्पलोकके सुर सुखो, असंख्यातवें भाग ॥१२५॥  
 सत्ताईस हजार मित बरस बोति जब जाहि ।  
 मानसीक आहारको, रुचि उपजै मनमाहि ॥१२६॥  
 साढ़े तेरह पच्छपर, लेत सुगंध उसास ।  
 छठी अबनि लौं जिन कही, अवधिविक्रिया जास ॥१२७॥  
 सागर सत्ताईस मित, परम आयु तिहि थान ।  
 सुभग सुभद्र विमानमें, यों सुख करै महान ॥१२८॥  
 चीपाई ।

अब सो भील महादुखदाय । रुद्रध्यानसौं छोड़ी काय ॥  
 मुनिहत्या-पातकते मरचौ । चरम<sup>१</sup> सुभ्रसागरमें<sup>२</sup> परचौ ॥१२९॥  
 दोहा ।

कथा तहांके कष्टकी, को कर सके बखान ।  
 भुगतै सो जानै सहो, कै जानै भगवान ॥१३०॥  
 दोहा ।

जनमथान सब नरकमें, अंध अघोमुख जौन ।  
 घंटाकार<sup>३</sup> घिनावनी, दुसह<sup>४</sup> बास दुखभौन<sup>५</sup> ॥१३१॥  
 तिनमें उपजै नारकी, तल सिर ऊपर पाय ।  
 विषम वज्र कंटकमई, परें भूमिपर आय ॥१३२॥  
 जो विषेल बीछू सहस, लगे देह दुख होय ।

१ अन्तिम २ नरक ३ लटकते हुए विजयघंट को तरह ४ न सहते योग्य

५ दुःख का घर ।

नरक धराके परसतैं, सरिस<sup>१</sup> वेवना सोय ॥१३३॥

तहां परत परवान अति, हाहा करते एम ।

ऊंचे उछलें नारकी, तपे तवा तिल<sup>२</sup> जेम ॥१३४॥

सोरठा ।

नरक सातवें माहिं, उछलन जोजन पांचसौ ।

और जिनागममाहिं, जथाजोग सब जानियो ॥१३५॥

दोहा ।

फेर आन<sup>३</sup> भूपर परं, और कहां उड़ि जाहि ।

छिन्न भिन्न तन अति दुखित, लोट लोट बिललाहि ॥१३६॥

सब दिसि देखि अपूर्व थल, चकित चित्त भयवान ।

मन सोचे मैं कौनहूं, परचौ कहां मैं आन ॥१३७॥

कौन भयानक भूमि यह, सबदुखथानक निद ।

रुद्ररूप<sup>४</sup> ये कौन हैं, निठुर नारकीवृन्द ॥१३८॥

काले बरन कराल मुख, गुंजा<sup>५</sup> लोचन धार ।

हूँडक<sup>६</sup> डील<sup>७</sup> डरावने, करे मार ही मार ॥१३९॥

सुजन न कोई दिठ परं, सरन न सेवक कोष ।

ह्यां सो कछु सूझं नहीं, जासों छिन सुख होय ॥१४०॥

होत विभंगा अवधि तब, निजपरकौं दुखकार ।

नरक कूपमें आपकौं, परचौ जान निरधार ॥१४१॥

१ सदृश-समान २ तपे हुए तवे पर तिल की तरह ३ प्राकर ४ भयानक  
५ धिरमी ६ हूँडक सस्थान ७ शरीर ।

पूरबपापकलाप<sup>१</sup> सब, आप जाप<sup>२</sup> कर लेय ।  
 तब विलापकी ताप तप, पश्चात्ताप करेय ॥१४२॥  
 मैं मानुष परजाय धरि, धन-जोबन-मदलीन ।  
 अधम काज ऐसे किये, नरकवास जिन दीन ॥१४३॥  
 सरसोंसप<sup>३</sup> सुखहेत तब, भयौ लंपटो जान ।  
 ताहीको अब फल लग्यौ, यह दुख मेरु समान ॥१४४॥  
 कंदमूल मद मांस मधु, और अभच्छ अनेक ।  
 अच्छन-बस<sup>४</sup> भच्छन किये, अटक<sup>५</sup> न मानी एक ॥१४५॥  
 जल थल नभचारी विबिध, बिलवासी बहु जीव ।  
 मैं पापी अपराध बिन, मारे दीन अतीव ॥१४६॥  
 नगरदाह कीनों निठुर, गाम जलाये जान ।  
 अटवीमें दोनी अगनि, हिंसा कर सुखमान ॥१४७॥  
 अपने इंद्रीलौभकों, बोल्यौ मृषा मलीन ।  
 कल्पित ग्रंथ बनायकं, बहकाये बहु दीन ॥१४८॥  
 दावघातपरपंचसौं, परलछमी हर लीय ।  
 छलबल हठबल दरबबल, परवनिता<sup>६</sup> बस कोय ॥१४९॥  
 बढी परिग्रहपोट सिर, घटो न घटकी चाह ।  
 ज्यों ईन्धनके जोगसौं, अगनि करं अतिदाह ॥१५०॥  
 बिन छान्यौ पानी पियौ, निसि<sup>७</sup> भुंज्यौ अविचारि ।  
 देवदरब खायो सही, रुद्रध्यान उर धारि ॥१५१॥

१ समूह २ याद कर ३ सरसों के दाने के समान थोड़ासा ४ इन्द्रिय बश  
 ५ क्वाबट ६ परस्त्री ७ रात्रि में ।

कीनी सेव कुदेवकी, कुगुरुनकोँ गुरु मानि ।  
 तिनहींके उपदेशसों, पशु होमैं हित जानि ॥१५२॥  
 दियो न उत्तमदान में, लियो न संजमभार ।  
 पियो मूढ़ मिथ्यातमद, कियो न तप जगसार ॥१५३॥  
 जो धर्मीजन दयाकरि, दीनी सीख निहोर<sup>१</sup> ।  
 में तिनसों रिस करि अधम, भाखे बचन कठोर ॥१५४॥  
 करी कमाई परजनम, सो आई मुझ तोर ।  
 हा हा अब कैसे धरूँ, नरकधरामें धीर ॥१५५॥  
 दुलभ नरभव पायकें, केई पुरुष प्रधान ।  
 तपकरि साधें सुरग सिव, में अभागि यह थान ॥१५६॥  
 पूरब सतन यों कही, करनी चाले लार ।  
 सो अब आँखन देखिये, तब न करी निरधार<sup>२</sup> ॥१५७॥  
 जिस कुटुंब के हेत में, कीनें बहुबिध पाप ।  
 ते सब साथी बीछड़े परचौ नरकमें आप ॥१५८॥  
 मेरी लछमी खानकों, सीरी<sup>३</sup> भये अनेक ।  
 अब इस विपत बिलापमें, कोउ न दीखे एक ॥१५९॥  
 सारंस सरवर तजि गये, सूखो नोर निराट<sup>४</sup> ।  
 फलबिन बिरख बिलौककें, पंछी लागे बाट<sup>५</sup> ॥१६०॥  
 पंचकरन<sup>६</sup>—पोषन<sup>७</sup> अरथ, अनरथ किये अपार ।  
 ते रिपु ज्यों न्यारे भये, मोहि नरकमें डार ॥१६१॥

१. उपकार करके २. निर्णय ३. साक्षीदार ४. नितान्त ( बिलकुल )  
 ५. रास्ता ६ पाँचों इन्द्रियों ७. पृष्ट करने ।

तब तिलभर दुख सहनकों, हुतो अधीरज भाव ।  
 अब ये कैसे दुसह दुख, भरिहों दीरघ आव' ॥१६२॥  
 अघ बैरीके बस परचौ, कहा करुं कित जाउं ।  
 सुनै कौन पूछूं किसे, सरन कौन इस ठाउं ॥१६३॥  
 यहां कछु दुःख हतनको<sup>१</sup>, उक्त<sup>२</sup> उपाव न मूर<sup>३</sup> ।  
 थिति बिन बिपतसमुद्र यह, कब तिरहों तट दूर ॥१६४॥  
 ऐसी चिंता करत हू, बढ़े बेवना एम ।  
 घोव तेलके जोगतं, पावक<sup>४</sup> प्रजुलै जेम ॥१६५॥

सारठा ।

इहिविध पूरब पाप, प्रथम नारकी सुधि करे ।  
 दुखउपजावन जाप, होय विभंगा अबधिते ॥१६६॥  
 दोहा ।

तब ही नारकि निर्दई, नयी नारकी देख ।  
 धाय धाय मारन उठे, महादुष्ट दुरभेख ॥१६७॥  
 सब क्रोधी कलही<sup>५</sup> सकल, सबके नेत्र फुलिंग<sup>६</sup> ।  
 दुःख देनकों अति निपुन, निठुर नपुंसकलिंग ॥१६८॥  
 कुंत<sup>७</sup> कृपान<sup>८</sup> कमान सर, सकती<sup>९</sup> मुगवर दंड ।  
 इत्यादिक आयुध विविध, लिये हाथ परचंड ॥१६९॥  
 कहि कठोर दुर्वचन बहु, तिल तिल खंडे काय ।  
 सो तबही ततकाल तन, पारे-वत मिल जाय ॥१७०॥

१. आयु २ नाश करने को ३ युक्ति ४ मूल ५ अग्नि ६ लड़ाई करने वाले  
 ७ अग्नि बरसाने वाले ८ भाला ९ तलवार (० एकवस्त्र ।



कांटेकर छेदं चरन, भेदं मरम विचारि ।  
 अस्थिजाल चूरन करं, कुचलं खाल उपारि ॥ ७१ ॥  
 चीरं करवत काठ ज्यों, फारं पकरि कुठार ॥  
 तोड़ें अंतरमालिका, अंतर उदर बिदार ॥ १७२ ॥  
 पेलं कोल्हू मेलकं, पोसं घरटी घाल ।  
 तावें ताते तेलमैं, दहैं दहन<sup>२</sup> घरजाल ॥ १७३ ॥  
 पकरि पांय पटकं पुहुमि<sup>३</sup>, भटकि परसपर लेहि ।  
 कंटक सेज सुवावहीं, सूलीपर धरि देहि ॥ १७४ ॥  
 घसं सकंटक रुखसों, बंतरनी ले जाहि ।  
 घायल घेरि घसोटिए, किंचित करुना नाहि ॥ १७५ ॥  
 केई रक्त चुवाव तन, बिलबल भाजें ताम ।  
 पवंत अंतर जायके, करं बैठि विसराम ॥ १७६ ॥  
 तहां भयानक नारकी, धारि विक्रिया भेख ।  
 बाघ सिंह अहि<sup>४</sup> रूपसों, दारें<sup>५</sup> देह विसेख ॥ १७७ ॥  
 केई करसों पांय गहि, गिरसों देहि गिराय ।  
 परं आन दुभूमिपर, खंड खंड हो जाय ॥ १७८ ॥  
 दुखसों कायर चित्तकरि, दूँढें सरन सहाय ।  
 वे अति निर्दय घातकी, यह अति दोन घिघाय<sup>६</sup> ॥ १७९ ॥  
 व्रण<sup>७</sup>-वेदन नोकी करं, ऐसे करि विश्वास ।  
 सींचं खारे नीरसों, जो अति उपजं त्रास ॥ १८० ॥

केई जकरि जँजीरसों, खँचि थंभ अति बांधि ।  
 सुध कराय अब मारिये, नाना आयुध साधि ॥१८१॥  
 जिन उद्धत अभिमानसों कीनें परभव पाप ॥  
 तपतलोह आसनविषे, त्रास दिखावें थाप ॥१८२॥  
 ताती पुतलो लोहकी, लाय लगावें अंग ।  
 प्रीत करी जिन पूर्वभव, परकामिनि<sup>१</sup>के संग ॥१८३॥  
 लोचनदोषी जानिकं, लोचन लेहि निकाल ।  
 मदिरापानी पुरुषकों प्यावें तांबो गाल ॥१८४॥  
 जिन अंगनसों अघ किये, तेई छेदे जाहि ।  
 पल<sup>२</sup>-भच्छनके पापतं, तोड़ि तोड़ि तन खाहि ॥१८५॥  
 केई पूरब बंरके, याद दिवावें नाम ।  
 कह दुर्वचन अनेक बिध, करे कोप संग्राम ॥१८६॥  
 भये विक्रिया देहसों, बहुविध आयुधजात<sup>३</sup> ।  
 तिनहीसों अति रिस<sup>४</sup> भरे, करे परस्पर घात ॥१८७॥  
 सिथिल होय चिर युद्धतं, दीन नारकी जाम ।  
 हिंसानंदी असुर दुठ, आन भिरावें ताम ॥१८८॥  
 सोरठा ।  
 तृतीय नरक परजंत, असुरादिक दुख देत हैं ।  
 भाख्यौ जिनसिद्धन्त, असुरगमन आगे नहीं ॥१८९॥  
 दोहा ।  
 इहिबिध नरक-निवासमें, चैन एकपल नाहि ।

तपें निरंतर नारकी, दुखदावानलमार्हि ॥१६०॥  
 मार मार सुनिये सदा, छेत्र महा दुरगंध ।  
 वहै बात<sup>१</sup> असुहावनी, असुध छेत्र संबंध ॥१६१॥  
 तीनलोककौ नाज सब, जो भच्छन कर लेय ।  
 तौहू भूख न उपसमै<sup>२</sup>, कौन एक कन देय ॥१६२॥  
 सागरके जलसौं जहां, पीवत प्यास न जाय ।  
 लहै न पानी बूंदभर, वहै निरंतर काय ॥१६३॥  
 बायपित्तकफजनित जे, रोगजात जावंत ।  
 तिन सबहोकौ नरकमैं, उदय कह्यौ भगवंत ॥१६४॥  
 कटुतुंबी<sup>३</sup> सौ कटुक रस, करवतकी सी फांस ।  
 जिनकी मृत मंजारसौं<sup>४</sup>, अधिक देहदुरबास<sup>५</sup> ॥१६५॥  
 जोजन लाख प्रमान जहँ, लोहपिंड गल जाय ।  
 ऐसी ही अति उसनता, ऐसी सीत सुभाय ॥१६६॥

घडिल्ल छंद

पंकप्रभापरजंत उसनता अति कही ।  
 धूमप्रभामैं सीत उसन दोनों सही ॥  
 छठी सातमी भूमि में केवल सीत है ।  
 ताकी उपमा नाहि महा विपरीत है ॥१६७॥

दोहा ।

स्वान<sup>६</sup> स्यार मंजारकी, पड़ी कलेवर-रास<sup>७</sup> ।  
 मास वसा<sup>८</sup> अरु रुधिरकी, कादौ जहां कुबास ॥१६८॥

१ हवा २ शान्त ३ कड़वीतुमड़ी ४ बिल्ली से ५ दुर्गन्ध ६ कुत्ता ७ शरीर ८ चर्बी

ठाम ठाम असुहावने, सेंभल तरुवर भूर ।  
 पेनं दुखदेनं विकट, कंटककलित करूर<sup>१</sup> ॥१६६॥  
 और जहां असिपत्र<sup>२</sup> बन, भीम तरोवर खेत ।  
 जिनके दल तरवारसे, लगत घाव करदेत ॥२००॥  
 वंतरिन। सरिता समल, लोहित लहर भयान ।  
 बहै खार सोनित<sup>३</sup> भरी, मांसकीच घिन घान ॥२०१॥  
 पंछी वायस<sup>४</sup> गोधगन, लोहतुंडसौं<sup>५</sup> जेह ।  
 मरम विदारें दुख करे, चूटं चहुंदिस देह ॥२०२॥  
 पंचेंद्री मनकों महा, जे दुखदायक जोग ।  
 ते सब नरकनिकेतमें<sup>६</sup>, एकपिंड अमनोग ॥२०३॥  
 कथा अपार कलेसकी, कहै कहां लों कोय ।  
 कोड़ जोभसौं बरनिये, तऊ न पूरी होय ॥२०४॥  
 सागरबंध प्रमानथिति, छिनछिन तीखन त्रास ।  
 ये दुख देखें नारकी, परवस परे निवास ॥ २०५ ॥  
 जैसी परवस बेदना, सहै जीव बहु भाय ।  
 स्ववस सहै जो अंस भी, तौ भवजल तिरजाय ॥ २०६ ॥  
 ऐसे नरकहिं नारकी, भयौ भोल दुठ भाव ।  
 सागर सत्ताईसकी, धारी मध्यम आव ॥ २०७ ॥  
 सागर काल प्रमान अब, बरनों औसर पाय ।  
 जिनसौं नरकनिवासकी, थिति सब जानी जाय ॥२०८॥

१ क्रूर २ तलवार की धार समान पत्ते ३ खून ४ कौशा ५ लोहे की सी  
 शीब ६ घर ।

चौपई ।

पहले तीन पल्यके भेव । एकचित्तकरि सो सुन लेव ॥  
जिनसौं सागर उपजै सही । जथारीत जिनसासन कही ॥२०६॥

सोरठा ।

प्रथम पल्य ब्योहार, दुतिय नाम उद्धार भन ।  
अर्धा त्रितिय विचार, अब इनकौ विस्तार सुन ॥२१०॥

चौपई ।

पहले गोल कूप कल्पिये<sup>१</sup> । जोजन बड़े मान थरपिये ॥  
इतनौ ही करिये गंभीर । बुधिबल<sup>२</sup> ताहि भरौ नर धीर ॥२११॥  
सात दिवसके भीतर जेह । जने<sup>३</sup> भेड़के बालक<sup>४</sup> लेह ।  
उत्तम भोगभूमिके जान । तिनके रोमअग्र मनआन ॥२१२॥  
ऐसे सूच्छम करिये सोय । फेरि खंड जिनकौ नहि होय ॥  
तिन सौं महाकूप वह भरौ । बारंबार कूट दिढ़ करौ ॥२१३॥  
तिन रोमनकी संख्या जान । पंतालीस अंक परवान ॥  
ते श्रीजिनसासनमें कहे । कर प्रतीत जैनी सरवहे ॥२१४॥

चामर छन्द ।

चार एक तीन चार पांच दो छ तीन ले ।  
सुन्न तीन सुन्न<sup>५</sup> आठ दोय अंक सुन्न दे ॥  
तीन एक सात सात सात चार नौ करौ ।  
पांच एक दोय एक नौ समार दो धरौ ॥२१५॥

१. कल्पना कीजिए २. बुद्धि प्रमाण ३. पैदा हुए ४. भेड़ का बच्चा ५. बिन्दु

दोहा ।

सात बीस ये अंक लिखि, और अठारह सुत्र ।

प्रथम पल्यके रोमकी, यह संख्या परिपुत्र<sup>१</sup> ॥

चौपई ।

सौ सौ बरस बीत जब जाहिं । एक एक काढ़ौ यामाहिं ॥

ऐसी विध सब करते सोय । कूप<sup>२</sup> उदर जब खाली होय । २१७

जो कछु लगे काल परवान<sup>३</sup> । सो व्योहार पल्य उरआन ॥

प्रथम पल्य सबतें लघुरूप । बीजभूत भाख्यौ जिनभूप । २१८ ॥

दोहा ।

संख्या कारन जिन कह्यौ, और न यासौं काज ।

दुतिय पल्य विवरन सुनों, जो भाख्यौ जिनराज ॥ २१९ ॥

चौपई

पूरवकथित रोम सब धरौ । तिनके अंस कल्पना करौ ॥

बरस असंख कोटिके जिते । समय होहिं आतम परिमिते<sup>४</sup> । २२० ॥

एक एकके तावत<sup>५</sup> मान । करौ भाग विकल्प<sup>६</sup> मन आन ॥

याविध ठान रोमकी रास । समय समय प्रति एक निकास ॥

जितनों काल होय सब येह । सो उद्धार पल्य सुन लेह ॥

याकं रोमनसौं परवान । दीपोदधिकी संख्या जान ॥ २२१ ॥

दोहा ।

कोड़ाकोड़ि पचीसके, पल्य रोम जावंत ।

तितनैं दीप समुद्र सब, बरनैं जैनसिधंत ॥ २२३ ॥

१. परिपूर्ण २. कुष्मा ३. प्रमाण ४. प्रमाण ५. उतने ६. विचार ।

चोपई ।

अब सुन त्रितिय पत्य की कथा । श्रीजिनसासन बरनी जथा ।  
दुतियपत्यके अमित<sup>१</sup> अपार । रोम अंस लीजं निर्धार ॥२२४॥  
एक एकके भाग प्रमान । करि सौ बरस समय परवान ॥  
इहिबिध रासि होय फिर एह । समय समय प्रति लीजं तेह ॥  
ऐसे करत लगै जो काल । सोई अर्धापत्य<sup>२</sup> विसाल ॥  
करमनकी थिति यासौं जान । यह उत्कृष्ट कही भगवान ॥२२६॥

दोहा ।

प्रथम पत्य संख्यातमित, दुतिय असंख्यप्रमान ।  
असंख्यातगुन तीसरौ, लिख्यौ जिनागम जान ॥२२७॥  
इन सब तीनों पत्यमें, अर्द्धापत्य महान ।  
दस कोड़ाकोड़ी गये, अर्द्धासागर ठान ॥२२८॥  
इस ही अर्द्धासिधुसौं, पुन्यपाप परभाव ।  
संसारीजन भोगवें, सुरगनरककी आव ॥२२९॥  
ऐसे दीरघ<sup>३</sup> काल लौं, नरक सातवें थान ।  
कमठ जीव दुख भोगवें, परचौ कर्मबस आन ॥२३०॥  
धिक धिक विषयकषायमल, ये बैरी जगमाहि ।  
ये ही मोहित जीवकौं, अवसि नरक ले जाहि ॥२३१॥  
धर्म पदारथ धन्य जग, जा पटतर<sup>४</sup> कछु नाहि ।  
दुर्गतिवास बचायकं, धरै सुरगसिवमाहि ॥२३२॥

- यही जान जिनधर्मकों, सेवो बुद्धिविशाल ।  
 मन तन वचन लगायकं, तिहूँपन<sup>१</sup> तीनों काल ॥२३३॥  
 इति श्रीमत्पाण्डवपुराणभाषायां वज्रनाभश्रमिन्द्रसुखभिन्नरक-  
 दुःखवर्णनं नाम तृतीयोधिकारः ॥३॥

### चौथा अधिकार ।

मोरठा—मारुथल<sup>२</sup> संसार, वामानंदन कलपतरु ।  
 वांछितफलदातार, सुखकामी सेवो सदा ॥१॥  
 चौपई ।

इसही जंबूद्वीपमभार । भरतखंड बच्छिन दिसि सार ।  
 कौसलदेस बसं अभिराम । नगर अजोध्या उत्तम ठान ॥२॥  
 आरजखंडमाहि परधान । मध्यभाग राजं सुभथान ॥  
 गढ़ गोपुर खाई गृहपांति । घनवनसौं सोहै बहुभांति ॥३॥  
 ऊंचे जिनमंदिर मनहरें । कंचन कलस धुजा फरहरें ॥  
 वज्रबाहु भूपति तिहि थान । वर-इख्वाकवंस-नभ-भान ॥४॥  
 जेनधर्म पाले बड़भाग । जिनपद-कमलनि मधुप<sup>३</sup> सराग ॥  
 प्रभाकरी तिय ताघर सती । जीती जिन रंभा-रति-रती ॥५॥  
 दोहा ।

यथा हंसके वंसकों, चाल न सिखवै कोय ।  
 त्यों कुलीन नर-नारिके, सहज नमन-गुण होय ॥६॥

१ नाल, युवा और वृद्धपन २ महस्थल ३ मोरठा ।



चोपाई ।

वह अर्हमिंद्र तहातें चयौ<sup>१</sup> । तिनकें सुविन पुत्र सो भयौ ॥  
 नांव धरचौ आनंदकुमार । अतुल तेज सब लच्छन सार ॥७५॥  
 सुभग सोम श्रीवंत<sup>२</sup> महान । बल-वीरज-धीरजगुनथान ॥  
 नरनारी-मन-मानिक-चोर । देखत नयन रहैं जा ओर ॥८॥  
 जाके सुगुन सेस कह थकें । और कौन बरनन कर सकें ॥  
 जोवनवंत जनक तिस देख । व्याहमहोत्सव कियौ विसैख ॥९॥  
 परनी राजसुता बहु भाय । जिनकी छवि बरनी नहि जाय ॥  
 क्रमसौं कुमर पितापद पाय । बलसौं बस कीये बहुराय<sup>३</sup> ॥१०॥

दोहा ।

जोवन वय<sup>४</sup> संपति बड़ी, मिल्यौ सकल सुखजोग ।

‘महामंडली’ पद लह्यौ, पूरव-पुन्य-नियोग ॥११॥

चोपाई ।

अब सुन आठ जातिके भूप । जिनकी जिनमत कह्यौ सरूप ॥  
 कोटि ग्रामकी अधिपति होय । राजा नाम कहावें सोय ॥१२॥  
 नवें<sup>५</sup> पांचसौं राजा जाहि । अधिराजा नृप कहिये ताहि ॥  
 सहस राय जिस मानें आन । महाराज राजा वह जान ॥१३॥  
 दोय सहस नृप नवें असेस । मंडलीक वह अर्ध नरेस ॥  
 चार सहस जिस पूजें पाय । सोई मंडलीक नरराय ॥१४॥  
 आठ सहस भूपतिकी ईस । मंडलीक सो महा महीस ॥  
 सोलह सहस नवें भूपाल । सो अधचक्री पुन्यविसाल ॥१५॥

१ उत्तरा २ लक्ष्मीवान ३ बहुत से राजा ४ छत्र ५ गिर मुकाने हैं ।

सहस्र बत्तीस आन जिस बहैं । ताहि सकलचक्री बुध कहैं ॥  
इनमें श्रीआनंदनरेस । महामंडली पद परमेस ॥१६॥

सोरठा ।

आठ सहस्र सुखहेत, नृप नछत्र सेवें सदा ।  
कीरति-किरन-समेत, सोहै नरपतिचंद्रमा ॥१७॥

चोपई ।

एक दिना आनंद महीस । बैठघौ सभा सिंहासनसीस ॥  
मंत्री तहां स्वामिहित नाम । कहै विवेकी सुवचन ताम ॥१८॥  
स्वामी यह बसंत रितुराज । सब जन करें महोच्छ्रवकाज ॥  
नंदीसुर-व्रत अवसर यह । करिये प्रभु-पूजा जिन गेह ॥१९॥  
पूजा सदा पाप निरदलै<sup>१</sup> । पर्वसंजोग महाफल फलै ॥  
परम पुन्यको कारन आन । नहीं जगतमें जग्यसमान<sup>२</sup> ॥२०॥

दोहा ।

जिनपूजा की भावना, सब दुखहरन-उपाय ।  
करते जो फल संपर्ज<sup>३</sup>, सो बरन्यौ किमि जाय ॥२१॥

चोपई ।

सुनि राजा मंत्री उपदेस । नगर महोच्छ्रव कियौ विसेस ॥  
करि सनान जिनमंदिर जाय । जैनबिब पूजे विहसाय ॥२२॥  
बहुबिध पूजा दरब मनोग । धरे आन जिनपूजनजोग ॥  
भावभक्तिसौ मंगल ठयो । राजाके मन संसय भयो ॥२३॥

१. नष्ट करे २. पूजा के समान, ३. उत्पन्न करे ।

विपुलमती मुनिवर तिहिं थान । दरसन कारन आये जान ॥  
तिनै पूजि नृप पूछै येह । भो मुनींद्र मुझ मन संवेह ॥२४॥

दोहा ।

प्रतिमा धात पखानकी, प्रगट अचेतन अंग ।  
पूजक जनकों पुन्यफल, क्यों कर देय अभाग<sup>१</sup> ॥२५॥  
तुम जगमें संसय-तिमिर-दूरकरन रविरूप ।  
यह मुझ भरम मिटाइये, करे बीनती भूप ॥२६॥  
तब ग्यानी गनधर कहैं, समाधान सुन राय ।  
भवि-जनकों-प्रतिमा भगति, महापुन्य-फलदाय ॥२७॥  
भाव सुभासुभ जीवके, उपजै कारन पाय ।  
पुन्य पाप तिनसौं बंधे, यों भाष्यौ जिनराय ॥२८॥  
कुसुम<sup>२</sup> बरन कौ जोग लहि, जैसे फटिक<sup>३</sup> पखान ।  
अरुनस्थाम दुतिकों धरे, यही जीवकी बान<sup>४</sup> ॥२९॥  
सो कारन है दोय द्विध, अंतरंग बहिरंग ॥  
तिनके ही उर आय है, जे समझै सरवंग<sup>५</sup> ॥३०॥  
बाहिज कारन जानियो, अंतरंगकी हेत ।  
सोई अंतरभाव नित, कर्मबंधकों देत ॥३१॥  
जिन परिनामन पुन्य बहु, बंधे अन्यथा नाहि ।  
तिन भावनकों निमित्त है, जिनप्रतिमा जगमाहि ॥३२॥

वीतरागमुद्रा निरखि, सुधि<sup>१</sup> आवै भगवान ।  
 वही भाव कारन महा, पुन्यबंधकी जान ॥३३॥  
 रागद्वेषवर्जित अमल<sup>२</sup>, सुखदुखदाता नाहि ।  
 दर्पनवत भगवान हैं, यह आनों उरमाहि ॥३४॥  
 तिनकी चितन ध्यान जप, थुति पूजादिविधान ॥  
 सुफल फलै निज भावसों, ह्वै मुकती सुखदान ॥३५॥  
 जैसे गुन प्रभुके कहे, ते जिन मुद्रामाहि ।  
 थिरसरूप रागादिविन, भूषन आयुध नाहि ॥३६॥  
 जद्यपि सिल्पीकृत कृतम, जिनवरबिम्ब अचेत ।  
 तदपि सही अंतरविषे, सुभभावनको हेत ॥३७॥  
 और एक दिष्टांत<sup>३</sup> अब, सुन अबनीपति<sup>४</sup> सोय ।  
 जियके उर दृष्टांतसों, संसे रहै न कोय ॥३८॥

चोपई ।

गनिका<sup>५</sup> धरी चितामें जाय । बिसनी पुरुष देखि पछताय ॥  
 जो जीवत मुझ मिलतौ जोग । तो मैं करतो बांछित भोग ॥  
 स्वान<sup>६</sup> कहै उर क्यों यह दही<sup>७</sup> । मैं निज भच्छन करतौ सही ॥  
 पुनि तिहि देख कहैं मुनिराय । क्यों न कियो तप यह तन पाय ॥  
 इहिबिध देखि अचेतन अंग । उपजै भाव पाय परसंग ॥  
 तिन ही भावनके अनुसार । लाग्यौ फल तिनको तिहि बार ॥

१ याद २ निर्मल ३ दृष्टान्त ४ राजा ५ वेश्या ६ कुत्ता ७ जली

दोहा ।

व्यसनी नर नरकहि गयो, लह्यौ भूखदुख स्वान ॥

साधु सुरग पहुँचे सही, भावनको फल जान ॥४२॥

चौपई ।

यों जिनबिब अचेतनरूप । सुखदायक तुम जानो भूप ॥

कारनसम कारज संपजं<sup>१</sup> । यामैं बुध<sup>२</sup> संसै नहि भजं ॥४३॥

दोहा ।

जंसै चितामनि रतन, मनवांछितदातार ।

तथा अचेतन बिब यह, वांछ्यापूरनहार ॥४४॥

ज्यों जांचत सुख कलपतरु, दानी जनकों देय ॥

त्यों अचेत यह देत है, पूजककों सुख श्रेय ॥४५॥

मनिमंत्रादिक औषधी, हैं प्रतच्छ जड़रूप ।

विषरोगादिककों हरें, त्यों यह अघहर भूप ॥४६॥

जड़सरूपको पूज पद, प्रगट देखिये लोय<sup>३</sup> ॥

राजपत्र<sup>४</sup> सिर धारिये, मुद्रा<sup>५</sup> अंकित होय ॥४७॥

राजपत्र सिर धारिये, राजाको भय मानि ।

जिनवरमुद्रा पूजिये, पातककों<sup>६</sup> डर जानि ॥४८॥

प्रतिमापूजन चितवन, दरसनआदि विधान ।

हैं प्रमान तिहुँ कालमें, तीन लोकमें जान ॥४९॥

जे प्रतिमा पूजं नही, निंदा करे अजान ।

तीन लोक तिहुँकालमें, तिनसम अधम<sup>७</sup> न आन<sup>८</sup> ॥५०॥

१ बने २ बुद्धिमान ३ लोक ४ राजा का फरमान ५ म्होर लगी हुई ६ पाप

७ नीच ८ दूसरा ।

जे प्रतिमा पूजै सदा, भावभगति-विधि-सुद्धि ।  
 तिनकी जनम सराहिये, धन तिनकी सद्बुद्धि ॥५१॥  
 इत्यादिक उपदेस सुनि, आई उर परतीत<sup>१</sup> ।  
 जिनप्रतिमापूजनविषै, धरी राय दिढ़ प्रीत ॥५२॥  
 चीपई ।

तिस औसर<sup>२</sup> मुनि बरनै ताम । तीनभवनवरती जिनधाम ॥  
 भानुविमानविषं जिनगेह । सो पहले बरनै धरि नेह ॥५३॥  
 रतनमई प्रतिमा जगनगं । कोटभानुछबि<sup>३</sup> छीनी<sup>४</sup> लगं ॥  
 निरुपम रचना विविध विसाल । सूरजदेव नमं तिहुं काल ॥५४॥  
 सुन आनंदौ<sup>५</sup> आनंदराय । विकसत आनन<sup>६</sup> अंग न माय ॥  
 जब संदेहसल्य निरबरं<sup>७</sup> । तब अवस्य उर सुख विस्तरं ॥५५॥  
 प्रात सांभ मंदिर चढ़ि सोय । अघं देय रविसम्मुख होय ॥  
 करि जिनबिबनकौ मन ध्यान । अस्तुति करै राग मन आन ॥  
 रविविमान मनिकंचनमई । निरमापो अद्भुत छबि छई ॥  
 जंतभवनकरि मंडित सोय । देखत जनमन अचरज होय ॥५६॥  
 पूजा तहां करै नित राय । महा महोच्छ्रव हर्ष बढ़ाय ॥  
 प्रतिदिन देय दया उर आन । दोन दुखित जनकौ बहु दान ॥५७॥  
 यह नितनेम करै भूपाल । चली नगरमं सोई चाल ॥  
 सब सूरजकौ करै प्रनाम । देखादेखि चलयौ मत ताम ॥५८॥

१ विश्वास २ समय ३ करोड़ सूर्य की शोभा ४ फीही ५ प्रसन्न हृमा ६ मुख  
 ७ नष्ट होते ।

समझें नहीं मूढ़ परनये । भानुउपासक तबसों भये ॥  
 जो महंत<sup>१</sup> नर कारज करे । ताकी रीत जगत आचरे ॥६०॥  
 यों बहु पुन्य करे भूपाल । सुखमें जात न जान्यौ काल ॥  
 एक दिना निजसभा नरेस । निबसे<sup>२</sup> मानों सुरगसुरेस ॥६१॥  
 धवल<sup>३</sup> केस देख्यौ निज सीस । मन कण्यो सोचें नरईस ॥  
 जाहि देखि मनउत्सव घटै । कामी जीवनकौ उर फटै ॥६२॥  
 सो लखि सेत<sup>४</sup> बाल भूपाल । भोगउदास भये ततकाल ॥  
 जगतरीति सब अथिर असार । चित्तं चित्तमें मोह निवार ॥६३॥  
 बाल अवस्था भई बितौत । तरुनाई आई निज रीत ॥  
 सो अब बीती जरा<sup>५</sup> बसाय । मरन दिवस यों पहुंचे आय ॥६४॥  
 बालक काया कू<sup>६</sup>पल सोय । पत्ररूप जीवनमें होय ॥  
 पाको पात<sup>७</sup> जरा तन करे । काल बयारि<sup>८</sup> चलत भर<sup>९</sup> परे ॥  
 कोई गर्भमाहि खिर जाय । कोई जनमत छोड़ै काय ॥  
 कोई बाल दसा धरि मरे । तरुन अवस्था तन परिहरै ॥६६॥  
 मरन दिवसकी नेम न कोय । यातें कछु सुधि परे न लोय ॥  
 एक नेम यह तो परमान । जन्म धरे सो मरं निदान<sup>१०</sup> ॥६७॥  
 महापुरुष उपजे बड़भागि । सब परलोक गये तन त्यागि ॥  
 संसारो जन अपनी बार । पूरबउदें करे अनुसार ॥६८॥  
 परवत<sup>१०</sup> पतित नदोके न्याय<sup>११</sup> छिनही छिन थिति<sup>१२</sup> बीती जाय ।  
 रागअंधप्रानी जगमाहि । भोगमगन कछु सोचें नाहि ॥६९॥

१ बड़े २ बसे ३ सफेद ४ सफेद ५ बुढ़ापा ६ पत्ता ७ हवा ८ झड़पड़े ९ आखिर

१०. पहाड़ से गिरने वाली ११. तरह १२. स्थिति ।

अंतकाल जब पहुँच आय । कहा होय जो तब पछताय ॥  
 पानी पहले बंधे जो पाल । वही काम आवे जल-काल ॥७०॥  
 यही जान आतमहितहेत । करे विलंब<sup>१</sup> न संत सुचेत ।  
 आज काल जे करत रहाहि । ते अजान पीछे पछताहि ॥७१॥  
 रात दिवस घटमाल<sup>२</sup> सुभाव । मरि मरि जलजीवनकी आव ।  
 सूरज चांद बैल ये दोय । काल रहत नित फेरें सोय ॥७२॥

दोहा ।

राजा राना छत्रपति, हाथिन के प्रसवार ।  
 मरना सबकोँ एक दिन, अपनी अपनी बार ॥७३॥  
 दलबल<sup>३</sup> देई देवता, मात पिता परिवार ।  
 मरती बिरिया<sup>४</sup> जीवकोँ, कोउ न राखतहार ॥७४॥  
 दामबिना निर्धन दुखी, तिसनावस धनवान ।  
 कहूं न सुख संसारमें, सब जग देख्यौ छान ॥७५॥  
 आप अकेला अवतरें<sup>५</sup>, मरें अकेला होय ।  
 यों कबही इस जीवका, साथी सगा न कोय ॥७६॥  
 जहां देह अपनी नहीं, तहां न अपनी कोय ।  
 परसंपति पर प्रगट ये, पर हैं परिजन लोय ॥७७॥  
 दिपे<sup>६</sup> चाम<sup>७</sup>-चादर-मढी, हाड़ पीजरा देह ।  
 भीतर या सम जगतमें, और नहीं धिनगेह<sup>८</sup> । ७८॥

१. देर २. अरहट के घड़ों की माला ३. सेना की शक्ति ४. समय ५. पैदा

हो ६. चमकें ७. चमड़ा ८. दुग्गा का स्थान ।



सोरठा

मोहनींद के जोर, जगवासी घूम सदा ।  
 कर्मचोर चहुँ ओर, सरवस लूटें सुधि नहीं ॥७६॥  
 सतगुरु देहि जगाय, मोहनींद जब उपसमें<sup>१</sup> ।  
 तब कछु बन उपाय, कर्मचोर आवत रुकें ॥८०॥

दोहा ।

ग्यान दीप तप तेल भरि, घर सीधे<sup>२</sup> भ्रम छोर ।  
 याबिध बिन निकसें नहीं, पैठे<sup>३</sup> पूरब चोर ॥८१॥  
 पंचमहाव्रत-संचरन, समिति पंच परकार ।  
 प्रबलपंच इंद्रोविजय, धार निजंरा सार ॥८२॥  
 चौदह राजु<sup>४</sup> उतग<sup>५</sup> नभ, लोक पुरुषसंठान<sup>६</sup> ।  
 तामें जीव अनादिसौं, भरमत है बिन ग्यान ॥८३॥  
 जांचे<sup>७</sup> सुरतरु<sup>८</sup> देहि सुख, चितत चितारै न ।  
 बिन जांचे बिन चितवे, धर्म सकल सुख-दैन ॥८४॥  
 धन-रुन-कंचन-राजसुख, सब सुलभ करि जान ।  
 दुर्लभ है संसारमें, एक जथारथ<sup>९</sup> ग्यान ॥८५॥

चौपई ।

इहिबिध भूप भावना भाय । हित उद्यम चित्यौं मन लाय ॥  
 सबसौं मोह ममत निरवारि । उठ्यौं धीर धीरज उर धारि ८६  
 जेठे<sup>१०</sup> सुतकीं दीनों राज । आप चलयौं सिवसाधनकाज ॥

१. गान्त हो २. खोजे ३. घुसे ४. एक नाप ५. ऊंचा ६. पुरुष के आकार  
 ७. मांगते पर ८. कल्पवृक्ष ९. यथार्थ-सम्यक् १०. बड़े ।

सागरदत्त मुनीसुरपास । संजम लियौ तजी जगआस ॥८७  
 घनं भूप भूपतिके संग । धरे महाव्रत निर्भय अंग ॥  
 अब आनन्द महामुनि धीर । वननिवास विचरै वन बीर ॥  
 दुद्धर<sup>१</sup> तप बारह बिध करै । दुबिध संग-ममता परिहरै ॥  
 तिनके नाम कहूं कछु धार । जिनसासन जिनकौ विस्तार ।  
 प्रथम महातप अनसन<sup>२</sup> नाम । दूजौ ऊनोदर<sup>३</sup> गुनधाम ।  
 तीजौ है व्रतपरिसंख्यान । रसपरित्याग चतुर्थम मान ॥९  
 पंचम भिन-सयनासन सार । कायकलेस छठी अविकार ॥  
 यह षटबिध बाहज तप जान । अब अन्तर तप सुनौ सुजान ।  
 पहले प्राच्छित<sup>४</sup> विनय दुतीय । वैयाव्रत तीजौ गन लीय ॥  
 चौथौ अन्तरंग सिद्धभाय<sup>५</sup> । पंचम तप व्युत्सर्ग बताय ॥९  
 षष्ठम ध्यान हरै सब खेद । ये अन्तरतप के सब भेद ॥  
 अब इनकौ संक्षेप सरूप । सुनौ संत तजि भाव विरूप ॥९३  
 जिनके सुनत बंधं सुभध्यान । सेवत पद लहिये निरवान ॥  
 तप बिन तीनकाल तिहुं लोय । कर्मनास कवही नाह होय ॥  
 दिनसौं लेय वरस लगि करै । चार प्रकार असन परिहरै ।  
 राग-रोग-निदंलन उपाय । सो अनसन भाख्यौ जिनराय ॥  
 पौन अर्ध चौथाई टेक । एक ग्रास अथवा कन एक ॥  
 ऐसी बिध जो भोजन लेत । ऊनोदर आलस हर लेत ॥९  
 जैसी प्रथम प्रतिग्या करै । ताही बिध भोजन आदरै ॥

सो कहिये द्रतपरिसंख्यान । आसाव्याधि-विनासन जान ॥६७॥  
 लवनादिक रस छारि उपाध । नीरसभोजन भुंजै साध ॥  
 रसपरित्याग कहावै एम । इंद्रियमदनासन यह नेम ॥६८॥  
 सून्यगेह गिरि गुफा मसान । नारि-नपुंसक-वर्जित थान ॥  
 बसं भिन्न-सयनासन सोय । यासौं सिद्धि ध्यानको होय ॥६९॥  
 शीघ्रमकाल बसं गिरि-सीस । पावसमें तरुवरतल दीस ॥  
 सीतसमय तटिनीतट<sup>१</sup> रहै । काय कलेस कहावै यहै ॥१००॥  
 दोहा ।

या तपके आचरनसौं, सहनसील मुनि होय ।  
 अब अन्तर-तप-भेद छह, कहूं जिनागम जोय ॥१०१॥  
 चौपई ।

जो प्रमादवस लागे दोष । सोधे ताहि छोरि छल रोष ॥  
 आचारजवानी अनुसार । यही प्रथम प्राच्छित तप सार ॥१०२॥  
 जे गुनजेठे<sup>२</sup> साधु महंत । वरसन ग्यानी चारितवंत ॥  
 तिनकी विनय करै मनलाय । विनय नाम तपसो सुखदाय १०३  
 रोगादिक पीड़ित अविलोय<sup>३</sup> । बाल विरध मुनिवर जो होय  
 सेव करै निजसंजम राखि । सो वैयाव्रत आगमसाखि ॥१०४॥  
 सकतिसमान सकल गुन ठाठ । करै साधु परमागमपाठ ॥  
 परमोत्तम तप सो सिज्भाय । जासौं सब संसय मिटजाय १०५  
 निजसरीरममता परिहरै । काउसगमुद्रा दिढ धरै ॥  
 अन्तर बाहर परिग्रह छार । सोई तप व्युत्सर्ग उदार ॥१०६॥

१. मदी के किनारे २, बड़े ३. धवलोकर करे ।

आरत रौद्र निवारं सोय । धर्म सकल ध्यावै धिर होय ॥  
जहां सकल चिंता भिड जाहि । वही ध्यानतप जिनमतमाहि १०  
दोहा ।

यह बारह बिध तप विषम<sup>१</sup>, तपे महामुनि धीर ॥  
सहै परीषह बीस दो, ते अब वरनों बीर ॥१०८॥

छप्पय

छुधा तृषा हिम उसन, डंस मंसक<sup>२</sup> दुखभारी ।  
निरावरन तन अरति, खेद उपजावन नारी ॥  
चरिया आसन सयन, दुष्ट वायक<sup>३</sup> वध बंधन ।  
जांचं नहीं अलाभ रोग, तिन-फरस निबंधन<sup>४</sup> ॥  
मलजनित मान-सनमानवस, प्रग्या<sup>५</sup> और अग्यान कर  
दरसन मलीन बाईस सब, साधुपरीषह जान नर ॥१०९॥  
दोहा।

सूत्रपाठ अनुसार ये, कहे परीषह नाम ॥  
इनके दुख जे मुनि सहै, तिनप्रति सदा प्रनाम ॥११०॥  
सोभावती छन्द

अनसन ऊनोदर तप पोषत, पाखमास दिन बीत गये हैं ।  
जोग न वनें जोग भिच्छाविधि, सूख अंग सब सिथिल भये हैं  
तब बहु दुसह भूखकी वेदन, सहत साधु नहिं नेक नये हैं ।  
तिनके चरनकमल प्रति दिन दिन, हाथ जोरि हम सीस ठये हैं  
पराधीन मुनिवरकी भिच्छा, परघर लेहिं कहैं कछु नाहीं ।

प्रकृति-विरोधि पारना भुंजत, बढ़त प्यासकी आस तहांहीं ।  
 ग्रीषमकाल पित्त अति कोपै, लोचन दौय फिरे जब जाहीं ।  
 नीर न चहै सहै ऐसे मुनि, जयवन्ते बरतौ जगमाहीं ॥११२॥  
 सीतकाल सबही जन कापै, खड़े जहां बन बिरछ<sup>१</sup> डहै हैं ।  
 भंभा वायु बहै बरसा रित, बरसत बादल भूमरहे हैं ॥  
 तहां धीर तटिनोतट<sup>२</sup> चौबट, ताल-पालपै<sup>३</sup> कम बहै हैं ।  
 सहै संभाल सीतकी बाधा, ते मुनि तारनतरन कहे हैं ॥११३॥  
 भूख प्यास पीडै<sup>४</sup> उर अंतर, प्रजलै<sup>५</sup> आंत देह सब दागै<sup>६</sup> ।  
 अग्निसरूप धूप ग्रीषमकी, ताती बाल<sup>७</sup> भालसी<sup>८</sup> लागै ॥  
 तपै पहार ताप तन उपजै, कोपै पित्त दाहजुर जागै ।  
 इत्यादिक ग्रीषमकी बाधा, सहत साधु धीरज नहि त्यागै ॥  
 डांस मांस माखी तन काटै, पीडै बनपछी बहुतेरे ।  
 डसं व्याल<sup>९</sup> विषयाले बीछू, लगै खजूरे<sup>१०</sup> आन घनेरे ॥  
 सिंह स्याल सुंडाल<sup>११</sup> सतावै, रोछ रोभ दुख देहि बड़ेरे ।  
 ऐसे कष्ट सहै समभावन, ते मुनिराज हरौ अघ मेरे ॥११५॥  
 अंतर विषय-वासना बरतै, बाहर लोकलाजभय भारी ।  
 तातै परम दिगंबरमुद्रा, धर नहि सकं दोन संसारी ॥  
 ऐसी दुद्धर नगन परीषह, जीतै साधु सीलव्रतधारी ।  
 निर्विकार बालकवत निर्भय, तिनके पायन ठोक हमारी ॥११६॥

१ वृक्ष २. नदी किनारे ३. तालाब के किनारे ४ दुःख दे ५ जल ६. मुलमे  
 ७. गरम हवा ८. तीक्ष्ण ९. सर्प १०. कछले ११ हाथी ।

देश कालकौ कारन लहिके, होत अचैन<sup>१</sup> अनेक प्रकारे ।  
 तब तहां खिन्न होहि जगवासी कलमलाय थिरतापद छारें ॥  
 ऐसी अरति परीषह उपजत, तहां धीर धीरज उर धारें ।  
 ऐसे साधनकौ उर अंतर, बसौं निरंतर नाम हमारें ॥११७॥  
 जे प्रधान केहरिकौं<sup>२</sup> पकरें, पन्नग<sup>३</sup> पकरि पांवसाँ चंपत<sup>४</sup> ।  
 जिनकी तनक देखि भाँ बांकी, कोटिक सूर दीनता जंपत ॥  
 ऐसो पुरुष-पहार-उड़ावन,—प्रलय-पवन तिय<sup>५</sup>-वेद पयंपत<sup>६</sup> ।  
 धन्य-धन्य ते साधु साहसी, मनसुमेरु जिनकौ नहिं कंपत ॥११८॥  
 चारहाथ परवान निरखि पथ, चलत दिष्ट इत उत नहिं तानें  
 कोमल पांय कठिन धरती पर, धरत धीर बाधा नहिं मानें ॥  
 नाग<sup>७</sup> तुरंग<sup>८</sup> पालकी चढ़ते, ते सवाद<sup>९</sup> उर यादि न आनें ।  
 यों मुनिराज भरें चर्यादुख, तब दिठकर्म कुलाचल<sup>१०</sup> भानें ॥  
 गुफा मसान सैल<sup>११</sup> तरु<sup>१२</sup>-कोटर, निवसैं जहां सुद्धि भू हेरें ।  
 परिमित काल रहैं निहचल तन, बारबार आसन नहिं फेरें ॥  
 मानुष देव अचेतन पसुकृत, बंठे विपत आन जब घेरें ।  
 ठौर न तजें भजें थिरता पद, ते गुरु सदा बसौं उर मेरें ॥१२०॥  
 जे महान सोनेके महलन, सुन्दरसेज सोय सुख जोवें ।  
 ते अब्र अचलअंग एकासन, कोमल कठिन भूमिपर सोवें ॥  
 पाहन-खंड कठोर कांकरी, गड़त कोर कायर नहिं होवें ।  
 ऐसी सयन-परीषह जीतत, ते मुनि कर्मकालिमा धोवें ॥१२१॥

१. दुखी २. सिंह ३. साँप ४. कुचले ५. स्त्री वेद ६. प्रकंपत=कंपित

७. हाथी ८. घोड़ा ९. आनन्द १०. पहाड़ ११. पर्वत १२. वृक्षका खोखला भाग

जगत जीव जायंत<sup>१</sup> चराचर, सबके हित सबके सुखदानी ।  
 तिनं देख दुबंचन कहैं दुठ, पाखंडी ठग यह अभिमानी ॥  
 मारौ याहि पकरि पापीकों, तपसी-भेष चोर है छानी<sup>२</sup> ।  
 ऐसे वचनबाणकी वर्षा, छिमाढाल ओढें मुनिग्यानी ॥१२२॥  
 निरपराध निर्बैर महा मुनि, तिनकों दुष्टलोग मिलि मारें ।  
 केई खंच थंभसों बांधत, केई पावकमें<sup>३</sup> परजारें ॥  
 तहां कोप नहिं करहिं कदाचित, पूरबकर्मविपाक<sup>४</sup> विचारें ।  
 समरथ होय सहैं बध बंधन, ते गुरु सदा सहाय हमारें ॥१२३॥  
 घोर वीर तप करत तपोधन, भयौ खीन सूखो गल बाहीं ।  
 अस्थि<sup>५</sup> चाम अवसेस रह्यो तन, नसाजाल भूलक्यौ जिसमाहीं ।  
 ओषधि असन<sup>६</sup> पान इत्यादिक, प्राण जाय पर जांचत नाहीं ।  
 दुद्धर अजाचीक<sup>७</sup> द्रत धारें, करहिं न मलिन धरमपरछाहीं ॥  
 एक बार भोजनकी विरियाँ, मौन साधि बसती<sup>८</sup> में आवें ।  
 जो नहिं बनै जोग भिच्छाविधि, तौ महंत मन खेद न लावें ।  
 ऐसे भ्रमत बहुत दिन बीतें, तब तप विरद भावना भावें ।  
 यों अलाभकी परम परीषह, सहैं साधु सोई सिव पावें ॥१२५॥  
 बात पित कफ सोनित<sup>९</sup> चारों, ये जब घटै बढें तनमाहीं ।  
 रोगसंजोग सोग तन उपजत, जगत जीव कायर हो जाहैं ॥  
 ऐसी व्याधि वेदना दारुन<sup>१०</sup>, सहैं सूर उपचार न चाहैं ।  
 आतम-लीन देहसों विरकत, जैन जती निज नेम निबाहैं ॥१२६॥

१. जितने २ छिगा हुआ ३. अग्नि में ४. फल ५. हड्डी ६. भोजन ७. नहीं  
 मांगना ८. नगर-गांव ९. खून १०. कठोर ।

सूखे तिन अरु तीखन कांटे, कठिन कांकरी पांय बिदारै ।  
 रज उड़ि आय परै लोचनमें, तीर फांस तन पीर विथारै ॥  
 तापर पर सहाय नहि बांध्यत, अपने करसौं काढ़ न डारै ।  
 यों तिन-परस-परोषहविजई, ते गुरु भवभव सरन हमारै ॥१२७॥  
 जावजीव<sup>१</sup> जलन्हौन तज्यौं जिन, नगनरूप बनथान खरे हैं ।  
 चलै पसेव धूपकी बिरियां, उड़त धूल सब अंग भरे हैं ॥  
 मलिन देहकौं देखि महामुनि, मलिन भाव उर नाहिं करे हैं ।  
 यों मलजनित परीषह जीतै, तिनै हाथ हम सीस धरे हैं ॥१२८॥  
 जे महान विद्यानिधि विजई, चिरतपसी<sup>२</sup> गुन अतुल भरे हैं ।  
 तिनकी विनय वचनसौं अथवा, उठि प्रनाम जन नाहिं करे हैं ॥  
 तौ मुनि तहां खेद नहिं मानै, उर मलीनता भाव हरे हैं ॥  
 ऐसे परमसाधुके अहनिशि<sup>३</sup>, हाथ जोरि हम पांय परे हैं ॥१२९॥  
 तर्क छन्द व्याकरण कलानिधि, आगम अलंकार पढ़ जानै ।  
 जाकी सुमति देखि परवादी, बिलखे हौंहिं लाज उर आनै ॥  
 जैसे नाद<sup>४</sup> सुनत केहरिकी<sup>५</sup>, बनगयन्द<sup>६</sup> भागत भय मानै ।  
 ऐसी महाबुद्धिके भाजन, पै मुनीस मद रंच न ठानै ॥१३०॥  
 सावधान बरतै निसिवासर, संजमसूर परमवैरागी ।  
 पालत गुपति गये दीरघ दिन, सकल संग-ममतापरित्यागी ॥  
 अवधिग्यान अथवा मनपरजय, केवलकिरन अजौं नहिं जागी ।  
 यों विकल्प नहिं करहिं तपोधन, सो अग्यानविजई बड़भागी ।

१. यावज्जीव २. चिरकाल के साधु ३. रात दिन ४. आवाज ५. सिंहकी ६. बन का हाथी ।



मैं चिर काल घोर तप कीनों, अजों, रिद्धि-अतिसय नहि जागै ।  
 तपबल सिद्ध होंहि सब सुनिये, सौ कछु बात भूठसी लागै ॥  
 यों कदापि चितमें नहि चितत, समकित-सुद्ध-सांतरसपागे ।  
 सोई साधु अदसंनविजई, ताके दरसनसौं अघ भागे ॥१३२॥

कवित्त इकत्तीसा

ग्यानावरणीसौं दोय प्रग्या अग्यान होय,  
 एक महामोहतें अदरस बखानिये ।  
 अंतरायकर्मसेती उपजं अलाभ दुख,  
 सपत चारित्रमोहनी के बल जानिये ॥  
 नगन निषिद्या नारि मान सनमान गारि',  
 जांचना अरति सब ग्यारें ठीक ठानिये ।  
 एकादस बाकी रहों वेदनी उदैसौं कहीं,  
 बाइस परीषा उदै, ऐसे उर आनिये ॥१३३॥

अडिल्ल छंद ।

एक बार इनमाहिं, एक मुनिके कही ।  
 सब उनीस उतकृष्ट, उदय आवें सही ॥  
 आसन सयन विहार, दोय इनमाहिकी ।  
 सीत उसनमें एक, तीन ये नाहिकी ॥१३४॥  
 दोहा—अब दसलच्छन धर्मके, कहूं मूल दस अंग ।  
 जे नित श्रीआनन्द मुनि, पालत हैं सरवंग ॥१३५॥

चौपाई ।

बिनादोष दुर्जन दुख देय । समरथ होय सकल सह लेय ॥  
 क्रोध कषाय न उपजं जहां । उत्तम छिमा कहावे तहां ॥१३६॥  
 आठ महामद पाय अनूप । निरभिमान बरते मृदु रूप ॥  
 मानकषाय जहां नहि होय । भार्दव<sup>१</sup> नाम धरम है सोय ॥१३७॥  
 जो मनचित्तै सो मुख कहै । करै कायसौं कारज वहै ॥  
 मायाचार न उर पाइये । आजं<sup>२</sup>व<sup>३</sup> धर्म यही गाइये ॥१३८॥  
 बोलै बचन स्वपरहितकार । सत्यस्वरूप सुधा-उनहार ॥  
 मिथ्यावचन कहै नहि भूल । सोई सत्य धर्मतरुमूल ॥१३९॥  
 पर-कामिनि पर-दरबमभार । जो विरक्त बरते छल छार ॥  
 अंतर सुद्ध होय सरवंग । सोई सौच<sup>४</sup> धर्मको अंग ॥१४०॥  
 मन समेत जो इंद्रो पंच । इनकों सिधिल करै नहि रंच ॥  
 अस थावरकी रच्छा जोय । संजम धर्म बखान्यो सोय ॥१४१॥  
 ख्याति लाभ पूजा सब छंड । पंच करन<sup>५</sup>कों दीजं दंड ॥  
 सो तपधर्म कह्यौ जगसार । अनसनादि बारह परकार ॥१४२॥  
 संजमधारी व्रती प्रधान । दीजै चउविध उत्तम दान ॥  
 तथा दुष्टविकल्प परिहार । त्यागधर्म बहु सुखदातार ॥१४३॥  
 बाहिज परिग्रहकों परित्याग । अंतर ममता रहै न लाग ॥  
 आकिंचन यह धर्म महान । सिवपददायक निहचं जान ॥१४४॥  
 बड़ी नारि जननी सम जान । लघु पुत्री सम बहिन बखान ॥  
 तजि विकार मन बरते जेह । ब्रह्मचर्य परिपूरन एह ॥१४५॥

१. कोमल २. मद न करना ३. निष्कपट ४. लोभ रहितपना ५. इन्द्रियां ।

दोहा ।

सोलह कारन भावना, भावें मुनि आनंद ।

तिनको नाम सरूप कछु, लिखौ सकल सुखकंद ॥ १४६ ॥

चौपई ।

आठ दोष मद आठ मलोन । छै अनायतन सठता<sup>१</sup> तीन ॥

ये पचीस मलवरजित होय । दर्सनमुद्धि कहावें सोय ॥ १४७ ॥

रत्नत्रयधारी मुनिराय । दर्सनग्यानचरितसमुदाय ॥

इनकी विनयविषै परवीन । तृतीयभावना सो अमलीन ॥ १४८ ॥

सोलभार धारं समचेत । सहस अठारह अंग समेत ॥

अतीचार नहिं लागे जहां । तृतीय भावना कहिये तहां ॥ १४९ ॥

आगमकथित अर्थ अवधार । जथासकति निजबुधि अनुसार ॥

करे निरंतर ज्ञान अभ्यास । तुरिय भावना कहिये तास ॥ १५० ॥

दोहा ।

धर्म धर्मके फलविषै, बरतें प्रीति विसेख ।

यही भावना पंचमी, लिखौ जिनागम देख ॥ १५१ ॥

चौपई ।

श्रोषधि अभय ग्यान आहार । महादान यह चार प्रकार ॥

सक्तिसमान सदा निरख है<sup>२</sup> । छठी भावनाधारक वहै ॥ १५२ ॥

अनसन आदि मुक्तिदातार । उत्तम तप बारह परकार ॥

बल अनुसार करे जो कोय । सो सातमी भावना होय ॥

जती-<sup>३</sup>वर्गको कारन पाय । विघन होत जो करे सहाय ॥

- साधुसमाधि कहावै सोय । यही भावना अष्टम होय ॥१५४॥  
दसबिध साधु जिनागम कहे । पथे पीड़ित रोगादिक गहे ॥  
तिनकी जो सेवा सतकार । यही भावना नौमी सार ॥१५५॥  
परमपूज्य आतम अरहंत । अतुल अनंत चतुष्टयवंत ॥  
तिनकी श्रुति नति<sup>२</sup> पूजा भाव । दसम भावना भवजल-नाव ।  
जिनवरकथित अर्थ अवधार । रचना करे अनेक प्रकार ॥  
आचारजकी भक्तिविधान । एकादसम भावना जान ॥१५७॥  
विद्यादायक विद्यालीन । गुणगरिष्ठ पाठक<sup>३</sup> परवीन ॥  
तिनके चरन सदा चित रहै । बहुश्रुतिभक्ति बारमी यहै ॥१५८॥  
भगवतभाषित अर्थ अनूप । गनधरग्रंथित ग्रंथसरूप ॥  
तहां भक्ति बरतै अमलान । प्रवचनभक्ति तेरमी जान ॥१५९॥  
षट आवश्यक क्रिया विधान । तिनकी कबही करे न हान ॥  
सावधान बरतै थिरचित्त । सो चौदहमी परमपवित्त ॥१६०॥  
करि जप तप पूजा व्रत भाव । प्रगट करे जिनधर्मप्रभाव ॥  
सोई मारग परभावना । यहै पंचदसमी भावना ॥१६१॥  
चार प्रकार संघसौं प्रीति । राखै गाय-बच्छको रोति ॥  
यही सोलमी सबसुखदाय । प्रवचनवात्सल्य अभिधाय<sup>४</sup> ॥१६२॥

दोहा

सोलहकारन भावना, परम पुन्यकौ खेत ।

भिन्न भिन्न अरु सोलहों, तीर्थकरपद हेत ॥१६४॥

बंधप्रकृति जिनमतविषै, कही एकसौ बीस ।

सौ सत्रह मिथ्यातमें, बांधत है निसदीस ॥१६४॥

तीर्थकर आहार<sup>१</sup>-दुक, तीन प्रकृति ये जान ॥

इनकी बंध मिथ्यातमें, कह्यौ नहीं भगवान ॥१६५॥

तातें तीर्थकर प्रकृति, तीनों समकितमाहि ॥

सोलह कारनसौ बंध, सबकौ निहचै नाहि । १६६॥

सोरठा ।

पूज्यपाद मुनिराय, श्रीसरवारथसिद्धि में ।

कह्यौ कथन इहि भाय, देखि लीजियो सुबुधिजन । १६७॥

कुमुलता

सोलह कारन ये भवतारन, सुमरत पावन होय हियो ।

भावें श्रीआनन्दमहामुनि, तीर्थकरपदबंध कियो ॥१६८॥

काय कषाय करी कृस<sup>२</sup> प्रति ही, सत संजम गुण पोढ<sup>३</sup> कियो ।

तपबल नाना रिद्धि उपन्नी, राग विरोध निवार दियो ॥

जिस बन जोग धरें जोगेसर, तिस बनकी सब विपत टलें ।

पानी भरहि सरोवर सूखे, सब रितुके फलफूल फलें । १७०॥

सिहादिक जे जातविरोधी, ते सब बंरी बंर तजें ।

हंस भुजंगम मोर मंजारी<sup>४</sup>, आपसमें मिलि प्रीति भजें । १७१॥

सौहें साधु चढ़े समतारथ, परमारथ पथ गमन करें ।

सिवपुर पहुंचनकी उर बांछ्या, और न कछु चित चाह धरें ॥

देहविरक्त ममत्तबिना मुनि, सबसौं मंत्रो भाव बहैं ।

आतमलोन अदीन<sup>५</sup> अनाकुल, गुन वरनत नहि पार लहै ॥

१. आहारक. आहारक मिश्र २. दुबल ३. प्रीति-मजबूत ४. बिल्ली

५. दीनता के भाव बिना ।

एक दिना ते छीर बनांतर, ठाड़े मुनि वैराग भरे ।  
 पौनपरीषहसौं नहिं कांपैं, मेहसिखर ज्यों अचल खरे । १७४।  
 सो मर नरक कमठचर पापी, नानाभांति विपत्ति भरी ।  
 तिसही काननमें विकटानन<sup>१</sup>, पंचानन<sup>२</sup>की देह धरी । १७५।  
 देखि दिगंबर केहरि<sup>३</sup> कोप्यौ पूर्वभवांतर बंदह्यौ ।  
 धायौ दुष्ट दहाड़ ततच्छन, आन अचानक कंठ गह्यौ । १७६।  
 तीखे नखन विदारैं काया, हाथ कठोरन खंड करै ।  
 बांकी दाढ़नसौं तन भेदै, बदन<sup>४</sup> भयानक ग्रास भरै । १७७।  
 यों पसुकृत परचंड परीषह, समभावनसौं साधु सही ॥  
 क्रोध विरोध हिये नहिं आन्यो, परमछिमा उरमांभ बही ।  
 धनि धनि श्रीआनन्दपुनीसुर, धनि यह धोरजभाव भजे ॥  
 ऐसे घोर उपद्रवमें जिन, जोगजुगतसौं प्राण तजे । १७८।  
 अंतसमयपरजंत तपोधन, सुभभावनसौं नाहिं चये ।  
 आनत नाम स्वर्गमें स्वामी, सुरगनपूजित इन्द्र भये । १८०।

दोहा ।

सुरगलोक बरनन लिखों, जथासकति सुखरीत ।  
 धर्म धर्म के फलविषे, ज्यों मन उपजं प्रीत ॥ १८१ ॥

चौपई ।

चंदकांति मूंगामनिमई । नानावरन भूमि बरनई ॥  
 रातदिवसको भेद न जहां । रतनउदोत निरंतर तहां । १८२।  
 मनि कंगुरे कंचन प्राकार । श्रौंडी परिखा<sup>५</sup> ऊंचे द्वार ॥

१. गयंकर मुख वासे २. सिंह ३. सिंह ४. मुख ५. लाई ।

तोरन तुंग रतनगृह लसं । ऐसे सुरगलोकपुर बसं । १८२।  
 चंपक पारिजात मंदार । फूलन फैल रही महकार ॥  
 चेतबिरछतं बड़घो सुहाग<sup>१</sup> । ऐसे सुरग रवाने<sup>२</sup> बाग । १८४।  
 बिपुल<sup>३</sup> बापिका<sup>४</sup> राजे खरीं । निर्मल नीर सुधामय भरिं ॥  
 कंचनकमलछई छबिबान । मानिकखंडखचित सोपान ॥ १८५।  
 कामधेनु सोहैं सब गाय । कलपवृच्छ सबही तरुराय ॥  
 रतनजाति चितामनि सबै । उपमा कौन सुरगकौं फबै । १८६।  
 गान करे कहि सुरसुन्दरीं । बन-बीथिन<sup>५</sup> बंठी रसभरीं ॥  
 कहीं देवगन वनितासंग । लीलाबन विचरें मनरंग ॥ १८७॥  
 मंद सुगंधि बहै नित वाय । पहुपरेंनुरंजित<sup>६</sup> सुखदाय ॥  
 आंधी मेह न कबहीं होय । ताप तुसार<sup>७</sup> न व्यापै कोय । १८८।  
 रितुकी रीति फिरै नहि कदा । सोमकाल सुखदायक सदा ।  
 छत्रभंग चोरी उतपात । सुपने नहीं उपद्रवजात ॥ १८९॥  
 ईति भोति भूचाल न होय । बंरी दुष्ट न दीसै कोय ॥  
 रोगी दोखी दुखिया दीन । बिरधवंस<sup>८</sup> गुणसंपतिहीन । १९०।  
 बढ़ती अंगविकलता कहीं । ये सब सुरगलोकमें नहीं ॥  
 सहज सोम सुन्दर सरवंग । सब आभरनअलंकृत अंग । १९१।  
 लच्छनलंछित सुरभि सरीर । रिद्ध-सिद्धमंदिर मनधीर ॥  
 कामसरूपो आनंदकंद । कामिनिनेत्रकमलिनीचंद ॥ १९२॥  
 बदन प्रसन्न प्रीतरस भरे । विनयबुद्धि विद्या आगरे ॥

१. सौन्दर्य २. सुन्दर ३. घनी ४. बावड़ी ५. गली ६. पुष्प पराग से  
 अनुरजित ७. पाला ८. बुढापा ।

यों बहुगुणमंडित स्वयमेव । ऐसे सुरगनिवासी देव ॥१६३॥

दोहा ।

ललितवचन लीलावती, सुभलच्छन सुकुमाल ।

सहजसुगंध सुहावनी, जथा मालती माल ॥१६४॥

सीलरूप लावन्यनिधि, हावभावरसलीन ।

सीमा सुभर्गासिगारकी, सकलकलापरवीन ॥१६५॥

निरत गीत संगीत सुर, सब रसरीतमँभार ॥

कोविद' होंहि सुभावतं, सुरगलोको नार ॥१६६॥

पंचइन्द्रि मनकोँ महा, जे जगमें सुखहेत ।

तिन सबहीकी जानियौ, सुरगलोकसंकेत ॥१६७॥

चौपई ।

इत्यादिक बहुसंपत्तिथान । देवलोकमहिमा असमान<sup>२</sup> ॥

आनतवर<sup>३</sup> विमान है जहां । धरचौँ जनम सुरपतिने तहां ॥

दोहा ।

उपज्यौ संपुट<sup>४</sup> गर्भतें, तेज पुंज अति चंड ।

मानों जलधरपटलतें, प्रगट्यौ दामिनि<sup>५</sup>-दंड ॥१६८॥

एक महूरतमें तहां, संपूरन तन धार ।

किधौँ रतनकी सेज तजि, सोवत उठ्यौ कुमार ॥२००॥

मनिकिरीट माथे दिपें, आनन अधिकसुरूप ।

कानन कुण्डल जगमगें, पानन कटक अनूप ॥२०१॥

भुजभूषनभूषित भुजा, हिये हार छबि देत ।

१. बुद्धिमान २. समानता रहित ३. तेरहवाँ स्वर्ग ४. उत्पाद प्रीया ५. बिजली



अंग अंग इत्यादि बहु, सब आभरनसमेत ॥२०२॥

चौपई ।

सनै सनै देखै दिस सही । लोचनकोर कान लगि रही ॥  
 विसमयवंत होय मन ताम । कहै कौन आयौ किस धाम ॥  
 अहो कौन यह उत्तम देस । सकलसंपदाथान विसेस ॥  
 कंचनके मन्दिर मनिजरे । दीसैं दिव्य अपद्धराभरे ॥२०४॥  
 अति उतंग<sup>१</sup> अति ही दुति धरै । मध्य सभा मंडप मनहरै ॥  
 सिंहासन अद्भुत इहि ठाम । मानौं मेरुसिखर अभिराम ॥  
 अनुपम नाटक देखनजोग । श्रवणसुखद ये गीत मनोग ॥  
 ये लावन्यवतीं ब्ररनारि । रूपजलधिबेला<sup>२</sup> उनहारि ॥२०६॥  
 ये उतंग हाथी मदभरे । तेज तुरंगनके गन खरे ॥  
 कंचनरथ पायकदल<sup>३</sup> जेह । मो प्रति सिर नावें सब येह ॥२०७॥  
 सब आनन्द भरे मुझ देख । सब विनीत सब सुन्दर भेख ॥  
 जयजयकार करैं विहँसाय । कारन कछु जान्यौ नहिं जाय ॥

दोहा ।

इन्द्रजाल अथवा सुपन, कं माया भ्रम कोय ।

यों सुरेस सोचै हिये, पं निरनय नहिं होय ॥२०८॥

चौपई ।

तब तिस थानक देव प्रधान । मनकी बात श्रवधिसौं जान ॥  
 जोगवचन बोलै सिरनाथ । संसयहरन लखनसुखदाय ॥२१०॥  
 हम विनती सुनिये सुरराज । जीवन जनम सफल सब आज ।

अब सनाथ स्वामी हम भये । जनमजोगतें पावन थये ॥२१॥  
 सूरजउदय कमलिनी-बाग । विकसै जथा जग्यौ सिर भाग ।  
 नन्दवधं<sup>१</sup> हम देहिं असीस । चिर यह राज करौ सुरईस ॥२१॥  
 अहो नाथ यह उत्तम ठाम । सुरग तेरमो आनत नाम ॥  
 जगतसार लछ्मीकौ येह । निरुपमभोग निरंतर गेह ॥२१॥  
 तुम इहि थान इन्द्र अवतरे । पूर्वजन्म दुद्धर तप धरे ॥  
 ये सब सुर<sup>२</sup> सेवक तुमतनें । ये परिवार लोक हैं घनें ॥२१॥  
 सोरठा ।

ये मनोग वनिता मंडली । तुम आदेस चहै मनरली ॥  
 ये पटदेवी<sup>३</sup> लावनखान<sup>३</sup> । सब देवीं इन मानें आन ॥२१॥  
 ये विमान पुर महल उतंग । चमर छत्र सेना सप्तंग ॥  
 धुजासिहासनआदि मनोग । सकल सम्पदा यह तुम जोग ॥२१॥  
 ऐसे वचन अनन्तर<sup>४</sup> तबै । जान्यौ इन्द्र अवधिबल सबै ॥  
 मैं पूरव कीनों तप घोर । दंडे करम धरमधनचोर ॥२१॥  
 जीवजातकौं निर्भयदान । दीनों आप बराबर जान ॥  
 सब उपसर्ग सहे धरि धीर । जीत्यौ महारागरिपु वीर ॥२१॥  
 काम विषम बैरी बस कियो । अरु कषाय बनकौं जारियो ॥  
 जिनवरआन अखंडित पोष । चारित-चिर-पाल्यौ-निरदोष ॥२१॥  
 इहि विध सेयौ धर्म महान । तिस प्रभाव दीखै यह थान ॥  
 दुरगतिपात निवारन करौ । तिन मुझ इन्द्रलोक ले धरौ ॥२१॥  
 सो अब सुलभ नहीं इस देह । भोग जोग है थानक येह ॥

१. आनन्द पूर्वक बहना २. प्रमुखदेवी=इन्द्राणी ३. लावण्य से भरपूर ४. पश्चात्

रागआग दुखदायक सदा । चारितजल बिन बुझै न कदा ॥  
 सो कारन सुरगतिमें नाहि । द्रतकौ उदय न या पदमाहि ॥  
 ह्यां सम्यक्दरसन अधिकार । संकादिक मलवरजित सार २२२  
 कै जिनवरको भक्ति सहाय । और न दीखै धर्मउपाय ॥  
 यह विचारि जिनपूजनहेत । उठ्यौ इन्द्र परिवारसमेत । २२३।  
 अमृतवापिकामें करि न्हौन । गयौ जहां मनिमय जिनभौन ॥  
 रतनबिम्ब बन्दे विहसाय । भावभगतसौं सीस नवाय । २२४।  
 पूजा करी दरब धरि आठ । पुलकितअंग पढ़्यौ श्रुतिपाठ<sup>१</sup> ।  
 चैतबिरछजिनप्रतिमा जहां । महामहोच्छ्रव कीनों तहां । २२५  
 यों बहु पुन्य उपायो सही । फेरि आय निज सम्पति गही ॥  
 दिव्यभोग भुंजे बड़भाग । लोकोत्तम जिस सहजसुहाग । २२६।  
 सोभनरूप<sup>२</sup> प्रथम संठान<sup>३</sup> । वसु<sup>४</sup>बैक्रियक सुलच्छनवान ॥  
 कोमल सुरभि सच्चिक्लन देह । सातघातवरजित गुनगेह । २२७।  
 पलकपात लोचनमें नहीं । मलपसेव नख केस न कहीं ॥  
 जरा कलेस न चिंता सोग । नाहीं अल्प मृत्युभय रोग । २२८  
 इत्यादिक दुखजोग अनेक । तिनमें नहीं अमरके एक ॥  
 आठरिद्वि अनिमादि पसत्थ<sup>५</sup> । तिसबल सकलकाज समरत्थ ।  
 सुरग लोकके सुखकी कथा । कहै कहां लौं बुधबल जथा ॥  
 बैठि मनोगत विमल विमान । विचरै नभपथ वांछितथान ॥  
 कबही मेरु जिनालय गमै । कबही आन कुलाचल रमै ॥  
 दीप समुद्र असंख अपार । करै सुरेंद्र सुखंद विहार ॥ २३१ ॥

१. श्रुति २. सुन्दर ३. समचतुरस्र संस्थान ४. आठ ५. प्रयास्त=उत्तम ।

वर्ष वर्षमें हर्ष बढ़ाय । तीन बार नन्दीसुर जाय ॥  
 पंचकल्याणक समयसुजोग । करै तीर्थपदनमन नियोग । २३२  
 और केवली प्रभुके पाय । दोय कल्याणक पूज आय ॥  
 निज कोठे थिर होय सुग्यान । करै दिव्यवानीरसपान । २३३  
 सभासिंहासन बैठि सुरेस । देय सुरनप्रति हितउपदेस ॥  
 करै तत्त्ववरनन विस्तार । अनेकांतवानी अनुसार ॥ २३३ ॥  
 जे सुर सम्यक्दरसनहीन । तपबल देव भये सुखलीन ॥  
 तिनप्रति धर्मवचन उच्चरै । दरसनगुणकी प्रापति करै ॥ २३५ ॥  
 इहबिध बिबिध करै सुभकाज । महापुन्य संचै सुरराज ॥  
 दरसनग्यान रतनभंडार । चारित गुणकौ नहि अधिकार । २३६ ॥  
 धर्मवासनावासित जोग । करै पुनीत<sup>१</sup> पुन्यफलभोग ॥  
 कबहीं सुनै अपछरा-गान । निरखै नाटक निरुपम थान । २३७ ॥  
 कबहीं सुभ सिंगाररसलीन । हाव भाव जोवै<sup>२</sup> परवीन ॥  
 कबहीं हास्यकथा विस्तरै । वनक्रीड़ा देविन संग करै । २३८ ॥  
 यौ नानाबिध करत विलास । प्रतिदिन सुखसागरमें वास ॥  
 साढ़े तीन हाथ परवान । दिव्यसरीर अतुल दुतिवान । २३९ ॥  
 सागर बीस परमथिति<sup>३</sup> जास । तीस पच्छ<sup>४</sup> पर लेय उसास ॥  
 बीसहजार वर्ष अवसान<sup>५</sup> । मनसा भोजन करै महान । २४० ॥  
 पंचम पिरथी लौ जिस सही । अवधिसकति जिनसासन कही ।  
 तावत मान विक्रियाखेत । सकलकाज साधनसुख हेत । २४१ ॥

असंख्यात सुर सेवन पाय । देवोनेत्रकमलदिनराय ॥  
 यों पूरवकृत पुन्यसंजोग । करै इन्द्र इन्द्रासन भोग ॥२४२॥  
 दोहा ।

कहा इन्द्रअहमिद्र पद, जनम धरै फिर आय ॥  
 जैनधर्म नृपकी धुजा, लोक-सिखर फहराय ॥२४३॥

इति श्रीमत्पार्श्वपुराणभाषायां आनन्दरायइन्द्रपदप्राप्तिवर्णनं  
 नाम चतुर्थोऽधिकारः ।

### पाँचवाँ अधिकार ।

दोहा ।

बन्दौ पारसपदकमल, अमलबुद्धि वातार ॥  
 अब बरनों जिनराजके, पंच कल्याणक सार ॥१॥

चौपई

प्रथम अनंत अलोकाकास । दसौं दिसा मरजाद न जास ॥  
 दूजौ दरब जहां नहि और । सुन्न सरूप गगन सब ठौर ॥२॥  
 तहां अनादि लोकथिति जान । छीदे<sup>१</sup> पाँय पुरुष-संठान<sup>२</sup> ॥  
 कटिपै<sup>३</sup> हाथ सदा थिर रहै । यह सरूप जिनसासन कहै ॥३॥  
 पौन<sup>४</sup> पिंड<sup>५</sup> बेढ्यौ सरवंग । चौदह राजू गगन उतंग ॥  
 घनाकार राजू गन ईस । कहे तीन सौं तैंतालीस ॥ ४ ॥

१. पाँच फैलाये हुए २. पुरुष के आकार ३. कमर पर ४. हुवा ५. समूह ।

- जीवादिक छह दरब सदीब । तिनसों भरघो जथा घट घीब ।  
 स्वयंसिद्ध रचना यह बनी । ना इस करता हरता धनी ॥५॥
- दरब दृष्टिसों ध्रौव्यसरूप । परजयसौ उतपतछयरूप ॥  
 जंसे समुद सदा थिर लसै । लहर न्याय उपजै अरु नसं ॥६॥
- लोक<sup>१</sup>-नाड़ि तिस मध्य महान । चौदह राजू व्योम उचान ॥  
 राजूमित<sup>२</sup> चौड़ी चहुंपास । यह त्रसखेत जिनागम भास ॥७॥
- याके बाहर जंगम<sup>३</sup> जीब । समुदघात बिन नाहि सदीब ॥  
 तामें तीनों लोक बिसाल । ऊरध मध्य और पाताल ॥८॥
- सोलह स्वर्ग पटल बावन्न । नव ग्रीवक नव जान रबन्न ॥  
 अनुदिस और अनुत्तर येह । एक एक ही पटल गिनेह ॥९॥
- ये सब त्रसठ पटल बखान । सिद्धखेत सोहैं सिर धान ॥  
 ऊरध लोक बसं इहि भाय । उत्तम सुरथानक सुखदाय ॥१०॥
- अधोलोकमें बहु बिध भेव । सात नरक असुरादिक देव ॥  
 मध्यलोक पुनि तीजौ तहां । असंख्यात दीपोदधि जहां ॥११॥
- तिनमें सोभावंत सुहात । जंबूदीप जगतविख्यात ॥  
 लच्छ<sup>४</sup> महाजोजन विस्तार । सूरजमंडलकी उवहार ॥१२॥
- बज्रकोट जिस ओट अभंग<sup>५</sup> । परिमित जोजन आठ उतंग ॥  
 चारों दिस दरवाजे चार । तिनके नाम लिखौ अवधार<sup>६</sup> ॥१३॥
- विजय नाम पूरबमें जान । वैजयंत दच्छिन दिस ठान ॥  
 पच्छिम भाग जयंत दुवार । उत्तरमें अपराजित सार ॥१४॥

१. त्रस नाड़ी २. एक राजू प्रमाण ३. त्रस ४. एक लाख योजन ५. भेद  
 रहित ६. धारण करो ।

लवन-समुद्र खातिकारूप<sup>१</sup> । चहुंदिस बेड़चौ सजल सरूप ॥  
 तहां सुदरसन मेरु महान । मध्य भाग सोभा असमान ॥१५॥  
 प्रति उतंग लख जोजन सोय । रिजुविमान जा ऊपर होय ।  
 सब सैलनमें ऊंचो यहै । ग्रीव उठाय किधौं इम कहै ॥१६॥  
 करे कौन गिरि मेरी रीस<sup>२</sup> । जिनपति न्हौन होय मुझ सीस ।  
 चारों दिस चारों गजदंत । नील निषधसों लगे महंत ॥१७॥  
 छह कुलपर्वत बड़े विथार<sup>३</sup> । पूरब पच्छिम दीरघ सार ॥  
 आठ महागिरि दिगज नाम । मेरु निकट आठों दिस ठाम ॥१८॥  
 कनक<sup>४</sup> वरन सोलह बच्छार । महाविदेहविषं छबिसार ॥  
 कंचनगिरि दीस परवान । सीता सीतोदा तट थान ॥१९॥  
 कुरु भूमार्हि जनक गिरि चार । नील निषधके निकट निहार ।  
 चार नाभिगिरि मिथ्या नाहि । मध्यम जघनभोगभूमार्हि ॥२०॥  
 विजयारध पर्वत चौतीस । इतने ही वृषभाचल दीस ॥  
 ते मलेच्छमधिखंडनबिखें । चक्री जहां नांव निज लिखें ॥२१॥  
 यों गिरि दीपविषं बरनये । ग्यारह अधिक एक सौ भये ॥  
 भद्रसाल बन दोय सुबास । पूरब अपर<sup>५</sup> मेरुके पास ॥२२॥  
 दो तरु जंबू-संभलतनं । उत्तम भोगभूमिमें बनं ॥  
 छह द्रह बड़े कुलाचलसीस । पदमं महापदमादिक दीस ॥२३॥  
 बोंस सरोवर और सुनेह । सीता सीतोदामधि तेह ॥  
 उत्तम मध्यम जघन विसेस । भोगभूमि छह कही जिनेस ॥२४॥  
 महादेस चौतीस सुखेत । ऐरावत अरु भरत समेत ॥

१. खाई २. बराबरी ३. विस्तार ४. सोने जैसे रंग के ५. पश्चिम ।

इतनी ही नगरी परवान । आरजखंडमध्य थिर थान ॥२५॥  
 उपसमुद्रकी संख्या यही । कछु विनासिक कछु थिर सही ॥  
 पूरब दिस दो बाग महंत । देवारन्य दीपके अंत ॥ २६ ॥  
 ऐसे ही पच्छिम दिस दोय । भूतारन्य नाम तिन होय ॥  
 गंगादिक सरिता दसचार । चौसठ महा विदेहमभार ॥२७॥  
 बारह विपुल विभंगा जेह । महानदी नव्वै सब येह ॥  
 इतने ही सब कुंड महान । जहां तरंगिनि<sup>१</sup> उतरे आन ॥२८॥  
 सत्रह लाख सबन परिवार । सहस्रछानवै ऊपर धार ॥  
 यह सब जंबूदीपसमास । आगममें विस्तार प्रकास ॥२९॥  
 दोहा ।

यही कथन अंगनविषै, वरन्यौ गनधर ईस ।

तीनलाख पदमें सही, ऊपर सहस पचीस ॥३०॥

चौपई ।

यों अनेक रचना आधार । दीपराज राज अधिकार ॥  
 तहां मेरुके दच्छिन भाग । किधौ भूमितिय सुभग सुहाग ॥३१॥  
 भरतखंड छहखंड समेत । धनुषाकार विराजत खेत ।  
 तामें सबसुखधर्मनिवास । कासीदेश कुसलजनवास ॥३२॥  
 गांव खेट पुर पट्टन जहां । धन-कन भरे बसैं बहु तहां ॥  
 निवसैं नागर जैनी लोय । दयाधर्म पालैं सब कोय ॥३३॥  
 जिनमंदिर ऊंचे जिनमाहिं । नरनारी नित पूजन जाहिं ॥  
 पद पद पुरपंकित<sup>२</sup> पेखिये । उदवसथान<sup>३</sup> न कहि देखिये ॥३४॥

१. दूसरी नदी २. नगरों की पंक्ति ३. ऊजड़ भूमि ।



नीर अगाध नदी नित बहैं । जलचर जीव जहां नित रहैं ॥  
 मुनिजनभूषित जिनके तीर । काउसग<sup>१</sup> धरि ठाड़े धीर ॥३५॥  
 ऊचे परवत भरना भरें । मारग जात पथिक मन हरें ॥  
 जिनमें सदा कंदराथान<sup>२</sup> । निहचल देह धरें मुनि ध्यान ॥३६॥  
 जहां बड़े निर्जनवनजाल । जिनमें बहुविध बिरछ बिसाल ।  
 केला करपट कटहल कर । कैथ करोंदा कौच कनेर ॥३७॥  
 किरमाला कंकोल कल्हार । कमरख कंज कदम कचनार ॥  
 खिरनी खारक पिंडखजूर । खैर खिरहटी खेजड़ भूर ॥३८॥  
 अर्जुन अमली आम अनार । अगर अंजीर असोक अपार ॥  
 अरनी अँगो अरलू भने । ऊंवर अंड अरीठा घने ॥३९॥  
 पाकर पीपल पूग<sup>३</sup> प्रियंग । पीलू पाटल<sup>४</sup> पाढ़ पतंग ॥  
 गौंदी गुड़हल गूलर जान । गांडर<sup>५</sup> गुंजा<sup>६</sup> गोरख पान ॥४०॥  
 पंचा चौढ़ चिरोंजी फली । चंदन चोल चमेली भली ॥  
 जंड जंभीरी जामन कोट । नीम नारियल हीस हिगोट ॥४१॥  
 सौना सीसम सेंभल साल । सालर सिरस सदा फलजाल ॥  
 बांस बबूल बकायन बेर । बेत बहेड़ा बड़हल पेर ॥४२॥  
 महुआ मौलसिरी मचकुन्द । मरुवा मोखा करना कुन्द<sup>७</sup> ॥  
 तूत तबोलनि तींदू ताल । तगर तिलक तालीस तमाल ॥४३॥  
 इहि बिध रहे सरोवर छाये । सबही कहत कथा बढ़ जाये ।  
 तहां साधु एकांत विचार । करें पठनपाठनविधि सार ॥४४॥

विबिध सरोवर सीतल ठाम । पंथी बैठि लेहि बिसराम ॥  
 निर्मल नीर भरे मनहार । मानौं मुनिचित विगतविकार ।४५।  
 सोहैं सफल सालके<sup>१</sup> खेत । भये नम्र फलभारसमेत ॥  
 सज्जनजन ज्यों संपति पाय । छोड़ गुमान चलें सिर नाय ।४६।  
 केवलग्यानी करत विहार । जहां सदा सबसुखदातार ॥  
 आचारज चहुसंघसमेत । विहरमान भविजन हितहेत ॥४७॥  
 केई जहां महाव्रत लेहि । भवदुखवास जलांजलि देहि ॥  
 केई धीर उग्र तप करैं । ते अहिमिंद्र जाय अवतरैं ॥४८॥  
 केई भावकके व्रत पाल । अच्युत स्वर्ग बसैं चिरकाल ॥  
 केई कर जिनजग्य<sup>२</sup> विधान । पावें पुत्री<sup>३</sup> अमरविमान ।४९।  
 केई मुनिवरदानप्रभाव । भोगें भोगभूमिकी आव ॥  
 अतिपुनीत सब ही बिध देस । जहां जनम चाहैं अमरेस ॥५०॥  
 तहां बनारस नगरी बसैं । देखत सुरनरमन उल्हसैं ॥  
 है प्रसिद्ध घरनीपर सोय । तीरथराज कहैं सब कोय ॥५१॥  
 सोभा जाकी कहो न जाय । नाम लेत रसना<sup>४</sup> सुचि थाय ।  
 जहां सरोवर नाना भांति । जिनके तीर तरोवर पांति ।५२।  
 निजजीवन<sup>५</sup> जीवन सुख देहि । कमलसुवास सिलोमुख<sup>६</sup> लेहि  
 सोहैं सघन रवाने बाग । फले फूल फल बढ़चौ सुहाग ।५३।  
 सजल खातिका<sup>७</sup> राज खरी । उठें लहरि लोयन<sup>८</sup>-गति-हरी  
 कोट उतंग कांगुरे लसैं । मानौं सुरगलोक दिस हंसैं ॥५४॥

१. चावल २. जिनेन्द्र पूजन ३. पुण्यवान ४. जीम ५. पानी ६. मौरा  
 ७. खाई ८. नेत्र ।

ऊंचे महल मनोहर लगें । सुवरन कलस सिखर जगमगें ॥  
 अति उन्नत जिनमंदिर जहां । तिन महिमा वरनन बुध कहां ॥  
 रतनबिंब राजें जिहि माहि । सिखर सुरंग धुजा फहराहि ।  
 कंचनके उपकरण समाज । आर्वें भविजन पूजाकाज ॥५६॥  
 जय जय सब्दसहित छबि छजें । किधों धर्म-रतनायर' गजें ।  
 नगरनारि नित बंदन जाहि । जिनदरसनउच्छ्रव उरमाहि ॥५७॥  
 भूषनभूषित सुन्दर देह । मानों सुभग अपछरा येह ॥  
 सब गृहस्थ साधें षट कर्म । पालें प्रजा अहिंसा धर्म ॥५८॥  
 दोष अठारहवजित देव । तिस प्रभुकों पूजें बहु भेव ॥  
 चाह-चिहन<sup>१</sup>-वरजित जो धीर । सोई गुरु सेवें वरबीर ॥५९॥  
 आदि अंत जे विगत विरोध । तेई ग्रंथ सुनें मन सोध ॥  
 सत्य सील गुन पालें सदा । तातें लोग सुखी सर्वदा ॥६०॥

दोहा ।

प्रजा बनारस नगरकी, नागर नीत सुजान ॥  
 चार रतनके पारखी, लहिये घर घर थान ॥६१॥  
 देव धर्म गुरु ग्रंथ ये, बड़े रतन संसार ।  
 इनकों परखि प्रमानिये, यह नर-भव-फल सार ॥६२॥  
 जे इनकी जानें परख, ते जग लोचनवान ।  
 जिनकों यह सुधि ना परो, ते नर अंध अजान ॥६३॥  
 लोचनहीन पुरुषकों, अंध न कहिये भूल ॥  
 उर लोचन जिनके मुँदे, ते आंधे निमूल ॥६४॥

चौपई ।

इहि बिध नगर बसै बहु भाय । सब सोभा बरनी नहि जाय ।  
 अस्वसेन भूपति बड़भाग । राज करे तहां अतुल सुहाग ।६५।  
 कासिपगोत्र जगतपरसंस । बंस-इरुवाक-विमल-सर-हंस ॥  
 तेजवंत दिनपति<sup>१</sup> ज्यों दिपै । प्रभुता देखि सचीपति<sup>२</sup> छिपै ।६६।  
 कलपतरोवर सम दातार । रतिपति<sup>३</sup> लाजें रूप निहार ॥  
 रयनायर<sup>४</sup> सम अति गंभीर । पर्वतराज बराबर धीर ॥६७॥  
 सोम समान सबनि सुखदाय । कीरति-किरन रही जग छाय ।  
 तीन ग्यानसंजुगत सुजान । परम विवेकी दयानिधान ॥६७॥  
 जिनपदभक्ति धर्म-धन-वास । गुरुसेवारति नीतिनिवास ॥  
 कला-चातुरी-बुधि-विज्ञान । विद्या-विनय-संपदा-थान ॥६९।  
 सकलसारगुणामानिककोष । उभयपच्छ निर्मल निर्दोष ॥  
 जिनसूरजउदयाचल राय । तिस महिमा बरनी किमि जाय।७०।  
 वामादेवी नाम पवित्त । तिनके घर रानी सुभ चित्त ॥  
 निरुपम लावन सबगुनभरी । रूपजलधिबेला<sup>५</sup> अबतरी॥७१॥  
 नखसिख सहज सुहागिनि नार । तीनलोकतियतिलक सिंगार  
 सकल सुलच्छनमंडित देह । भाषा मधुर भारती<sup>६</sup> येह ।७२।  
 रंभा रति जिस आगे दीन । रोहिनिरूप लगें छबि छीन ।  
 इन्द्रबधू<sup>७</sup> इमि दीसैं सोय । रविदुति<sup>८</sup> आगे दीपकलोय ।७३।  
 जनमनहरषबढ़ावन एम । कातिक-चंद्र-चंद्रिका<sup>९</sup> जेम ॥

१. सूर्य २. इन्द्र ३. कामदेव ४. रत्नाकर ५. सीमा ६. भारत की  
 ७. इन्द्राणी ८. सूर्य का प्रकाश ९. चांदनी ।

सकल सार गुणमनिकी खानि । सीलसंपदाकी निधि जानि ॥७४॥  
 सज्जनताकी अवधि अनूप । कला सुबुधिकी सीमारूप ॥  
 नाम लेत अघ तर्ज समीप । महापुरुष-मुक्ताफल-सीप ॥७५॥  
 त्रिभुवननाथ रत्नकी मही । बुधिबल महिमा जाय न कही ।  
 बहुबिध दंपति संपतिजोग । करं पुनीत पुन्यफलभोग ॥७६॥

उक्तं च षट्पाहुडयन्थे—आर्या

तित्थयरा<sup>१</sup> तप्पियरा<sup>२</sup> हलहर<sup>३</sup> चक्राई<sup>४</sup> वासदेवाई<sup>५</sup> ।  
 पडिबास<sup>६</sup> भोगभूमिय<sup>७</sup> आहारो<sup>८</sup> रात्थि<sup>९</sup> एीहारो<sup>१०</sup> ॥७७॥  
 चौपई ।

जिनवर जिनमाता जिनतात । वासदेव बलदेव विख्यात ॥  
 चक्रीराय जुगलिया जोय । इन सबके मल मूत्र न होय ॥७८॥  
 दोहा ।

पूरब गाथाकी अरथ, लिख्यौ चौपई लाय ॥  
 षट् पाहुडटीकाविषे, देख लेहु इहि भाय ॥७९॥

चौपई ।

अब आगे भबिजन मन थंभ । सुनो गर्भमंगलआनन्द ॥  
 एक दिना सौधर्म सुरेस । घनपति<sup>११</sup> प्रति दोनो उपदेस ॥८०॥

१. तीर्थङ्कर २. माता पिता ३. बलदेव ४. चक्रवर्ती ५. नारायण ६. प्रति-  
 नारायण ७. भोगभूमियो ८. भोजन ९. नहीं होते १०. मल मूत्र त्याग  
 ११. कुबेर ।

आनन्दकी धितिमें सही । आयु छ मास शेष सब रही ॥  
 तेबीसम अवतार महान । होसी नगर बनारस-थान ॥८१॥  
 अस्वसेन भूपतिके धाम । पंचाचरज<sup>१</sup> करी अभिराम ॥  
 यह सुरेन्द्रने आज्ञा करी । सौ कुवेर निज मार्यं घरी ॥८२॥  
 चलयौ तुरत लाई नहिं बार । सोहै संग अमर-परिवार ॥  
 हरषित अंग पिता घर आय । करी रतन-वर्षा बहुभाय ॥८३॥  
 जिनके तेज तिमिर नहिं रहै । नाना वरन प्रभा लहलहै ।  
 ऐसे निर्मालक<sup>२</sup> नग<sup>३</sup> भूर<sup>४</sup> । बरसे नृपके आंगन पूर ॥८४॥

दोहा ।

नभसौं आवै झलकती, मनिधारा इहि माय ॥

सुरगलोक-लछ्मी किधौं, सेवन उतरी माय ॥८५॥

चोपई ।

साढ़े तीन कोड़ परवान । यौं नित बरसें रतन महान ॥  
 सुरभि सुगंध कलपतरुफूल । बरसावें सुर आनन्दमूल ॥८६॥  
 गंधोदककी बरसा करे । मानौं मुकताफल अवतरें ॥  
 प्रतिदिन देव-दुन्दुभी बजें । किधौं महासागर यह गजें ॥८७॥  
 नंद वरद जय जय उच्चरें । मात पिता प्रति सुर यौं करे ॥  
 इहि विध पंचाचरज विलोक । जंती भये मिथ्याती लोक ॥८८॥

दोहा ।

देवन किये छ मास लौं, पंचाचरज अनूप ॥

देखि देखि परजा भई, आनन्द अचरजरूप ॥८९॥

१. पांच आपचर्य (मंद सुगन्ध हवा, गंधोदक वृष्टि, पुष्पवृष्टि, दुन्दुभि बाज जयघोष) २. अमूल्य ३. रतन ४. बहुत ।

चौपई ।

यों अतिआनंदसों दिन जाहि । माता मगन सुखोदधि<sup>१</sup>माहि ।  
मानिकजटित मनोहर धाम । रत्नपलंक सेज अभिराम । ६०।  
मनिमय दीप जहां जगमगें । अति सुगन्ध आबत अलि पगें ।  
करि चतुर्थ आनन्द<sup>२</sup>-सनानि । करे सयन जननी सुख मानि । ६१  
पच्छिम<sup>३</sup> रैन रही जब आय । सोलह सुपन देखे माय ॥  
तिनके नाम लिखौ अवलोक्य । पढ़त सुनत पातक छय होय । ६२

पढ़ड़ी

सुपनाबलि सोलह सुनहु मीत । जिनराजजनमसूचक पुनीत ।  
ऐराबत हाथी प्रथम दीस । मदगोलो गंड<sup>४</sup> विसाल सीस । ६३।  
देख्यौ डक्कारत<sup>५</sup> वृषभराज<sup>६</sup> । अतिउज्जल मोतीबरन<sup>७</sup> भ्राज<sup>८</sup> ।  
देख्यौ पंचानन<sup>९</sup> घवलदेह<sup>१०</sup> । निज नाद करे ज्यों सरद-मेह । ६४  
देख्यौ मनिआसनसोभमान । तहं हेमकलस कमला<sup>११</sup>-सनान ॥  
देखी दो पावन पहुपमाल<sup>१२</sup> । भ्रमरावलि-बेड़ी अतिविसाल ६५  
रविमंडल देख्यौ तम दलंत । उदयाचल ऊपर उदयवंत ॥  
संपूरन तारापति<sup>१३</sup>-विमान । तारावलि-मध्य विराजमान । ६६  
जलतिरत मनोहर मीन<sup>१४</sup>-जोट । देखे जिन-जननी पलकओट ।  
देखे चामीकरकलस<sup>१५</sup> दोय । अति भूलकें वारिजढके सोय ६७

१. सुख-समुद्र २. रजो दर्शन के चतुर्थ दिन का स्नान ३. रात्रि की अन्तिम प्रहर ४. गाल ५. उच्च स्वर से बोलता हुआ ६. बैल ७. सफेद ८. शोभा दे ९. सिंह १०. सफेद शरीर वाला ११. सक्ष्मी १२. पुष्पमाला १३. चन्द्रमा १४. मछली का जोड़ा १५. स्वर्णकलश ।

देख्यौ कमलाकर कमलछद्म । बहु हंसी हंसनसौं रवन्न ॥  
 देख्यौ रयनायर<sup>१</sup> गर्जमान । पुनि सिंहपीठ<sup>२</sup> मानिकनिधान । ६  
 फिर देख्यौ देव-विमान जोग । ध्रुज घंटा भालरसौं मनोग ।  
 प्रगट्यौ महि फोरि फनींद्रधाम<sup>३</sup> । मनि कंचनमय नयनाभिराम<sup>४</sup>  
 पुनि रतनरासि देखी अनूप । इन्द्रायुधवरन<sup>५</sup> विचित्ररूप ॥  
 निर्धूम<sup>६</sup> धनंजय<sup>७</sup> दीपमान । ये देखे सोलह सुपन जान । १००

दोहा ।

गजप्रवेश मुखकमलमें, सुपनअंत अविलोय ॥  
 सुखनिद्रा पूरी भई, भयौ प्रात तम खोय ॥१०१॥  
 पूर्व दिवाकर<sup>८</sup> ऊग्यौ, गयौ तिमिर सुखदाय ॥  
 जैसे जैनसिधांत सुनि, भरमभाव मिट जाय ॥१०२॥  
 मंद तेज तारे भये, कछु दीखं कछु नाहि ।  
 ज्यों तीर्थकरके उदय, पाखंडी छिप जाहि ॥१०३॥  
 सूरजवंसी जे कमल, खिले सरोवरमाहि ।  
 ज्यों जिनबिब विलोकिकं, भविलोचन विकसाहि । १०४  
 चंदविकासी कमल जे, विकसत भये न सोय ।  
 ज्यों अजान जिनवचन सुनि, मुदित मूल नहि होय । १०५  
 चक्रवाक<sup>९</sup> हरखित भये, ज्यों जिनमत-संजोग ।  
 जीव सुमति पिय-नारिकौ, मित्यौ अनादिवियोग । १०६  
 घूघूगरा<sup>१०</sup> भूतलविषै, आधे भये असूक्त ।

१. समुद्र २. सिंहासन ३. धरणेन्द्र विमान ४. सुन्दर ५. इन्द्र धनुष के रंग का ६. धूम रहित ७. अग्नि ८. सूर्य ९. चक्रवा १०. उल्लू ।



जैनग्रन्थके रहसमें, ज्यों परमती अबूझ ॥१०७॥  
 कमलकोष मधुकर बंधे, छुटे जग्यौ सिर-भाग ।  
 जया जीव जिनधर्मसों, मुक्त होय भवत्याग ॥१०८॥  
 पथिक लोग मारग चले, सूझे घाट कुघाट ।  
 जिनधुनि सुनि सूझे जथा, सुरग मुकतिकी बाट ॥१०९॥  
 इहि विध भयौ प्रभात सुभ, आनन्द भयौ अतीव ॥  
 धर्मध्यान आराधना, करन लगे भवि जीव ॥११०॥  
 जिनजननी रोमांच तन, जगी मुदित मुख जान ।  
 किधौ<sup>२</sup> सकटक कमलिनी, विकसी निसि अवसान ॥१११॥  
 मंगलीक वाजित्र<sup>३</sup> धुनि, सुनि बंदीजन-गान ।  
 उठी सेज तजि सुखभरी, धरघौ हियें सुभ ध्यान ॥११२॥  
 सामायिकविध आदरी, पंच परमपदलीन ।  
 और उचित आचार सब, स्नान-विलेपन कीन ॥११३॥  
 पहरे सुभ आभरन तन, सुन्दर वसन<sup>४</sup> सुरंग ।  
 कलपवेल जंगम<sup>५</sup> किधौ, चली सखीजन संग ॥११४॥  
 राजसिंहासन भूप तब, बंठे सभा-सुथान ।  
 देवी आवत देखकं, कियौ उचित सनमान ॥११५॥  
 अर्धासन बंठनि दियौ, जोग वचन मुख भास ।  
 यों शानी विकसत वदन, बंठी भूपति पास ॥११६॥  
 सभालोग तारे विविध, भूपति चांद सरूप ।

श्रीवामादेवी तहां, दिपं चन्द्रिकारूप ॥११७॥  
 स्वामी सोलह सुपन हम, देखे पच्छिम रैन ।  
 श्रीमुखतें इनको सुफल, कहौ श्रवनसुखदेन ॥११८॥  
 अस्वसेन भूपाल तब, बोले अवधि विचार ।  
 एकचित्त करि देवि तुम, सुनो सुपनफल सार ॥११९॥

चीफई ।

धुरि<sup>१</sup> गजेंद्रवरसनतें जान । होसी जगपति पुत्र प्रधान ॥  
 महावृषभ पुनि देख्यौ सोय । जगजेठो<sup>२</sup> नंदन तुम होय । १२०॥  
 सेत सिंह-दरसनफल भास । अतुल अनंती सकति-निवास ॥  
 कमलामज्जनतें<sup>३</sup> सुरईस । करे न्हौन कनकाचलसीस ॥१२१॥  
 पट्टपदाम<sup>४</sup> दो देखी सार । तिसफल दुबिध धर्मदातार ।  
 ससितें सकल लोकसुखदाय । तेजपुंज सूरजतें थाय । १२२॥  
 मीन जुगलतें सब सुखभाज । कुंभविलोकनतें निधिराज ॥  
 सरवरतें सब लच्छनवान । सागरतें गंभीर महान ॥१२३॥  
 सिंहपीठतें मृगलोचनी<sup>५</sup> । होय बाल तुम त्रिभुवनधनी ॥  
 सुरविमान देख्यौ सुख पाय । सुरगलोकतें उपजं आय । १२४॥  
 नागराज<sup>६</sup>-गृहकौ सुन हेत । जनमं मतिश्रुतिअवधिसमेत ।  
 रतनरासिसें गुन-मनि-खान । कर्मदहन पावकतें जान । १२५॥  
 गजप्रवेश जो वदनमभार<sup>७</sup> । सुपन-अंत देख्यौ वरनार<sup>८</sup> ॥  
 श्रीपारसजिन जगतप्रधान । गर्भं तुम्हारे उतरे आन । १२६॥

१. ध्रुव रूप से २. जगज्ज्येष्ठ ३. स्नान ४. माला ५. हरिणी से नेत्र वाली ६. वरणेन्द्र ७. मुख में ८. हे उत्तम स्त्री ।

दोहा ।

सुनि वामादे सुपनफल, रोमांचित तन भूर ।

सुवचन-जल सींचत किधौं, उगे हरष अंकुर ॥१२७॥

चोपई ।

अब सौधर्म सुरेस विचार । स्वामिगर्भअवसर निरधार ॥

कुलगिरि<sup>१</sup>-कमलवासिनी जेह । श्रीआदिक देवी गुनगेह ॥१२८॥

तिन्हैं बुलाय कह्यौ सुभ भाव । अस्वसेन भूपति घर जाव ॥

वामादेवीके उरथान । तेवीसम जिन उतरे आन ॥१२९॥

तिनकी गर्भसौधना करो । निज नियोगसेवा मन धरो ॥

यह सुनि सब आनन्दित भई । इन्द्रआन माथे धर लई ॥१३०॥

सुरगलोक तजि आई तहां । बसै बनारसि नगरी जहां ॥

महाकांत तन लावनभरीं । मानौं नभदामिनी<sup>२</sup> अवतरीं ॥१३१॥

अंग अंग सब सजे सिंगार । रूपसंपदा अचरजकार ॥

चूडामनि माथे जगमगं । देखत चकाचौंध सो लगै ॥१३२॥

सुरतरुसुमनदाम<sup>३</sup> उर धरो । अति सुवास दसदिसि विस्तरी

श्रवनसुखद नेवर-भंकार । सोभा कहत न आवै पार ॥१३३॥

आय नृपतिके पायन नई । आयस<sup>४</sup> मांगि महलमें गई ॥

सिंहासनथित माय निहार । करि प्रनाम कीनों जैकार ॥१३४॥

दोहा—जननीदेह सुभावसौं, अतिनिर्मल अविकार ॥

ताहि कुलाचलवासिनी, और करै सुचि सार ॥१३२॥

१. कुलाचलों पर स्थित सरोवरी के कमलों में रहने वाली देवियां  
२. आकाशकी बिचली ३. कल्पवृक्ष के फूलों की माला ४. प्राज्ञा ।

कृष्णपाख वैशाख दिन, दुतिया निसि-अवसान ।  
 विमल विशाखा नखतमें, बसे गर्भ जिन आन ॥१३३॥  
 जथा सीप<sup>१</sup>संपुटविषै, मोती उपजै आन ।  
 त्योही निर्मल गर्भमें, निराबाध भगवान ॥१३७॥  
 गर्भ बसै पर गर्भतें, बरतें भिन्न सदीव ।  
 घटतें घटवरती<sup>२</sup> गगन<sup>३</sup>, क्यों नहिं भिन्न अतीव ॥१३८॥

चोपई ।

तब जिन पुन्यपवनसे हले । चउविध सुरके आसन चले ॥  
 चिहन<sup>४</sup>देख इन्द्रादिकदेव । जानो अवधिज्ञानबल भेव ॥१३९॥  
 जिनवर आज गर्भ अवतरे । यह विचार उर आनन्द भरे ॥  
 चढि विमान परिवारसमेत । चले गर्भकल्याणक हेत ॥१४०॥  
 जयजयकार करत बहुभाय । उच्छ्वसहित पिताघर आय ॥  
 मातपिता आसन पर ठये । कंचनकलस नहावत भये ॥१४१॥  
 गर्भमध्यवरती भगवान । प्रनमें देव धरो मन ध्यान ॥  
 गीत निरत बाजित्र बजाय । पूजा भेंट करी सिर नाय ॥१४२॥  
 यों सुरगन सब साधि नियोग । गये गेह करि कारज जोग ।  
 इन्द्रराजकौ आयस पाय । रुचकवासिनी देवी आय ॥१४३॥  
 जथाजोग सब सेवा करें । छिन छिन जिनजननीमन हरें ॥  
 रुचक दीप तेरहमो जहाँ । रुचकनाम पर्वत है तहाँ ॥१४४॥  
 सो चौरासी सहस प्रमान । इतने जोजन उन्नत जान ॥

१. सीप के भीतर २. घड़े का ३. आकाश ४. चिह्न ।

इतनी ही बिस्तोरन धार । दीप मध्यसौ बलयाकार<sup>१</sup> ॥१४५॥  
 ताके सिखर कूट बहु लसै । दिसाकुमारी तिनमें वसै ॥  
 ते सब सेवन आवैं माय । यह नियोग इनकी सुखदाय ॥१४६॥

कुसुमलता

आइं भक्ति नियोगिनि देवी, जिन जननीकी सेव भजैं ।  
 कोई न्हाण-विलेपन ठानैं । कोई सार सिंगार सजैं ॥१४७॥  
 कोई भूषण वसन समर्पैं, कोई भोजन सिद्ध करैं ।  
 कोई देय तंबोल<sup>२</sup> रवाने, कोई सुन्दर गान करे ॥१४८॥  
 कोई रतन सिंहासन थापैं, कोई ढालें चमर बरो<sup>३</sup> ।  
 कोई सुन्दर सेज बिछावैं, कोई चापें चरन करो<sup>४</sup> ॥१४९॥  
 कोई चन्दनसौं घर सींचैं, सारे महल सुवास करी ।  
 कोई आंगन देय बुहारी, भारें फूल-पराग परो ॥१५०॥  
 कोई जलक्रीडा कर रंजैं, कोई बहुबिध भेष किये ।  
 कोई मनिदर्पण<sup>५</sup> कर धारें, कोई ठाडीं खडग<sup>६</sup> लिये ॥१५१॥  
 कोई गूंथि मनोहर माला, आवैं आन सुगंध खरी ।  
 कोई कलपतरोवरसौं ले, फल फूलनकी भेट धरी ॥१५२॥  
 कोई काव्य कथारसपौखैं, कोई हास्य विलास ठवैं ।  
 कोई गावैं बीन बजावैं, कोई नाचत सीस नवैं ॥१५३॥

दोहा ।

इह बिध सेवा करत नित, नवैं मास सुभ श्रेय ।  
 प्रश्न करैं सुरकामिनी, माता उत्तर देय ॥१५४॥

१. गोम २. पान ३. श्रेष्ठ ४. हाथ से ५. मणिमय काच ६. तलवार ।

अंतरलापि<sup>१</sup> पहेलिका, बहिरलापिका<sup>२</sup> एव ।

बिंदुहोन<sup>३</sup> निरहोठपद<sup>४</sup>, क्रियागुप्त बहुभेव ॥१५५॥

इत्यादिक आगमउक्त, अलंकारकी जात ।

अर्थगूढ़ गंभीर सब, समभावें जिन-मात ॥१५६॥

चौपई ।

- तुमसी त्रिया कौन जग आन । तीर्थकर सुत जन महान ॥  
जगमें सुभट कौनसे माय । जे नर जीतें विषय कषाय ॥१५७॥  
कौन कहावें कायर दीन । इन्द्रीमदमेटन बलहोन ॥  
पंडित कौन सुमारग चलें । दुराचार दुर्मरिग दलें ॥१५८॥  
माता मूरख कौन महंत । विषयी जीव जगत जावंत ।  
कौन सत्पुरुष नरभव धार । जो साधं पुरुषारथ चार ॥१५९॥  
कौन कापुरुष<sup>५</sup> कहिये ममं । जो सठ साध न जानें धर्म ॥  
धन्य कौन नर इस संसार । जोवन समे धरें व्रतभार ॥१६०॥  
धिक किनकों कहिये सर्वंग । जे धरि करें प्रतिग्या भंग ॥  
कौन जीवके बेरी लोय । काम क्रोध हैं और न कोय ॥१६१॥  
जननी जगमें कौन मलीन । पातकपंकमलिन मतिहोन ॥  
कहो कौन नर नित्त पवित्त । ब्रह्मचर्यधारी दिढ़ चित्त ॥१६२॥  
कौन पसू मानुष आकार । जिनके हिरदें नाहिं विचार ॥  
अंध कौन जो देव अदेव । कुगुरुसुगुरुकी भेद न भेव ॥१६३॥  
बधिर<sup>६</sup> कौनसे उत्तर देह । जंनसिधांत सुनें नहिं जेह ॥

१. बह पहेली जिसका उत्तर उसी पहेली के अक्षरों में हो । २. जिसके उत्तर का शब्द पहेली के शब्दों से बाहर हो । ३. बिन्दुरहितपद ४. ऐसा पद जिसके उच्चारण में होठों से ध्वनि न निकलती हो । ५. कायर । ६. बहुरा ।

मूकनाम नर कंस लहै । जो हित सांच वचन नहि कहै ॥१६४॥  
 लांबी भुजा कौन करहीन । जिनपूजा मुनिदान न दोन ॥  
 कौन पांगले पांवसमेत । जे तीरथ परसें न अचेत ॥१६५॥  
 कौन कुरूप जननि कहु एह । सीर्लासिगार बिना नरजेह ॥  
 वेग कहा करिये बड़भाग । दिच्छागहन जगतकौ त्याग ॥  
 मित्र कौन हितवंचक होय । धर्म दिढ़ावै आलस खोय ॥  
 सत्रु कौन जो दिच्छालेत । विघन करे परभवदुखहेत ॥१६७॥  
 जियकौ कौन सरन है माय । पंचपरमगुरु सदा सहाय ॥  
 इहिविध प्रस्न करे सुरनारि । माता उत्तर देहि विचारि ॥१६८॥  
 वामादेवी सहज प्रबोन । सकल मरम<sup>१</sup> जानै गुनलीन ॥  
 पुरुषरतन उरअन्तर बहै । क्यों नहि ग्यान अधिकता लहै ॥१६९॥

दोहा ।

निबसै<sup>२</sup> निमल गर्भमें, तीन ग्यान-गुनवान ।  
 फटिकमहलमें जगमगें, ज्यों मनि दीप महान ॥१७०॥  
 उदयवान दिनकरसमय, पूर्व दिसा छबि जेम ।  
 त्रिभुवनपति-सुत उर धरे, सोहत जननी एम ॥१७१॥  
 गर्भभार व्यापे नहीं, त्रिबली<sup>३</sup> भंग न होय ।  
 देह न दीखे पीतछबि, और विकार न कोय ॥१७२॥  
 ज्यों दर्पन प्रतिबिंबसौं, भारी कहचौ न जाय ।  
 त्यों जिनपतिके गर्भसौं, खेद न पावै माय ॥१७३॥  
 कलपलतासी लसत अति, जननी छबिसंयुक्त ।

१. रहस्य २. बसै ३. पेट के तीन सबट भगवान के गर्भ में आने पर भी, नष्ट नहीं हुए ।

मंदहास कुसुमित भई, अब फलि है फल पुत्त<sup>१</sup> ॥१७४॥

देवराजके बचनसौं, अह्निस<sup>२</sup> हरखत अंग ।

अलखरूप सेवं सची<sup>३</sup>, लिये अपछरा संग ॥१७५॥

पूरबवत नवमास लों, पंचाचरज अनूप ॥


अस्वसेन भूपालघर, किये धनद<sup>४</sup> सुखरूप ॥१७६॥

यों सुखसौं निसदिन गये, खेद नामकहि नाहि ॥

यह सब पुन्य-प्रभाव है यही रहस इसमार्हि ॥१७७॥

इति श्रीपाश्र्वंपुराणभाषायां गर्भवितारवर्णनं नाम पञ्चमोऽधिकारः ।

## छठा अधिकार ।



दोहा ।

रागादिक जलसौं भरघौ, तन तलाब बहु भाय ।

पारस-रवि दरसत सुखें, अघ सारस उड़ि जाय ॥१॥

गर्भ मास पूरन भये, नभ निर्मल आकार ।

पौष मास एकादसी, स्याम पच्छ सुभ बार ॥२॥

वामादेवी-पूर्व-दिसि, जनम्यौ जिनवर भान ।

मुदित भयौ त्रिभुवनकमल, असुभतिमिर अवसान<sup>५</sup> ॥३॥

अस्वसेन नृप उदयगिरि, उगयौ बाल दिनेस ।

तीन<sup>६</sup> ग्यान-किरनावली, लिये जगत परमेस ॥४॥

१. पुत्र २. रातदिन ३. इन्द्राणी ४. कुबेर ५. अन्त ६. मति, श्रुत, अर्थात्



पद्धडि ।

जनम्यौ जब तीर्थकर कुमार । तिहुंलोक बढ्यौ आनंदअपार  
 दीखें नभनिर्मल दिसि असेस । कहि आंधो मेह न धूलि लेस ।  
 अति सीतल मंद सुगंधि वाय । सो बहन लगी सुखसांतिदाय  
 सब सुजनलोक हरषे बिसेस । ज्यों कमल-खंड प्रगटत दिनेस<sup>१</sup>  
 घंटा घन गरजे देवलोक । ज्योतिषिघर केहरिनाद<sup>२</sup> थोक ॥  
 भवनालय बाजे सहज संख । बितर-निवास भेरी असंख ॥७  
 ये अनहद बाजे बजे जान । जिनराज-जनमअतिसय महान ।  
 बहु कलपतरोवर पहुपवृष्टि । स्वयमेव करन लागे विसिष्ट ॥८  
 इंद्रासन कांपे अकसमात । ये करन किधौ सारथ (? ) सुजात  
 जिनजनम भयो भूलोकमाहि । उचासन अब तुम जोग नाहि ।  
 आनअ<sup>३</sup> भये मणिमुकुट एम । श्रीजिनप्रति करत प्रनाम जेम ।  
 ये चिहन देखि इंद्रादिदेव । तब अबधिग्यानबल जान भेव<sup>४</sup> ॥  
 निरधार बनारसि-नगर-थान । तीरथपति जनम्यौ आज आन ।  
 प्रभुजन्मकल्याणककरनकाज । उद्यम आरंभ्यौ देवराज ॥११  
 परिवारसहित सब इन्द्रनाम । आये मिलि प्रथमसुरेंद्रधाम ॥  
 नानाविध बाहन चढ़े जेह । जिनभगतिसलिलसिचतसुदेह  
 सप्तांग सैन तब चली एम । यह महाजलधिकी लहर जेम ॥  
 हाथी रथ पायक<sup>५</sup> वृषभ<sup>६</sup> बाज<sup>७</sup> । गायनि नर्तकि सेनासमाज  
 एकेक सैनमें सात कच्छ । तिहिमाहि प्रथम चउ असी लच्छ ।  
 फिर दुगुन दुगुन सातम लों जान, इस भांति सात सेना महान  
 सौ कोर और छेकोर जोरि । अठसठ लाख ऊपर बहोरि ॥

यह एकहस्ति सेनाप्रमान । ऐसी ही सब सातों समान ॥१५॥  
 तहँ नागदंत<sup>१</sup> सुर आभियोग । सो करह विक्रिया निजनियोग ॥  
 ताप्रति आग्या दीनी सुरिंद । तिन कीनों ऐरावत गइन्द ॥१६॥  
 लख जोजन मान मतंगईस । अतिउन्नत देह उतंग सीस ॥  
 सुभसेतवरन<sup>२</sup> मनहरन काय । लीलागति धारें ललित पाय ॥१७॥  
 मदजीवनकलित<sup>३</sup> कपोल स्याम । नख बिद्रुमवरण<sup>४</sup> मनोभिराम  
 सब लसत सुलच्छन अंगअंग । नहिं गिनीजाहिंजिसछबितरंग  
 गंभीर घनाघनघोष जास । बहु सुन्दर सुंड सुगंध सांस ॥  
 हो कामसरूपी कामगौन । जादेखें मोहत तीन भौन ॥१८॥  
 घनघोरत घंटा लंबमान । मनि घूंघुरमाला कंठथान ॥  
 सोवनपाखर<sup>५</sup> सो दिपै देह । संपाजुत<sup>६</sup> मानों सरद मेह ॥२०॥  
 सौ वदन बिराजत सोभवंत । एकेकवदनमें<sup>७</sup> आठ दंत ॥  
 प्रतिदंत सरोवर एक दीस । सरसरहँ कमलिनी सौपचोस<sup>८</sup> ॥२१॥  
 एकेक कमलिनी प्रति महान । पञ्चीस मनोहर कमल ठान ॥  
 प्रतिकमल एकसौ आठपत्र । सोभावरनी नहिं जाय तत्र ॥२२॥  
 पत्रनपर नाचें देवनारि । जगमोहत जिनकी छबि निहारि ।  
 नव नवरस पीषे करत गान । लावन्यजलधि-बेलासमान ॥२३॥  
 तिस हाथी ऊपर सचोसंग । सौधर्मसुरगपति मुदित अंग ॥  
 आरूढ़<sup>९</sup> भयो अति दिपत एम । उदयाचलमस्तक भानु जेम ।  
 चंद्रोपम चामर छत्रसीस । दसजाति कलपसुरसहित ईस ॥

१. आभियोग्य जाति के देव २. सफेद रंग ३. मदजल ४. मूंगा का रंग

५. स्वर्ण की भूल ६. बिजली ७. मुख ८. एक सौ पञ्चवीस ९. चडा ।

ईसानप्रमुख इमि देवराज । निज निज बाहनकों चले साज ॥  
 परिजनसमेत उर हरषभाव । जिन जनमकल्यानक करन चाव  
 बाजे सुरदुंदुभि विबिध भेव । जयकार करै मिलि सकलदेव २६  
 उपज्यौ कोलाहल गगन थान । सब दिसि दीखैं बाहन विमान ।  
 आकाससरोवर अतिगँभीर । इंद्रादि अमर तन तेज नीर । २७।  
 तहां विकसत मुख अपछरा एम । यह खिल्यौकमलिनोबागजेम ।  
 इहि बिध देवागम भयौ जान । अवतरे बनारस नगर थान । २८  
 चंद्रादि जोतिषी पंच जात । दस भेद भवनवासी विख्यात ॥  
 पुनि आठ जातके वान देव । सब आये इन्द्र समेत एव । २९॥  
 निज निज बाहन चढ़ि सपरिवार । जिन जन्म-महोच्छ्रयहियेंधार  
 तब पुरप्रदच्छिना सुरन दीन । अतिहरखत उर जयकार कीन ।  
 बन बीथी मारग गगन रोक । सब ठाड़ देवी देव थोक ॥  
 सब सक सची मिलि भूप गेह । आये घर आंगन भरो तेह । ३१  
 तब इंद्रबधु अति रंजमान<sup>२</sup> । सो गई गुप्त जिनजनमथान ॥  
 दखी जिनमात सपुत्त<sup>३</sup>ताम । परदच्छिन द कोनों प्रनाम । ३२  
 सुत-रागरंगो सुखसेजमांभ । ज्यौ बालक-भानुसमेत सांभ ॥  
 कर जोरि जुगल सिर नाय नाय । युति कीनी बहु जानै न माय  
 सुखनींद रची तब सची तास । मायामय राख्यौ पुत्र पास ॥  
 करकमलन बालक-रतन लीन । जिन कोटिभानुछवि छीन कीन  
 सुख उपजं जो प्रभु परस देह । कवि-वानोगोचर नाहि तेह ।  
 प्रभुको मुखवारिज<sup>४</sup>देख देख । हरखैं सुररानी उर विसेख ३५

वसु भंगलदरव विभूति सार । दिसदिव्यकुमारी अग्रचार ॥  
 इहिविध सौधमंसुरेसनार । आन्यो सिवकन्या'वर कुमार ॥३६॥  
 देख्यौ हरि बालकचंद जाम । आनंदजलधि उर बढ्यौ ताम ॥  
 सिर नाय इंद्र निज बार बार । थुति कीनी कर जुग सीस धार ॥  
 छबि देखि तृपति नहि होय लेस । तब सहस आंख कीनी सुरेस  
 करि नमस्कार निजगोद लीन्ह । ईसान इंद्र सिर छत्र दीन्ह ॥  
 तहां सनतकुमार महेंद्र सोय । ए चामर ढालें इन्द्र दोय ॥  
 ब्रह्मादि सुरगवासी सुरेस । जय नंद वर्ध बौलें विसेस ॥३६॥  
 नाचें सुर-रमनी रूपखान । गंधर्व करें जिनसुजसगान ॥  
 सुरबाजे बाजें बहुप्रकार । कर धरहिं किन्नरी बीन सार ॥४०॥  
 केई सुर श्रीजिनसुभगभेष । देखें भरि लोचन निनिमेष<sup>१</sup> ॥  
 केई यौ भार्ग सुरसमाज । हम देवजन्मफल लह्यौ आज ४१  
 केई सरधायुत भये देव । मिथ्यात महाविष वम्यौ एव ॥  
 इस भांति चतुरबिध देवसंघ । सब चले जोतिषोपटल लंघ<sup>२</sup> ॥

दोहा ।

जोजन सहस निन्यानवे, सुरगिरि-सिखर उतंग ।  
 गये सकल सुरगन तहां, भूषनभूषित अंग ॥४३॥

चोपई ।

ब्रह्मामेरुके मस्तकभाग । पांडुकबन बहु धरे सुहाग<sup>३</sup> ॥  
 जोजन सहस जासु बिस्तार । सुर चारन खग करें बिहार ॥४४॥  
 चहुंदिशि आर जिनालय तहां । सघन सासते तरुवर जहां ।

मध्यचूलिका मुकट सरीस । सो उतंग जोजन चालीस ॥४५॥  
 बारह जोजन जड़ विस्तार । आठमध्य अर ऊपर चार ॥  
 जाके ऊपर रजकविमान । रोमांतर<sup>१</sup> नरछेत्रप्रमान ॥४६॥  
 तिस ईसानदिसा सुभ थान । मनिमय सिला सासती जान  
 पांडुकनाम फटिक उनहार । आकृति अर्ध चंद्रमाकार ॥४७॥  
 सौ जोजन आयाम<sup>२</sup> अभाग । विस्तर<sup>३</sup> आधी आठ उतंग ॥  
 सुरविद्याधर पूजत नित्त । भरतखंड-जिन-न्हौन-पवित्त ॥  
 तहां हेम-सिंहासन सार । रत्नजड़ित सो बलयाकार ॥  
 धनुष पांचसौ उन्नत जोय । भूमिभाग बिस्तीरन सोय ॥४८॥  
 ऊपर जास अर्ध बिस्तार । जाके तेज मिटं अंधियार ॥  
 तिसहीपर पदमासन साज । पूरबमुख थापे जिनराज ॥५०॥  
 इस औसर सोहैं इमि ईस । मानों मेघ रतनगिरि सोस ॥  
 धुजा कलस दर्पन भृंगार<sup>४</sup> । चमर छत्र सुप्रतिष्ठक<sup>५</sup> तार<sup>६</sup> ॥५१॥  
 मंगल दवं मनोहर जहां । धरे अनादि-निधन ये तहां ॥  
 आसन दोय उभय दिस और । जुगलइंद्र ठाड़े तिहि ठौर ॥५२॥  
 चारों दिस चारों दिगपाल । जथाजोग जिनमज्जनकाल<sup>७</sup> ॥  
 सची सुरेंद्र अपछरा-थोक<sup>८</sup> । सब ठाड़े पांडुकवन रोक ॥५३॥  
 चौबिध<sup>९</sup> देव खड़े चहुंपास । जनम-न्हौन देखन हुल्लास ।  
 कियो महामंडप हरि तहां । तीनलोक जन निवसे जहां ॥५४॥  
 कल्पकुसुममाला मनहार । लटकै मधुप करै भंकार ॥

१. एक बाल का प्रन्तर २. लम्बाई ३. चौड़ाई ४. कलश ५. साधिया ६. पसा  
 ७. अग्निपेक ८. समूह ९. चार प्रकार के देव (मवनवासी, स्वन्तर, ज्योतिषी,  
 कल्पवासी)

सुर वाजित्र बजें बहुभाय । सुरभि<sup>१</sup> सुगंध रही महकाय । ५५  
 मंगल मिल गावें सब सची । नाचें सुर-वनिता रस-रची ।  
 तब मञ्जन आरंभ विसेस । उद्यम कियो प्रथम अमरेस<sup>२</sup> ५६

दोहा ।

तहां कुबेर रतन खची<sup>३</sup>, रची पंडका पंत<sup>४</sup> ।  
 मेरु सिखरसौं सोहिये, छीरोदधिपरजंत<sup>५</sup> ॥५७॥  
 सुर-श्रेणी सोपान-पथ, पंचम सागर जाय ।  
 भर लाई कंचन-कलस, चंदन-चरचित काय ॥५८॥  
 जोजन एक प्रमान मुख, वसु<sup>६</sup> जोजन गंभीर ।  
 यह मरजादा कलसकी, जिनशासनमें बीर ॥५९॥  
 मुकतमालमंडित लसं, कचन-कलस महंत ।  
 नभवनिताके<sup>७</sup> उरज<sup>८</sup> ये, यों अति सोभावंत ॥६०॥

चौपई

सहस<sup>९</sup> भुजा सुरपति तब करी । भूषणभूषित सोभा भरी ।  
 इस औसर हरि सोहैं एम । भूषणांक सुरतरुवर जेम ॥६१॥  
 कलस हाथ हरि लीनें जाम । भाजनांग<sup>१०</sup> सम सोभा ताम ।  
 तोन बार कीनौ जयकार । कलसोद्वारन मंत्र उचार ॥६२॥  
 इहिबिध श्रीसौधर्माधीस । ढाले कलस स्वामिके सीस ॥  
 तब सब इंद्र कियो जिनन्हौन । अतुल उछाव बढ़यो जगभौन ॥

१. मनोरम २. सौधर्म स्वर्ग का इन्द्र ३. रत्न जड़ित ४. पत्ति ५. पंचम समुद्र तक ६. आठ ७. आकाश रूपी स्त्री ८. स्तन ९. हजार १०. भाजन देने वाला कल्प वृक्ष ।

महा धार जिनमस्तक ढरी । मानों नभगंगा अवतरी ॥  
 मुदित असंख अमरगन तबे । जे जंकार कियो मिलि सबे ६४।  
 उपज्यौ अति कोलाहल सार । दसदिस बधिर<sup>१</sup> भई तिहिबार ।  
 भयो असम<sup>२</sup> औसर इहि भाय । वचनद्वार बरन्यौ नहि जाय ।

दोहा ।

जा धारासौं गिरिसिखर, खंड खंड हो जाय ।  
 सौ धारा जिनदेहपे, फूल-कली सम थाय ॥६६॥  
 अप्रमान वीरजधनी, तीर्थकर प्रभु होय ।  
 तातैं तिनकी सकतिकों, उपमा लगै न कोय ॥६७॥  
 नीलवरन प्रभु देहपर, कलस-नीरछवि एम ।  
 नीलाचलसिर हेमके, बादल बरसै जेम ॥६८॥  
 चली न्हौनके नीरकी, उछल छटा नभमाहि ।  
 स्वामिसंग अघबिन<sup>३</sup> भई, क्यों नहि ऊरध जाहि ॥६९॥  
 न्हौनछटा तिरछीभई, तिन यह उपमा धार ।  
 दिगबनिता<sup>४</sup>-मुख सोहिये, करनफूल उनहार ॥७०॥

सोरठा ।

जिनतनपरस पवित्र, भई सकल जगसुचिकरन ।  
 सो धारा मम नित्त, पाप हरो पावन<sup>५</sup> करो ॥७१॥

चोपई ।

यों सुरेंद्र मञ्जनविधि ठान । फिर कोनों गधोदकन्हान ॥  
 सो जल लेय विनय विस्तरी । सांतिपाठ पढ़ि पूजा करी ॥७२॥

१. बहरी २. जिसकी समानता नहीं की जा सकती ३. निष्पाप ४. बिना-  
 रूपी स्त्री ५. पवित्र ।

सक्र सची सुर आनन्द भरे । यथाजोग सब कारज करे ।  
परदच्छिन<sup>१</sup> दीनी बहु-भाय । बारंबार नये सिरनाय ॥७३॥

हरिगीत ।

सौधर्मपति अभिषेक कारक, न्हौनपीठ<sup>२</sup> सुदंसनो<sup>३</sup> ।  
गंधर्व गायक निरतकारक, अपछरा-जन संसनो<sup>४</sup> ॥  
पंचम पयोनिध न्हौन-कुंड, असंख सुर सेवक जहां ।  
तिस जन्ममंगलकी बड़ाई, कहन समरथ बुध कहां ॥७४॥

चोपई ।

जन्महौनबिधि पूरन भई । सकल सुरासुर देवनि ठई ॥  
अब इंद्रानी जिनवर अंग । निजल<sup>५</sup> कियौ बसन<sup>६</sup>-सुचिसंग ॥७५॥  
कुंकुमादि लेपन बहु लिये । प्रभुके देह विलेपन किये ॥  
इहि सोभा इह औसरमांभ । किधौ नोलगिरि फूली सांभ ॥७६॥  
और सिंगार सकल सह कियौ । तिलक त्रिलोकनाथके दियौ ।  
मनिमय मुकुट सची सिर धरचौ । चूडामनि माथे विस्तरचौ ॥७७॥  
लोचन अंजन दियौ अनूप । सहज स्वामिदृग अंजितरूप ॥  
मनि कुंडल कानन विस्तरे । किधौ चन्द्र सूरज अवतरे ॥७८॥  
कंठ कंठिका<sup>७</sup> मोतीहार । मुक्तिरमनि भूला उनहार ॥  
भुजभूषनभूषित भुज करी । कटक मुद्रिका सोभित खरो ॥७९॥  
कटिभूषन कीनौ कटि-थान । मनिमयद्युद्रघंटिकावान ॥  
पग नेवर पहराये सार । जिनमें रतन भूलक भंकार ॥८०॥

१. परिक्रमा २. स्नान का सिंहासन ३. सुदर्शन मेरु ४. प्रशंसा ५. शरीर को सुखाया ६. वस्त्र ७. कटी ।



दोहा ।

अंगअंग आभरनजुत<sup>१</sup>, यह उपमा तिहि काल ॥ .

सुरतरुसम प्रभु सोहिये, भूषनभूषित-डाल<sup>२</sup> ॥८१॥

चौपई ।

तब इंद्रादि लगे थुति करन । जय जिनवर सब आरत<sup>३</sup>-हरन

त्रिभुवनभवन दीप उनहार । धन्य देव तेरो अवतार ॥८२॥

जय श्रीअस्वसेनकुलचंद्र । वामानंदन जोति अमंद<sup>४</sup> ॥

सुखसागरके वर्धनहार । सब जग श्रेय<sup>५</sup>-सांति-दातार ॥८३॥

तुम जग भ्रमनासन अवतारे । हमसे दास महासुख भरे ॥

बिन रविउदय तिमिर<sup>६</sup> क्यों जाय । कैसे कमलबाग विकसाय

मिथ्यामत रजनी<sup>७</sup> अतिघोर । मूस<sup>८</sup> धर्म कुलिंगी<sup>९</sup> चोर ॥

जो प्रभुजन्मप्रभात न थाय । तो किमि प्रजा बसें सुखपाय ॥८४॥

ये अनादि संसारी जीव । बिलखे भव-गद<sup>१०</sup>-ग्रसे अताव ॥

सो दुखमैटन दयानिधान । राजबंद जनमै भगवान ॥८५॥

भरमकूपवरती बहु लोय<sup>११</sup> । काढ़नहार तिन्है नहि कोय ॥

श्रीमुखवचननेज<sup>१२</sup>-बलधार । अब उद्धार लहै निरधार ॥८६॥

आप परमपावन परमेश । औरन हौं सुचि करहु विशेष ॥

ज्यों सरि<sup>१३</sup> सेत<sup>१४</sup> प्रभा तन धरं । सेत सरूप सबनकी करेदद

बिन सनान तुम निर्मल नित्त । अंतर बाहज सहज पवित्त ॥

हम मज्जनबिधि कीनी आज । निजपवित्रकारन जिनराज ॥८७॥

१. आभूषण २. टहनी ३. दुःख ४. सदा जगने वाली ५. कल्याण ६. अघ-  
कार ७. रात ८. चोर ९. छोटे भेषधारी १०. रोग ११. लोग १२. रस्सी  
१३. सरोवर १४. सफेद ।

तुम जगपति देवनके देव । तुम जिन स्वयंबुद्ध स्वयमेव ॥  
 तुम जगरच्छक तुम जगतात । तुम बिनकारन-बन्धु विख्यात ॥  
 तुम गुनसागर अगम अपार । श्रुतिकर<sup>१</sup> कौन जाय जन पार ॥  
 सूच्छम ग्यानी मुनि नहिं तरें । हमसे मंद कहा बल धरें ॥६१॥  
 नमो देव असरन-आधार । नमो सर्वश्रतिसयभंडार ॥  
 नमो सकलसिवसंपतिकरन । नमो नमो जिनतारनतरन ॥६२॥  
 दोहा ।

इहि बिध इन्द्रादिक अमर, सुरपदवीफल लेय ।  
 जन्म-न्हौन-विधि कर चले, मानौं निज शुभ श्रेय ॥६३॥  
 जन्ममहोच्छ्रव देख कर, सुरपतिकी परतीत<sup>२</sup> ।  
 बहु सुर सरधानी भये, तजि सरधा विपरीत ॥६४॥  
 चौपई ।

तब सब देव जनमपुरथान । पूरवली बिधि कियौ पयान<sup>३</sup> ॥  
 चढ़्यौ इन्द्र ऐरावत शीश । गोद लिये त्रिभुवनपतिईस ॥६५॥  
 पूरववत दुंदभि धुनिगाज । वे ही गीत निरत सब साज ॥  
 आये जय जय करत असेस । पिताभवन कीनों परवेस ॥६६॥  
 मनिमय आंगनमें हरि आप । हेम-सिंहासन पर प्रभु थाप ॥  
 अस्वसेनभूपति तिहि बार । देख्यौ नंदन<sup>४</sup> नयन पसार ॥६७॥  
 तेजपुंज निरुपम छवि देह । रोमांचित तन बढ़्यौ सनेह ॥  
 माया नींद सची तब हरी । जिनजननी<sup>५</sup> जागी सुखभरी ॥६८॥  
 भूषनभूषित कांति विसाल । भर लोयन निरख्यौ जिनबाल ॥

१. स्तुति करके, २. विश्वास. ३. गमन, ४. पुत्र, ५. जिनमाता ।

अति प्रमोद उर उमग्यौ तबे । पूरन भये मनोरथ सबे । १६६।  
 तब सुरेस रोमांचितकाय । मात पिता पूजे मन लाय ॥  
 भूषन वसन भेंट बहु धरी । हाथ जोरि जुग थुति<sup>१</sup> विस्तरी १००  
 तुम जगमें उदयाचल भूप । पूरबदिसि देवी सुचिरूप ॥  
 उदय भये त्रिभुवनरवि जहां । तुम महिमा वरनन बुधि कहां  
 धनि धनि अस्वसेन भूपाल । जिनके जगगुरु<sup>२</sup> जनम्यौ बाल ॥  
 कीरतबेल अधिक तुम बढ़ी । तीनलोकमंडप सिर चढ़ी । १०२  
 धनि वामादेवी जगमाय । जिन जायौ नंदन जगराय ॥  
 तीनलोकतिय-<sup>३</sup> सृष्टिसिगार । धनि जननी तेरो अवतार । १०३  
 तुम सम जगमें और न आन । जिनदेवल<sup>४</sup> सम पूज्य प्रधान ॥  
 यों थुतिकरि हरि<sup>५</sup> हिये प्रमोद<sup>६</sup> । बाल दिवाकर दीनों गोद  
 कहो सकल पूरबली कथा । मेरु महोच्छ्रव कीनों जथा ॥  
 तब निज नगरविषं भूपाल । जन्म उच्छ्राह कियौ तिहिंकाल ।  
 हरषत सब पुरजन परिवार । घर घर भये मंगलाचार ॥  
 घर घर कामिनि<sup>७</sup> गावैं गीत । घर घर होंय निरत-संगीत १०६  
 मंगलोक बाजे बहु भेव । बाजन लगे सकल सुखदेव ॥  
 श्रीजिनभवन न्हौन विस्तार । किये सकल मंगल आचार ॥  
 छिरक्यौ धंदन नगरमंझार । रतन साथिया धरे संवार ॥  
 जाचक-दान सुजन-सनमान । जथाजोग सब रीति-विधान ॥  
 इहि बिध अस्वसेन नरनाह । कीनों पुत्र-जनमउच्छ्राह ॥  
 पूरनआस भये सब लोय । दुखी दीन दीखं नहि कोय । १०६।

दोहा ।

उदय भयी जिनचन्द्रमा, कुलनभतिलक<sup>१</sup> महंत ॥  
सुखसमुद्रबेल<sup>२</sup> तजी, बड़चौ लोक-परजंत ॥११०॥

चौपई ।

तब बहु देवनसंग विसेस । आनन्द-नाटक ठयो सुरेस ॥  
करै गान गंधर्व-समाज<sup>३</sup> । समयजोग सब बाजे साज ॥१११॥  
देखै अस्वसेन नरनाथ । पुत्रसहित सब परिजन साथ ॥  
प्रथमरूप नब भव दरसाय । पुहपांजुलि<sup>४</sup> खेपी सुरराय ॥११२॥  
तांडव नाम निरत आरंभ । कियो जगतजन करन अचंभ ॥  
नट सरूप धारचौ अमरेस । रंगभूमि कीनों परवेस ॥११३॥  
मंगलीक सिंगार सुंवार । सब संगीत वेद अनुसार ॥  
ताल मान विधिसहित सुभाय । रंग-धरा पर फेरै पाय ॥११४॥  
करै कुसुमबरसा नभ देव । देखि इंद्रकी भक्ति सुभेव ॥  
बोना मुरज<sup>५</sup> बांसली<sup>६</sup> ताल । बाजे गेह गीतकी चाल ॥११५॥  
करै किलरी मंगलपाठ । बिरियां<sup>७</sup> जोग बन्यौ सब ठाठ ॥  
नाचै इन्द्र भमै बहु भाय । मोरै<sup>८</sup> हाथ कंठ कटि पाय ॥११६॥  
अद्भुत तांडवरस तिहिं बार । दरसावै जन अचरजकार ॥  
सहस भुजा हरि कीनी तबै । भूषनभूषित सोहैं सबै ॥११७॥  
धारत चरन चपल अति चलै । पहुमी<sup>९</sup> कांपै गिरिवर हलै ।  
भमै मुकुट चकफेरी लेत । ताकी रतनप्रभा छबि देत ॥११८॥

१. आकाश कुल का तिलक २. सीमा ३. समूह ४. पुष्पांजलि ५. मृदंग  
६. बांसुरी ७. काल ८. मोह ९. पृथ्वी ।

बलयाकृति<sup>१</sup> ह्वै भलकै सोय । चक्राकार अग्नि जिमि होय ।  
 छिनमें एक छिनक बहुरूप । छिन सूच्छम छिन थूलसरूप । ११६ ।  
 छिनमें निकट दिखाई देय । छिनमें दूर देह धर लेय ॥  
 छिनआकासमाहि संचरै । छिनमें निरत भूमि पर करै । १२० ।  
 छिन छूवै ताराबलि जाय । छिनक चंदसौं परसं काय ॥  
 इंद्रजालवत<sup>२</sup> यों अमरेस । दरसाई निज रिद्धिविसेस । १२१ ।  
 हाथ अंगुलिनपे अपछरा । नाचें रूप रतनकी धरा ॥  
 अंग अंग भूषन भलकाहि । विकसत लोचन मुख मुसकाहि ।  
 निरत-भेदबिधि धारें पांब । करें कटाच्छ दिखावें भाव ॥  
 बहुविधकला प्रकासं सार । सुरकामिनि<sup>३</sup> दामिनि<sup>४</sup> उनहार १२३  
 तिनसंजुत<sup>५</sup> हरि सुरतरु एम । कलपलतागनवेदयौ<sup>६</sup> जेम ॥  
 यों नाटकबिधि ठान अनूप । तिहुंजग सक्र<sup>७</sup> किये सुखरूप १२४  
 स्वामिजनम-अतिसयपरताप । जिनवरपिता सभापति आप ।  
 इन्द्र महानट नाचें जहां । तिस अवसर-बरनन बुधि कहां ॥  
 तब तहां मातपिताकी साख । पारस नाम सकल सुर भाख ।  
 राखि सुरासुर सेवा-जोग । चले देव सब साधि नियोग १२६ ।

दोहा ।

इहिविध इन्द्रादिक अमर, जन्मकल्याणक ठान ।  
 बहुविध पुन्य उपायकं, पहुँचे निज निज थान ॥ १२७ ॥

१. गोल २. जादू ३. देवाङ्गना ४. बिजली की तरह ५. उन सहित ६. कल्प  
 बेलि से लिपटा हुआ ७. इन्द्र ।

हरिगीति ।

इन्द्रादि जन्मसनान जिनकौ, करन कनकाचल<sup>१</sup> चढ़े ।  
 गंधर्वं देवन सुजस गायौ, अपछरा मंगल पढ़े ॥  
 इहबिध सुरासुर निज नियोगं, सकल सेवाबिधि ठई ।  
 ते पासप्रभु मुझ आस पुरवो, सरन सेवकने लई ॥१२८॥

इति श्रीमत्पार्श्वपुराणभाषायां जिनेन्द्रजन्मोत्सववर्णनं  
 नाम षष्ठमाधिकारः ।

## सातवाँ अधिकार

— ~~—~~ —

दोहा ।

पारस प्रभु तजि औरकौं, जे नर पूजन जाहि ।  
 कलपबिरछकौं छांडिके, बैठें थूहर<sup>२</sup> छाहि ॥१॥  
 चौपई ।

अब जिन बालचन्द्रमा बढ़े । कोमल हास-किरन मुख कढ़े ॥  
 छिन छिन तात-मात-मन हरें । मुखसमुद्र दिन दिन विस्तरें । २।  
 अमृत इन्द्र अंगूठे देय । वही पोष<sup>३</sup> पयपान<sup>४</sup> न लेय ॥  
 देवी धाय<sup>५</sup> हरष मन धरें । मज्जनमंडन<sup>६</sup> बिधि सब करें । ३।  
 केई मनिभूषन पहराय । करें अलंकृत प्रभुकी काय ॥  
 केई कामिनि करें सिंगार । श्रीमुखचन्द्र निहार निहार । ४।

१. सुमेरु पर्वत २. थोर=कांटेदार झाड़ ३. पोषण योग्य ४. दूध पीना

५. बच्चे को पालने वाली माता ६. शृङ्गार ।

केई रहसवती<sup>१</sup> तिय आय । हस्त कमलसौं लेय उठाय ॥  
 मनिमय आंगनमांभ अनूप । बिचरै जिनपति बालसरूप ॥५॥  
 बहुबिध देवकुमार मनोग । बालकरूप भये वयजोग<sup>२</sup> ॥  
 घुटियां<sup>३</sup> गमन करै तिनसाथ । ज्यों नछत्रगनमें निसि-नाथ ॥६॥  
 कबहीं संनासन सोवंत । ऊपर दिढ़ जिन यों जोवंत<sup>४</sup> ॥  
 अर्जो मुक्ति मो केतक<sup>५</sup> परं<sup>६</sup> । मानों यह संका मन धरं ॥७॥  
 कबहीं पुहुमोपं<sup>७</sup> जितराय । कंपित चरन ठवे इहि भाय ॥  
 सहै कि ना धरती मुक्तभार । संकं उर उपमा यह धार ॥८॥  
 कबहीं स्वामि उभक्ति उठि चलं । विकसत मुख सब दुखकौदलं ।  
 बांधे मुठी अटपटे पाय । कैसे वह छवि बरनी जाय ॥९॥  
 कबहीं रतन-भीतमें रूप । भूलकं ताहि गहें जगभूप ॥  
 जिनसौं जिन<sup>८</sup> न मिले सर्वथा । करत क्रिधौं कहवत<sup>९</sup> यह वृथा  
 कबहीं रतन-रेत कर लेत । करै केलि सुरकुमरसमेत<sup>१०</sup> ॥  
 कबहिं माय बिन रुदन करेय । देखें फेरि विहंसि हंस देय ॥११॥  
 कबहीं छोड़ि सच्चीकी गोद । जननी-अंक जाय मनमोद ॥  
 मातासौं मानै अति प्रीति । बाल अवस्थाकी यह रीति ॥१२॥  
 यों जिन बालकलीला करै । त्रिभुवनजनमनमानिक हरै ॥  
 क्रमसौं बालभारती<sup>११</sup> नाम । श्रीमुखकमल लसी अभिराम ॥१३॥  
 अनुक्रम भई अंगबढ़वार । तब त्रिभुवनपति भये कुमार ॥

१. रहस्य की ज्ञाता २. उन्नयोग्य ३. घुटनों के बल चलना ४. देखना  
 ५. कितनी ६. दूर ७. पृथ्वी ८. उन्नककर ९. तीर्थङ्कर १०. कहावत ११. देव  
 बालक १२. बालक वारणो ।

निरुपम कांति कला विग्यान । लावन रूप अतुलगुनथान ॥ १४ ॥  
 मति-श्रुति-अवधि-ग्यानबल देव । जानै सकल चराचर भेव ।  
 सोमसुभाव<sup>१</sup> सहज उपसंत । निर्मल छायाकदरसनवंत ॥ १५ ॥  
 इहिविध आठबरसके भये । तब प्रभु आप अनुव्रत लये ॥  
 देवकुमार रहै संग नित्त । ते छिन छिन रंजै जिन-चित्त ॥ १६ ॥  
 कबहीं गज तुरंग<sup>२</sup> तन धरै । तिनपै चढ़ि प्रभु जनमन हरै ॥  
 कबहीं हंस मोर बन जाहि । तिनसौं जगपति केलि कराहि ॥ १७ ॥  
 कबहीं जलक्रीड़ाथल गमै । कबहीं बनबिहारभू रमै ॥  
 कबहीं करै किंनरी गान । सो प्रभु सुजस सुनै निज कान ॥ १८ ॥  
 कबहीं निरत ठवं<sup>३</sup> सुर-नार । देखै जिन लोचनसुखकार ॥  
 कबहीं काव्यकथारस ठान । करै गोठ<sup>४</sup> जिन बुधि बलवान ॥ १९ ॥  
 बिना सिखाये बिन अभ्यास । सब विद्या सब कलानिवास ।  
 यों सुखअनुभव करत महान । भये पास जिन जोबनवान ॥ २० ॥

दोहा ।

संपूरन जोवन समय, प्रभुतन सोहै एम ॥

सहजमनोहर चांदकी, सरदसमय छबि जेम ॥ २१ ॥

चौपई ।

प्रभुके अंग पसेव न होय । सहज सदा मलवरजित<sup>५</sup> सोय ॥  
 उज्जलवरन रुधिर जिमि खीर<sup>६</sup> । सुसमचतुरसंठान<sup>७</sup> शरीर ॥ २२ ॥  
 प्रथम सारसंहननसरूप<sup>८</sup> । इन्द्र-चन्द्र-मनहरन अनूप ॥

१. सोम्य स्वभाव २. घोड़ा ३. करे ४. गोष्ठी ५. शरीर मल रहित ६. दूध  
 ७. सर्वांग सुन्दर ८. ब्रह्मवृषभनाराच संहनन ।



बिनाहेत तन सहज सुवास । प्रियहितवचन मधुर मुख जास ।  
 अतुलवेह बल धरत महान । सहस<sup>१</sup> अठोतर लच्छनवान ॥  
 तिनके नाम लिखीं कछु जोय । पढ़त सुनतसुखसंपति होय २४

हरीगीत

श्रीवच्छ<sup>२</sup> संख सरोज<sup>३</sup> स्वस्तिक, सक्र चक्र सरोवरो ।  
 चामर<sup>४</sup> सिंहासन छत्र तोरन, तुरगपति<sup>५</sup> नारी नरो ॥  
 सायर<sup>६</sup> दिवायर<sup>७</sup> कल्पबेली, कामधेनु धुजा करी ।  
 वरवज्रवान कमान कमला<sup>८</sup>, कलस कच्छप केहरी ॥२५॥  
 गंगा गऊपति<sup>९</sup> गरुड़ गोपुर, बेणु बीणा बीजना<sup>१०</sup> ।  
 जुगमोनि<sup>११</sup> महल मृंदगमाला, रतन दीप दिपं घना ॥  
 नागेंद्र-भुवन विमान अंकुस, बिरछ सिद्धारथ सही ।  
 भूषन पटंबर हट्ट हाटक<sup>१२</sup>, चन्द्रचूड़ामनि कही ॥२६॥  
 जम्बू तरोवर नगर सूवस<sup>१३</sup> बाग जनमनभावना ।  
 नौनिधि नक्षत्र सुमेरु सारद, साल<sup>१४</sup> खेत सुहावना ॥  
 ग्रह मंगलाष्टक प्रातिहारज, प्रमुख और बिराजहीं ।  
 परमित अठोतर सहस प्रभुके, अंग लच्छन छाजहीं ॥२७॥  
 अंतर अनंती अतुल महिमा, कथन बूर रहो कहीं ।  
 बहिरंग गुनथुति करन जगमें, सकसे समरथ नहीं ॥  
 अब और जनकी कौन गिनती, दीन पार न पावना ।

१. एकसो आठ २. वक्षस्यल पर चिह्न विशेष ३. कमल ४. चंवर ५. घोडा  
 ६. सागर ७. सूय ८. लक्ष्मी ९. सांड १०. पंखा ११. दो मछलियां १२. सोना  
 १३. अच्छी तरह बसा हुआ १४. चावल ।

पर पासप्रभुकी सुजसमाला, पहिरि दास कहावना ॥२८॥

दोहा ।

सहस अठोतर लछन ये, सोभित जिनवरदेह ।

किधौं कल्पतरुजके, कुसुम विराजत येह ॥२९॥

चोपई ।

शुभ परमानुमय जिन अंग । नीलवरन नौ हाथ उतंग ॥  
छवि बरनत बहि पावें ओर । त्रिभुवनजनमनमानिकचोर ॥३०॥  
सतसंबत्सर<sup>१</sup> आब<sup>२</sup> प्रमान । अतुल असाधारन गुनथान ॥  
सत्रुमित्रऊपर समभाव । दयासरोवर सोमसुभाव ॥३१॥  
सागरसौं प्रभु अति गंभीर । मेरुसिखरसौं अधिक धीर ॥  
कांति देखि लाजें मिरगांक<sup>३</sup> । तेज बिलोकि छिपै रवि रांक<sup>४</sup> ॥  
कल्पविरछसौं अधिक उदार । तिहुँजगआसापूरनहार ॥  
यौं जिनगुनकौं उपमा कहीं । तीनकाल त्रिभुवनमें नहीं ॥३३॥

दोहा ।

यौं सुख निवसत पास जिन, सेवत कमला पाय ।

सोलह बरस प्रमान प्रभु, भये जगतसुखदाय ॥३४॥

सभासिंहासन एक दिन, बंठे सहज जिनेन्द्र ।

सुरनरमें प्रभु यौं दिपें, ज्यों उड़गनमें<sup>५</sup> चन्द्र ॥३५॥

अस्वसेन भूपाल तब, बोले अवसर पाय ।

नेहसलिल<sup>६</sup> भोजे बचन, सुनो कुमर जगराय ॥३६॥

एक राजकन्या बरो, करो उचित व्यवहार ।

१. सो वर्ष २. आयु ३. चन्द्रमा ४. गरीब ५. तारों में ६. प्रेमबल ।

बंसबेल आगे चलै, सुख पावै परिवार ॥३७॥  
 नाभिराजकी आस ज्यौ, भरी प्रथम अवतार ।  
 तथा हमारी कामना, पूरन करो कुमार ॥३८॥  
 पितावचन सुनि प्रभु दियौ प्रतिउत्तर तिहि बार ।  
 रिषभदेव सम मैं नहीं, देखौ हिये विचार ॥३९॥  
 मेरी सब सौ वर्ष थिति, सोलह भये बितौत ।  
 तीस वर्ष संजम समय, फिर मत कहो पुनीत ॥४०॥  
 अल्पकालथिति अल्प सुख, अल्प प्रयोजनकाज ।  
 कौन उपद्रव संग्रहै, समुक्ति देख नरराज ॥४१॥  
 सुन नरेंद्र लोचन भरे, रहे वदन<sup>१</sup> विलखाय<sup>२</sup> ।  
 पुत्रव्याहवर्जनवचन<sup>३</sup>, किसे नहीं दुखदाय ॥४२॥

चौपई ।

इहिविध मंदराग जिनराय । निवसें सबजीवनसुखदाय ॥  
 पूरबकथित कमठचर सोह । पाप करत मानो नहिं चौह ॥४३॥  
 मुनिहत्यावस दुर्गति गयो । पंचमनरकवास सो लयो ॥  
 सत्रहजलधि<sup>४</sup> तहां दुख सहे । वचन द्वार जो जाहि न कहे ॥४४॥  
 थिति पूरन कर छोड़ी ठौर । सागर तीन भय्यो फिर और ।  
 पसुगतिमाहिं विपत बहु भरी । असथावरकी काया धरो ॥४५॥  
 इहिविध भयो पाप अवसान<sup>५</sup> । काहू जन्मक्रिया सुभ ठान ।  
 महोपालपुर सोहै जहां । महोपालनृप उपज्यौ तहां ॥४६॥  
 पारसप्रभुकी वामा माय । इनकौ पिता भयो यह राय ॥

१. मुख २. रोना ३. पुत्र के विवाहका मना कर देना ४. सत्रह सागर ५. अंत

पटरानीके प्राणवियोग । उपज्यौ विरह बढ़्यौ चित सोग।४७।  
 तपसी भेष धर्यौ दुख मान । पंचागनि साधे बनधान ॥  
 सोस जटा मृगछाला संग । भसम पीस लाई सब अंग ॥४८॥  
 भ्रमत बनारसके उद्यान । आयौ कष्ट करत बिनग्यान ॥  
 इहि अवसर श्रीपाश्र्वकुमार । गये सहज बन करन बिहार।४९।  
 राजपुत्र बहु सुरगन साथ । गज आरूढ़ दिपे जिननाथ ॥  
 कर सुछन्द बनकेलि<sup>१</sup> अनूप । चलै नगरको आनन्दरूप ।५०।  
 देख्यौ मगमें जननी-तात<sup>२</sup> । तपे पंचपावक<sup>३</sup>-तप गात ॥  
 सो समीप प्रभुको अवि लौय । चिंतै चित रोषातुर<sup>४</sup> होय।५१।  
 में तपसी कुलवंत महंत । जननी-पिता पूज सब भंत ॥  
 अहो कुमरके यह अभिमान । विनय प्रनाम करै नहि आन ।  
 इतने ई धन कारन जान । लकडी चीरन लग्यौ अयान<sup>५</sup> ॥  
 हाथ कुल्हाड़ी लीनी जबै । हितमितवचन चये प्रभु तबै ।५३।  
 भो तपसी यह काठ न चीर । यामें जुगल<sup>६</sup> नाग हैं बीर ॥  
 सुनि कठोर बोल्यौ रिस<sup>७</sup> आन । भो बालक तुम ऐसो ग्यान  
 हरिहर ब्रह्मा तुम ही भये । सकलचराचरग्याता ठये ॥  
 अमनै करत उद्धत अविचार । चीर्यौ काठ न लाई बार ।५५।  
 ततखिन<sup>८</sup> खंड भये जुगजीव । जैनी बिन सब अदय<sup>९</sup> अतीव ।  
 दयासरोवर जिन तब कहै । तपसी बृथा गरब तू बहै ॥५६॥  
 ग्यान बिना नित काया कसै । करुना तेरे उर नहि बसै ॥

१ बन कोड़ा २. माता का पिता (नाना) ३. पंचाग्नि ४ कोषयुक्त  
 ५. प्रजाती ६. दो का जोड़ा ७ गुस्सा ८. तत्काल ९. दया रहित ।

तब सठ<sup>१</sup> रोषवचन फिर चयी । जननी जनकर तपसी भयी ।  
 करे न मदवस विनयविधान । और उलट खंडे मुझ आन ॥  
 पंच अग्नि साधू<sup>२</sup> तन-दाह । रहूं एकपद ऊरधवांह ॥५८॥  
 भूख प्यास बाधा सब सहूं । सूखे पत्र पारने<sup>३</sup> गहूं ॥  
 ग्यानहीन तप क्यों उच्चरें । क्यों कुमार मुझ निदा करे ॥५९॥  
 तब प्रभुवचन कहे हितकार । तुझ तपमें हिंसाअधभार ॥  
 छहों कायके जीव अनेक । नास होंहि नित नाहि विवेक ॥६०॥  
 जहां जीवबध होय लगार । तहां पाप उपजे निरधार ॥  
 पाप सही दुर्गति दुख देह । यातें दयाहीन तप येह ॥६१॥  
 ग्यान बिना सब कायकलेस । उत्तम फलदायक नहि लेस ॥  
 जैसे तुस<sup>४</sup> खंडन<sup>५</sup> कन छार । यों अज्ञान तप अफल असार ॥६२॥  
 अंधपुरुष बन<sup>६</sup>-दौमें दहै । दौर<sup>७</sup> मरें मारग नहि लहै ॥  
 त्यों अज्ञान उद्यम करि पचें । भवदावानलसों नहि बचें ॥६३॥  
 ऐसे ही किरिया बिन ग्यान । सो भी फलदायक नहि जान ।  
 जथा पंगु लोचनबल धरें । उद्यमबिन<sup>८</sup> दावानल जरें ॥६४॥  
 तातें ग्यानसहित आचार । निहचें वांछितफलदातार ॥  
 इहिबिध जिनमतके अनुसार । करि उत्तम तप यह हठछार ॥६५॥  
 मैं तुझ वचन कहे हितकार । तू अपने उर देखि विचार ॥  
 भली लगै सोई करि मित्त<sup>९</sup> । वृथा मलोन करे मति चित्त ॥६६॥

१. मूर्ख २. उपवास के पश्चात् का भोजन ३. भूमा ४. टुकड़े ५. बन की घास  
 ६. दौड़ना ७. बिना पुरुषार्थ ८. मित्र ९. मित्र ।

दोहा ।

नाग जुगल सुनि जिनबचन, क्रूरजीव अति निंद ।  
 देह त्यागि ततखिन भये, पदमावति धरनिंद ॥६७॥  
 नाग जुगल<sup>१</sup>के भागकी, महिमा कही न जाय ।  
 जिनदरसन प्रापति भई, मरन समय सुखदाय ॥६८॥

चौपई ।

घर आये श्री पासंजिनन्द । सुरनरनेत्रकमलिनीचन्द ॥  
 समय पाय तपसी तजि देह । भयी जोतिषी संवर तेह ॥६९॥  
 देखो जगमें तपपरभाव । ग्यान बिना बांधी सुरआव<sup>२</sup> ॥  
 जे नर करं जैनतप सार । तिन्हें कहा दुर्लभ संसार ॥७०॥  
 स्वामी मगन सुखोदधिमाहि । हर्ष विनोद करत दिन जाहि ।  
 प्रभुके इष्ट-वियोग न होय । सोगसंजोग न कबहीं कोय ॥७१॥  
 वायपित्तकफजनित विकार । सुपनं होय न सोच विचार ॥  
 जरा न व्यापं तेज न जाय । ना मुखकमल कभी कुम्हलाय ७२  
 होहि नहीं दुखकारन आन । पुन्यउदधिबेला भगवान ॥  
 यों सुखभोग करत दिन गये । तब जिन तीस वर्षके भये ॥७३॥  
 नृप जयसेन अजुध्याधनी । भक्ति प्रीत प्रभुसों अति घनी ।  
 तुरगादिक बहु वस्तु अनूप । पठई<sup>३</sup> विनय वचन कहि भूप ७४  
 राजदूत चलि आयौ तहां । सभा थान जिन बंठे जहां ॥  
 हेमासन पर सोहैं एम । हिमगिरिसिखर स्यामघन जेम ॥७५॥  
 देखि दूत रोमांचित भयी । बहुबिध चरन कमलकीं नयी ।

मान्यौ सफलजन्म निजसार । त्रिभुवनपति परतच्छ<sup>१</sup> निहार७६  
धरी भेंट जो राजा दई । विनय प्रनाम बीनती चई<sup>२</sup> ॥  
तब पूछै तहां त्रिभुवनधनी । संपति नगर अजोध्यातनी ॥७७॥  
कहै दूत कर जुग<sup>३</sup> सिर धार । बरनं तीर्थकर अवतार ॥  
मोख गये बरनं तिहिठाम । सुनि स्वामी चितै उर ताम ॥७८॥

बेली चाल ।

सुनि दूत वचन वंरागे । निज मन प्रभु सोचन लागे ॥  
मैं इन्द्रासन सुख कीनं । लोकोत्तम भोग नवीनं ॥७९॥  
तब तृपति भई तहां नाहीं । क्या होय मनुषपदमाहीं ॥  
जो सागरके जलसेती । न बुझी तिसना<sup>४</sup> तिस एती ॥८०॥  
सो डाभ<sup>५</sup>-अनीके पानी । पीवत अब कंसे जानो ॥  
ईं धनसौं आगि न धापै । नदियों नहि समुद समापै<sup>६</sup> ॥८१॥  
यों भोगविषै अतिभारो । तृपते न कभी तनधारी<sup>७</sup> ॥  
जो अधिक उदय ये आवें । तौ अधिकी चाह बढ़ावें ॥८२॥  
जो इनसौं तृपति विचारं । सो वंसानर<sup>८</sup> घृत डारं ॥  
इन सेवत जो सुख पावै । सो आकौं<sup>९</sup> आंब<sup>१०</sup> उम्हावै ॥८३॥  
ये भीम भुजंग सरीखे । भ्रम-भाव-उदय सुभ दीखे ॥  
चाखतहीके मुख मोठे । परिपाक<sup>११</sup> समय कटु दीठे ॥८४॥  
ज्यों खाय धतूरा कोई । देखं सब कंचन सोई ॥  
धिक ये इन्द्री-सुख ऐसे । विषबेल लगे फल जैसे ॥८५॥

१. प्रत्यक्ष २. कहा ३. दोनों हाथ ४. प्यास ५. डाभ का ऊपरी हिस्सा  
६. मरै ७. शरीरधारी ८. अग्नि ९. आकड़े का पीवा १०. अम ११. उदयकाल

इनही बस जीव अनादी । भव भाँवर<sup>१</sup> भ्रमत सवादी<sup>२</sup> ॥  
 इन ही बस सीख न मानै । नानाबिध पातक<sup>३</sup> ठानै ॥८६॥  
 थिर जंगम<sup>४</sup> जीव संघारै । इनके बस भूठ उचारै ॥  
 पर चोरीसौं चित लावै । परतिय संग सील गमावै ॥८७॥  
 परिग्रह-तिसना<sup>५</sup> विस्तारै<sup>६</sup> । आरंभ उपाधि विचारै<sup>७</sup> ॥  
 इत्यादि अनथं अलेखं<sup>८</sup> । करि घोर नरकदुख देखं ॥८८॥  
 ये ही सुखपर्वतकेरे । जग फोरन बज्र बड़ेरे ॥  
 ये ही सब दोषभंडारे । धन-धर्म-चुरानवहारे ॥८९॥  
 मोही जन मोहैं योंहीं । ये आदरजोग न क्यों हों ॥  
 इनसौं ममता तद्र दोजै । पर त्यागत ढील न कीजै ॥९०॥  
 सामान पुरुष जग जंसे । हम खोये ये दिन ऐसे ॥  
 संजम बिन काल गमायो । कछु लेखेमें नहि लायो ॥९१॥  
 ममताबस तप नहि लीनों । यह कारज जोग न कीनों ॥  
 अब खाली ढील न कीजै । चारित-चित्तामनि लीजै ॥९२॥

दोहा ।

भोगविमुख<sup>९</sup> जिनराज इमि, सुधि कीनी सिवथान<sup>१०</sup> ।  
 भावें बारह भावना, उदासीन हितदान ॥९३॥

चौपई ।

द्रव्य सुभाव बिना जगमाहि । परजै<sup>११</sup> रूप कछु थिर नाहि ॥  
 तनधन आदिक दोखत जेह । कालअगनि सब ई धन तेह ॥९४॥

१. संसार परिभ्रमण २. स्वाद लेनेवाला ३. पाप ४. अस ५. लाजक  
 ६. फैलावै ७. रोग-चिंता ८. बेहिमाब ९. उदास १०. मुक्तिस्थान ११. पर्याय



भववन भ्रमत निरंतर जीव । याहि न कोई सरन सदीव ॥  
 ब्योहारं परमेठी-जाप । निहचं सरन आपकौ आप ॥६५॥  
 सूर<sup>१</sup> कहावे जो सिर<sup>२</sup> देय । खेत<sup>३</sup> तजं सो अपजस लेय ॥  
 इस अनुसार जगतकी रीति । सब असार सब ही विपरीत ॥६६॥  
 तीनकाल इस त्रिभुवनमाहि । जीव-संगाती<sup>४</sup> कोई नाहि ॥  
 एकाकी सुख दुख सब सहैं । पाप पुन्य करनीफल लहैं ॥६७॥  
 जितने जग संजोगी<sup>५</sup> भाव । ते सब जियसौं भिन्न सुभाव ॥  
 नितसंगी<sup>६</sup> तन ही पर सोय । पुत्र सुजन पर क्यों नहि होय  
 असुचि<sup>७</sup> अस्थि<sup>८</sup>-पिंजर तन येह । चामवसनबेढ़ची<sup>९</sup> घिनगेह<sup>१०</sup> ।  
 चेतनचिरा<sup>११</sup> तहां नित रहै । सो बिन ग्यान गिलानि न गहै  
 मिथ्या अविरत जोग कषाय । ये आस्रवकारन समुदाय ॥  
 आस्रव कर्मबन्धकौ हेत । बन्ध चतुरगतिके दुख देत ॥१००॥  
 समिति गुपति अनुपेहा<sup>१२</sup> धर्म । सहन परीषह संजम परम ।  
 ये संवरकारन निरदोख । संवर करे जीवकौ मोख ॥१०१॥  
 तपबल पूर्वकरम खिर जाहि । नये ग्यानबल आवे नाहि ।  
 यही निजंरा सुखदातार । भवकारन-तारन निरधार ॥१०२॥  
 स्वयंसिद्ध त्रिभुवनस्थित जान । कटिकर<sup>१३</sup> धरं पुरुषसंठान<sup>१४</sup> ।  
 भ्रमत अनादि आतमा जहाँ । समकित बिन सिव होय न तहाँ ।

१. गूरबीर २. मस्तक कटावे ३. युद्ध क्षेत्र ४ साथी ५ संयोगी ६. सदा साथ रहने वाला ७. अपवित्र ८. हड्डियोंका पीबरा ९. चमड़े का कपड़ा लिपटा हुआ १०. घृणा का स्थान ११. चेतन रूपी पक्षी १२ अनुप्रेक्षा ( बार बार चितन ) १३. कड़ियों पर हाथ १४. पुरुष के आकार जैसा ।

दुर्लभ धर्म दसांग<sup>१</sup> पवित्त । सुखदायक सहगामी नित्त ॥  
 दुर्गति परत यही कर गहे । देय सुरग सिवथानक यहै ॥ १०४ ॥  
 सुलभ जीवकों सब सुख सदा । नौग्रीवक ताई संपदा ॥  
 बोधरतन दुर्लभ संसार । भवदरिद्रदुखमेटनहार ॥ १०५ ॥  
 ये दस-दोय भावना भाय । दिढ़ वैरागि भये जिनराय ॥  
 देहभोग संसार सरूप । सब असार जान्यौ जगभूप ॥ १०६ ॥  
 इतनें लोकांतिक सुर आय । पुहपांजलि दे पूजे पाय ॥  
 ब्रह्मलोकवासी गुनधाम । देव रिषीश्वर जिनकौ नाम ॥ १०७ ॥  
 सब पूरवपाठी बुधवंत । सहज सोममूरति उपसंत ॥  
 वनिताराग<sup>२</sup> हिये नहिं बहैं । एकजनम धरि सिवपद लहैं ॥ १०८ ॥  
 तीर्थकर जब विरक्त<sup>३</sup> होय । हर्षवंत तब आवें सोय ॥  
 और कल्याणक करे प्रनाम । सदा सुखी निवसें निजधाम ॥ १०९ ॥  
 हाथ जोरि बोले गुनकूप<sup>४</sup> । थुतिवायक<sup>५</sup> अरु सिच्छारूप ।  
 धनिविवेक यह धन्य सयान<sup>६</sup> । धनि यह औसर दयानिधान ॥  
 जान्यौ प्रभु संसार असार । अथिर अपावन<sup>७</sup> देह निहार ॥  
 इन्द्रिय सुख सुपने सम दीस । सो याही विध हैं जगईश १११ ॥  
 उदासीन असि<sup>८</sup> तुम करे<sup>९</sup> धरी । आज मोहसेना थरहरी ।  
 बढ़्यौ आज सिवरमनि सुहाग । आज जगे भविजन सिरभाग  
 जग प्रमादनिद्रावस होय । सोवत है सुधि नाहीं कोय ॥  
 प्रभु धुनिकिरन पयासै<sup>१०</sup> जबै । होय सचेत जगें जन तबै ॥ ११३ ॥

१. दस अंगों वाला २ स्त्री प्रेम ३. विरक्त ४. कुप्रा ५. स्तुतिरूप वचन

६. समभदार ७. अपवित्र ८. तलवार ९. हाथ १०. प्रकाशित हो ।

यह भव दुस्तर<sup>१</sup> पारावार<sup>२</sup> । दुखजलपूरित वार न पार ॥  
 प्रभु उपदेश पोत<sup>३</sup> चढ़ि धोर । अब सुखसौं जंहीं जन तीर ॥ ११४ ॥  
 सिवपुरि पौर<sup>४</sup> भरमपट<sup>५</sup> जहां । मोह मुहर<sup>६</sup> दिढ़ कोनी तहां ॥  
 तुम वानी कूची कर धार । अब भवि जीव लहैं पयसार<sup>७</sup> ॥ ११५ ॥  
 स्वयंबुद्ध बोधन-समरत्थ । तुम पर प्रतिबुध<sup>८</sup> वचन अकत्थ<sup>९</sup> ॥  
 ज्यों सूरज आगे जिनराज । दोष दिखावन है बेकाज ॥ ११६ ॥  
 हम नियोग औसर यह भाय । तातें करे वीनती आय ॥  
 धरिये देव महाव्रत भार । करिये कर्मसत्रुसंधार ॥ ११७ ॥  
 हरिये भरम तिमिर सर्वथा । सूभै सुरगमुकतिपथ जथा ॥  
 यों थुति करि बहुभाव दिढ़ाय । बारबार चरनन सिर नाय ॥ ११८ ॥  
 साधि नियोग<sup>१०</sup> गये निजथान । लोकांतिक सुर बड़े सयान ॥  
 अब चौबिध इन्द्रादिक देव । चढ़ि निज निज बाहन बहुभेव ॥ ११९ ॥  
 हर्षित उर परिवारसमेत । आये तृतीय-कल्याणक<sup>११</sup> हेत ॥  
 सुर वनिता नाचें रस भरिं । गावें मधुरगीत किन्नरीं ॥ १२० ॥  
 बाजे विबिध बजैं तिस बार । करे अमरगन जय जय कार ।  
 सोवन<sup>१२</sup>-कलस भरे सुरराय । विमल छीरसागर-जल लाय ॥ १२१ ॥  
 हेमासन<sup>१३</sup> थापे जिनराय । उच्छ्रवसहित न्हौन-बिधि ठाय ॥  
 भूषन वसन सकल पहिराय । चंदनर्चाचित कीनी काय ॥ १२२ ॥  
 इस औसर प्रभु सोहैं एम । मोखबबूवर दूलह जेम ॥

१. कठिनता से तरनेयोग्य २. समुद्र ३. जहाज ४. पोल ५. किवाड़ ६. म्होर=सील  
 ७. प्रवेश ८. उपदेश योग्य ९. बेकार १०. नियम से होनेवाला कार्य ११. तप  
 कल्याण १२. सोने के १३. स्वर्ण सिंहासन ।

कहि वैराग वचन जिन तबं । प्रतिबोधे<sup>१</sup> परिजन जन सबं ॥  
 अति हठसों समझाई माय । लोचन भरे वदन विलखाय ॥  
 विमला नाम पालकी साज । आनी इन्द्र चढ़े जिनराज । १२४  
 पहले भूमिगोचरी<sup>२</sup> राय<sup>३</sup> । सात पैड़ लोनी सुखदाय ॥  
 फिर विद्याधर राजा रले । पैड़ सात ही ते ले चले ॥ १२५ ॥  
 पीछें इन्द्रादिक सुरसंघ । कांधें धरी चले पुर लंघ ॥  
 ना अति निकट न दीसैं दूर । नभ मारग देखें जन भूर ॥ १२६ ॥

दोहा ।

जिस साहबकी<sup>४</sup> पालकी, इन्द्र उठावनहार ॥

तिस गुनमहिमा-कथन अब, पूरन होउ अपार ॥ १२७ ॥

चौपई ।

यों सुर नर हरषित भये । अस्व नाम वनमें चलि गये ॥  
 बड़तरुतलें सिला सुभ जहां । कीनों सचो<sup>५</sup> सांथिया तहां ॥  
 उतरे प्रभु अति उत्तम ठाम । सांत भयौ कोलाहल ताम ॥  
 सत्रुमित्र ऊपर समभाव । तिन-कंचन गिन एकसुभाव ॥ १२८ ॥  
 सोमभाव<sup>६</sup> स्वामी उर धार । पटभूषण<sup>७</sup> सब दीनैं डार ॥  
 उदासीन उत्तरमुख भये । हाथ जोर सिद्धन प्रति नये ॥ १२९ ॥  
 दुबिध परिग्रह तजि परमेस । पंच<sup>८</sup>-मुष्टि लोचे<sup>९</sup> सिरकेस ॥  
 सिवकामिनिकी दूती जोय । धरी दिगंबरमुद्रा सोय ॥ १३० ॥

१. समझाये २. पृथ्वी पर चलने वाले ३. राजा ४. पदवीधारी पुरुष  
 ५. इन्द्राणी ६. सौम्यभाव ( रागद्वेष रहित ) ७. वस्त्राभूषण ८. पांच मुष्टी  
 ९. उच्चाड़े ।

दोहा ।

सोहै भूषन वसन बिन, जातरूप<sup>१</sup> जिनदेह ॥  
 इन्द्र नीलमनिकौ किधौ, तेजपुंज सुभ येह ॥१३२॥  
 पोह<sup>२</sup> प्रथम एकादसी, प्रथम पहर सुभ वार ॥  
 पद्मासन श्रीपार्सजिन, लियौ महाव्रतभार ॥१३३॥  
 और तीनसँ छत्रपति, प्रभुसाहस अविलोय ॥  
 राज छारि संयम धरघौ, दुखदावानल-तोय<sup>३</sup> ॥१३४॥  
 तब सुरेस जिनकेस सुचि, छीरसमुद पहुँचाय ॥  
 कर थुति साधनियोग सब, गयौ सुरग सुरराय ॥१३५॥

चौपई ।

अब स्वामी बनथान मनोग । तेला<sup>४</sup> थापि दियौ जिन जोग ॥  
 अट्टाईस मूलगुन भाख । उत्तरगुन चौरासी लाख ॥१३६॥  
 सब प्रभु धरे परम समचेत<sup>५</sup> । अचल अंग मुख मौनसमेत ॥  
 यों बन बसत उपन्यौ जान । संजमबल ननपर्जयग्यान १३७

सोरठा ।

लघु वयमै<sup>६</sup> जगपाल, कियौ निबीरज<sup>७</sup> कामदल<sup>८</sup> ॥  
 धीरज धनुष संभाल, तिनके पदनीरज<sup>९</sup> नमू<sup>१०</sup> ॥१३८॥

इति श्रीपार्श्वपुराणभाषायां भगवद्वै राग्यप्राप्तदीक्षाकल्याणकवर्णनं  
 नाम सप्तमोऽधिकारः ।

१. नग्न २. पीष ३. जस ४. तीन दिन के उपवास ५. समान चित्तवाले  
 ६ उम्र में ७ शक्तिहीन ८. कामदेव की सेना ९. चरणकमल ।

## आठवाँ अधिकार

सोरठा ।

जाप्रभुकौ जसहंस<sup>१</sup>, तीनलोक पिंजरें बसैं ॥

सो मम पाप विधंस, करौ पास परमेस नित ॥१॥

चोपई ।

अब जिन उठे जोग-अवसान । देहहेत उद्यम उर आन ॥

परमउदास अधोगत<sup>२</sup> दीठ<sup>३</sup> । सहजसांतमुद्रा मनईठ<sup>४</sup> ॥२॥

दया-नीर-निर्मल-परबाह । गुलर-खेटपुर पहुंचे नाह<sup>५</sup> ॥

लाभ अलाभ बराबर धार । निर्धन धनकौ नाहि विचार ॥३॥

ब्रह्मदत्त भूपति बड़भाग । प्रभुकों देखि बड़चौ उरराग ॥

उत्तमपात्र सकलगुनधाम । करि प्रनाम पड़िगाहे ताम ॥४॥

हेमासन थाप्यौ नरराय । प्रासुक जल परछाले<sup>६</sup> पाय ॥

आठभांति पूजा विस्तरी । हाथ जोर अंजुलि सिर धरी ॥५॥

मन-तन-वायक<sup>७</sup> सुद्धसरूप । नौ दातागुनसंजुत भूप ॥

सुद्ध अन्न दीनों परवीन । प्रासुक मधुर दोषदुखहीन ॥६॥

उत्तमपात्र दानविधि करी । तीनभवन कीरति विस्तरी ॥

पंचाचरज भये नृपधाम । फिर स्वामी आये बन-ठाम ॥७॥

करें घोर तप साधें जोग । दरसन करत मिटें सब सोग ॥

अचल अंग मुख सोहै मौन । एकचित्त निजपद चितौन<sup>८</sup> ॥८॥

१. कीर्ति रूपी हंस २. नीचे देखना ३. दृष्टि ४. मन को माने वाली ५. नाथ

६. घोये ७. बचन ८. चित्तन ।

ज्यों समुद्रजल विगतकलोल<sup>१</sup> । अथवा सुरगिरिसिखर अडोल ।  
तथा नीलमनि-प्रतिमा येह । यों अकंप राजे जिनदेह ॥६॥

चोपई ।

वंर भाव छांडघी वन जीव । प्रीत परस्पर करे अतीव ॥  
केहरि आदि सतावे नार्हि । निविष भये भुजग बनमार्हि ।१०।  
सील सनाह<sup>२</sup> सजौ सुचिरूप । उत्तरगुनआभरन<sup>३</sup> अनूप ॥  
तपमय धनुष धरघी निजपान । तीन रतन ये तोखनवान ।११।  
समताभाव चढ़े जगसीस । ध्यान कृपान लियौ कर ईस ॥  
चारित-रग-महीमें धीर । कर्मसत्रुविजयी वरबीर ॥१२॥

दोहा ।

स्वामीकी सबपर दया, सबहीके रक्षपाल<sup>४</sup> ॥  
जगविजयी मोहादि रिपु, तिनके प्रभु छयकाल<sup>५</sup> ॥१३॥

सोरठा

देखो पीन<sup>६</sup> प्रचंड<sup>७</sup>, दूब न खंडे दूबरी<sup>८</sup> ।  
मौटे बिरछ<sup>९</sup> विहंड<sup>१०</sup>, बड़े बड़ो ही बल करे ॥१४॥

\* उक्तं च—

नोकिञ्चित्करकाथ्यंमस्ति गमनप्राप्यं न किञ्चिद्दृशो—  
हंश्यं यस्य न कर्णयोः किमपि हि श्रोतव्यमप्यस्ति न ।  
तेनालम्बितपासिरुज्जिभ्रतगतिर्नासाग्रदृष्टी रहः ।  
सम्प्राप्तोऽतिनिराकुलो विजयते ध्यानैकतानो जितः ।

१. लहर रहित २. साथ ३. आभूषण ४. रक्षक ५. अथ करने वाला काल

६. हवा ७. तेज ८. कमजोर ९. वृक्ष १०. खंडित करना ।

दोहा ।

यों दुद्धर तप करत अति, धर्मध्यानपदलीन ॥

चार मास छद्मस्त<sup>१</sup> जिन, रहे रागमलहीन ॥१५॥

चौपई ।

एक दिवस दीच्छावन जहां । जोगलीन प्रभु निवसें तहां ॥

काउसग<sup>२</sup> तन विगतविरोध । ठाड़े जिनवर जोगनिरोध ॥१६॥

संवर नाम जोतिषी देव । पूरवकथित कमठचर एव ॥

अटक्यौ अंबर<sup>३</sup> जात विमान । प्रभु पर रह्यौ छत्रवत आन ॥१७॥

ततखिन<sup>४</sup> अवधिग्यानबल तबै । पूरव बंर संभालो सबै ॥

कोप्यौ अधिक न थांभ्यौ जाय । राते<sup>५</sup> लोयन<sup>६</sup> प्रजुली<sup>७</sup> काय<sup>८</sup> ॥

आरंभ्यौ उपसर्ग महान । कायर देखि भजे भयमान ॥

अंधकार छापी चहुंओर । गरज गरज बरखें घन घोर ॥१८॥

भरै नीर मुसलोपम धार । वक्र<sup>९</sup> बीज<sup>१०</sup> भूलकं भयकार ॥

बूड़े गिरि तरुवर बनजाल । भंभा वायु बही विकराल ॥२०॥

जल थल भयौ महोदधि<sup>११</sup> एम । प्रभु निवसें कनकाचल<sup>१२</sup> जेम ॥

दुष्ट विक्रियावल अविवेक । और उपद्रव करे अनेक ॥२१॥

छप्पय ।

किलकिलंत बेताल<sup>१३</sup>, काल कज्जल<sup>१४</sup> छबि सज्जहि ।

भौ कराल विकराल, भाल मदगज जिमि गज्जहि ॥

१. केवलज्ञान के पूर्व की दशा, २. कायोत्सर्ग ३. आकाश ४. इसी समय  
५. लाल ६. आखें ७. जनी ८. शरीर ९. टेढी १०. बिजली ११. समुद्र  
१२. सुमेरु १३. व्यंतरदेव १४. काजल के समानकाले ।



मुंडमाल<sup>१</sup> गल धरहिं, लाल लोयननि डरहिं जन ।  
 मुख फुलिग<sup>२</sup> फुंकरहिं, करहिं निर्दय धुनि हन हन ॥  
 इहि बिध अनेक दुर्भेष<sup>३</sup> धरि, कमठजोव उपसर्ग किय ।  
 तिहुंलोकबंद जिनचंद्रप्रति, धूलि डाल निज सोस लिय ॥२२॥  
 दोहा ।

इत्यादिक उतपात सब, वृथा भये अति घोर ।  
 जैसे मानिक दीपकों, लगै न पौन भकोर ॥२३॥  
 प्रभु चित चलयौ न तन हल्यौ, टल्यौ न धोरज ध्यान ।  
 इन अपराधी क्रोधवस, करी वृथा निज हान ॥ २४ ॥  
 पावक<sup>४</sup> पकरं हाथसों, अवसि<sup>५</sup> हाथ जलि जाय ।  
 परके तन लागै नहीं वाके पुन्यसहाय ॥ २५ ॥  
 प्राणी विषयकषायवस, कौन कौन विपरीत ।  
 करत हरत कल्याण निज, जलौ जलौ यह रीत ॥ २६ ॥  
 प्रभु अचित्य<sup>६</sup> -महिमा-धनी, त्रिभुवनपूजित-पाय ।  
 तिनके यह क्यों संभवे, सुर उपसर्ग कराय ॥ २७ ॥  
 इहि बिध जो कोई पुरुष, पूछै संसय राखि ।  
 ताके समुक्तावन निमित्त, लिखूं जिनागम साखि ॥२८॥  
 चौपई ।

अवसर्पनि उतसर्पनि काल । होंहि अनंतानंत विसाल ॥  
 भरत तथा ऐरावतमाहिं । रंहटघटीवत आवैं जाहिं ॥३१॥

१. कटे शिरो की माला २. प्राग ३. छोटे भेष ४. अग्नि ५. अवश्य  
 ६. चित्तन में न आने योग्य ।

जब ये असंख्यात परमान, बीते जुगम<sup>१</sup> खेत भू थान ॥  
 तब हुंडावसर्पनी एक । परे करे विपरीत अनेक ॥ ३२ ॥  
 साकी रीत सुनो मतिवंत । सुखमा-दुखमा कालके अंत ।  
 बरखादिककौ कारन पाय । विकलत्रय<sup>२</sup> उपजे बहु भाय ॥ ३३ ॥  
 कलपबिरछ विनसैं तिहि बार । बरतैं कर्मभूमि-व्योहार ॥  
 प्रथम जिनेस प्रथम चक्रेस । ताही समय होहि इहि देश ॥ ३४ ॥  
 विजयभंग चक्रोकी होय । थोड़े जीव जाहि सिवलोय ॥  
 चक्रवर्ति विकल्प विस्तरैं । ब्रह्मवंसकी<sup>३</sup> उतपति करैं ॥ ३५ ॥  
 पुरुष सलाका चौथे काल । अट्टावन उपजे गुनमाल ॥  
 नवम आदि सोलह परजंत । सात तीर्थमें धर्म नसंत ॥ ३६ ॥  
 ग्यारह रुद्र<sup>४</sup> जनम जहें धरैं । नौ कलिप्रिय<sup>५</sup> नारद अवतरैं ।  
 सत्तम तेईसम गुनवर्ग । चरमजिनेश्वरकौ<sup>६</sup> उपसर्ग ॥ ३७ ॥  
 तीजे चौथेकालमंभार । पंचममें दीसैं बड़वार ॥  
 विविध कुदेव कुलिगी लोग । उत्तमधर्म नासके जोग ॥ ३८ ॥  
 सबर<sup>७</sup> विलाल<sup>८</sup> भील चंडाल । नाहलादि<sup>९</sup> कुलमें विकराल  
 कल्की उपकल्की कलिमाहि । बयालीस ह्वैं मिथ्या नाहि ॥ ३९ ॥  
 अनावृष्टि अतिवृष्टि विख्यात । भूमिवृद्धि वज्रागनिपात ॥  
 ईतभोत इत्यादिक दोष । कालप्रभाव होहि दुखपोष ॥ ४० ॥

दोहा ।

यों त्रिलोक प्रज्ञप्तिमें, कथन कियौ बुधराज ।

सो भविजन अवधारियौ, संसयमेटनकाज ॥ ४१ ॥

१. दोनों क्षेत्रों में २. दो, तीन, चार इन्द्रिय जीव ३. ब्रह्मण्यवंश ४. महादेव  
 ५. कलह प्रिय ६. अन्तिम ७-८-९ नीच जाति ।

## गीता

तीसरे कालहं मुकति साधें, प्रथमतीर्थंकर सही ।  
 पुनि तीन तीरथ होहिं चक्री, एक हरि' जिनवर वही ॥  
 इस भांति चौथे जुग सलाका पुरुष ऊने अवतरें ।  
 हुंडावसर्पिनिमें अठावन जीब वासठ पद धरें ॥४२॥

चौपई ।

तब फनेस<sup>२</sup> आसन कंपियौ । जिनउपकार सकल सुधि कियौ ।  
 ततखिन पदमावति ले साथ । आयौ जहँ निवसैं जिननाथ ॥४३॥  
 करि प्रणाम परदछना दई । हाथ जोरि पदमावति नई ॥  
 फनमंडप कीनौ प्रभुसीस । जलबाधा व्यापै नहि ईस ॥४४॥  
 नागराज<sup>३</sup> सुर देख्यौ जाम । भाज्यौ दुष्ट जोतिषी ताम ॥  
 हीनजोग सूधी यह बात । भागि जाय तबही कुसलात ॥४५॥  
 अब सब कोलाहल मिट गये । प्रभु सत्तमधानक<sup>४</sup> थिर भये ।  
 बिकलपरहित चिदातमध्यान । करे कर्मछ्यहेत महान ॥४६॥  
 सात प्रकृति चौथे गुनठान । पहले नास करीं भगवान ॥  
 अब ह्यां धर्मध्यानबल धोर । तीन प्रकृति जीती बरबोर ॥४७॥  
 प्रथम सुकल पदसौ परनये । खिपकसेनिमारग पर ठये ॥  
 प्रकृति छतीस नवें छ्य करी । दसवें लोभप्रकृति प्रभु हरो ॥४८॥

दोहा ।

एकादसम<sup>५</sup> उलंघिपद, चढ़े बारहैं थान ॥

कर्मप्रकृति सोलह तहां, नास करी अवसान<sup>६</sup> ॥४९॥

१. नारायण (किन्तु यहाँ कामदेव होता चाहिए) २. धरणेन्द्र ३. धरणेन्द्र  
 ४. अप्रमत्त गुणस्थान ५. उपनान्त मोह ६. अंत ।

चौपई ।

इहिविध त्रेसठ प्रकृति निवार । घाते कर्म घातिया चार ॥  
 चंतअंधेरी चौदस जान । उपज्यौ प्रभु के पंचम<sup>१</sup> ग्यान ॥५०॥  
 लोकालोक चराचर भाव । बहुबिध परजयवंत सुभाव ॥  
 ते सब आन एक ही बार । भूलके केवलमुकुर<sup>२</sup> मंभार ॥५१॥  
 भये अनंत चतुष्टयवंत । प्रगटी महिमा अतुल अनंत ॥  
 दिव्य परम औदारिक देह । कोटि भानुदुति जीतो जेह ॥५२॥  
 अलौकीक अद्भुत संपदा । मंडित भये जिनेसुर तदा ॥  
 बचनअगोचर महिमा सार । बरनन करत न पइये पार ॥५३॥

दोहा ।

पांच हजार प्रमान धनु<sup>३</sup>, उपजत केवलग्यान ॥  
 अंतरिच्छ<sup>४</sup> प्रभु तन भयौ, ज्यों ससि अंबरथान ॥५४॥

चौपई ।

प्रकटी केवल रविकिरन जाम । परिफूल्यौ त्रिभुवन कमल ताम  
 आकास अमल दीसै अनूप । दिसि-विदिसि भई सब विमलरूप  
 सुरलोक बजै घंटागरिष्ट । तरु करन लगे तहां पुहपविष्ट ॥  
 इद्रासन कांपे अतिगरीस । आनअ<sup>५</sup> भये मनिमुकुट सीस ॥५६॥  
 इत्यादिक बहुबिध चिह्न चार । प्रभु केवलसूचक भये सार ॥

\* उक्तं च गाया—

जादे केवलगाणे परमोदारं जिणाणं सध्वाराणं ।

गच्छदि उबरै चावा पंचसहस्राणि वसुहाभो ।

१. केवलज्ञान २. काच ३. धनुष ४. आकाश ५. कुम्भे ।

तब अबधि जोड़ि जान्यौ सुरेस । छय करे कर्म पारसजिनेस ५७  
 सिंहासन तजि निज सीसनाय । प्रनमो परोख सुख उर न माय  
 इंद्रानी पूछै कहहु कंत<sup>१</sup> । क्यों आसन तजि उतरे तुरंत ॥५८॥  
 किस कारन स्वामो नयौ सीस । याकौ प्रतिउत्तर देहु ईस ॥  
 तब बोले विकसित देवराज । प्रभु उपज्यौ केवलग्यान आज ॥  
 ऐरावतगज सजि सपरिवार । प्रथमेंद्र चलयौ आनंद अपार ॥  
 बाजे बहु पटह<sup>२</sup> पयान<sup>३</sup>-भंर । सब बरनन करत लगं अबेर ॥६०॥  
 ईसानप्रमुख सब स्वर्गनाथ । निजबाहन चढ़ि चढ़ि चले साथ ॥  
 हरिनाद<sup>४</sup> सुन्यौ जोतिषी देव । चंद्रादि चले तब पंच भेव<sup>५</sup> ॥६१॥  
 भावन-घर बाजे संख भूरि । दसबिध सुर निकसे हरष पूरि<sup>६</sup> ॥  
 वसु<sup>७</sup> बितर-घर गरजे निसान । यों परिजन सब कीनों पयान ॥६२॥  
 यों चली चतुरबिध सुरसमाज । जिन-केवलपूजा करन काज ॥  
 अंबर तजि आये अबनिमाहि । जहँ समोसरन धुज फरहराहि  
 जो सुरपतिकौ उपदेश पाय । धनपतिने<sup>८</sup> कीनों प्रथम आय ॥  
 वर पंचवरन मनमय अनूप । जगलक्ष्मीकौ कुलगृह सरूप ॥६४॥

दोहा ।

समोसरनको संपदा, लोकोत्तर तिहुं भौन ।

वचनद्वार बरनं तिसै, सो बुध समरथ कौन ॥६५॥

सोरठा ।

पै थल अबसर पाय, धर्मध्यानकारन निरखि ॥

लिख्यौ लेस मन लाय, पढ़त सुनत आनंद बढ़ै ॥६६॥

१. स्वामो २. नक्कारा ३. गमन का बाजा ४. सिंह की ध्वनि ५. भेद  
 ६. पूर्ण ७. आठ ८. कुवेर ।

चीपई ।

पहले गोलपीठिका <sup>१</sup> ठई । इद्रनोलमनिमय निर्मई ॥  
 पांच कोस चौड़ी परवान । तीनलोक उपमा नहि आन ॥  
 जाके चहुंदिस गिरदाकार<sup>२</sup> । बनी पंडिका<sup>३</sup> बीसहजार ॥  
 हाथ हाथपर ऊंचो लसैं । नभपरजंत देखि दुख नसैं ॥६७॥  
 तापर धूलीसाल उतंग । पंचरतनरजमय सरबंग ॥  
 विविध बरनसों बलयाकार<sup>४</sup> । भूलकै इन्द्रधनुष उनहार ॥६८॥  
 कहीं स्याम कहि कंचनरूप । कहि विद्रुम कहि हरित अनूप ॥  
 समोसरन लछमीकौ एम । दिपै जड़ाऊ कुंडल जेम ॥६९॥  
 चारों दिसि तोरन बन रहे । कनक थंभ ऊपर लहलहे ॥  
 आगे मानभूमि है जहां । मानथंभ<sup>५</sup> चारोंदिसि तहां ॥७०॥  
 तिनकी प्रथम पीठिका बनी । सोलह पंडी संजुत ठनी ॥  
 चार चार दरवाजे ठान । तीन तीन तहां कोट महान ॥७१॥  
 तिनमें और त्रिमेखलपीठ<sup>६</sup> । तिनपै मानथंभ थिर दीठ ॥  
 अति उतंग कंचनके ठये । छत्रधुजादिकसों छबि छये ॥७२॥  
 जिनै देखि मानी मद-बढ़े । उतरे मान-महागिरि-चढ़े ॥  
 मूलभाग प्रतिमा मनहरें । इंद्रादिक पूजा विसतरें ॥७३॥  
 एक एक दिसि चहुं दिसि ठई । सहज वारिपका<sup>७</sup> वारिज-छई  
 नंदादिक सुभ जिनके नाम । चारों दिसि सोलह सुखधाम ॥  
 आगे खाई सोभित खरी । औड़ी अधिक विमलजलभरी ॥  
 रतन-तीर राजें चहुंओर । हंसकलाप<sup>८</sup> करें जहं सोर ॥७४॥

१. चवुतरा २. गोनाकार ३. सीढियां ४. गोल ५. मानस्तम्भ ६. त्रि  
 मेखला वाला चवुतरा ७. बावड़ी ८. हंसों का समूह ।

दोहा ।

बलयाकृति<sup>१</sup> खाई बनी, निमल जल लहरेय ।

किधौ विमल गंगानदी, प्रभु परदछना देय ॥७६॥

चौपई

आगे पुहपबेल<sup>२</sup>-बन सार । महासुगंध<sup>३</sup> मधुपमुखकार ॥  
 सघन छांह सब रितुके फूल । फूले जहां सकल सुखमूल ॥७७॥  
 याकै कछु अंतर दुति धरे । कंचन कोट प्रथम मनहरै ॥  
 बलयाकृति अति उन्नत जेह । मानौ मानुषोत्र गिरि येह ॥७८॥  
 चहुँदिसि सोहैं चार दुवार । रूपमई तिखने मनहार ॥  
 रतनकूट ऊपर जगमगै । लाल बरन अतिसुन्दर लगै ॥७९॥  
 किधौ अरुन-छबि हाथ उठाय । जगलछमी नाचै बिहसाय ।  
 नौनिधि जहां रहैं अभिराम । पिगलादि हैं जिनके नाम ॥८०॥  
 प्रभुअजोग<sup>४</sup> गिन दीनी छार<sup>५</sup> । वे मचली<sup>६</sup> सेवै दरवार ॥  
 मंगल दरव एकसौ आठ । धरे प्रतेक मनोहर ठाठ ॥८१॥  
 गावै जिनगुन देवकुमार । और विविध सोभा तहं सार ॥  
 वितरदेव खड़े दरवान । बिनयहीनको देहि न जान ॥८२॥  
 यह पहले गढ़की बिधि कही । आगे और सुनौ अब सही ॥  
 गोपुर<sup>७</sup> तजि चारौ दिसि गली । गमनहेत भोतरकौ चली ॥८३॥  
 तहां निरतसाला दुहुँ पास । सब दिसिमैं जानौ सुखवास ॥  
 सुवरनथंभ फटिकमय भीत । तिखनी<sup>८</sup> मनिमय सिखर पुनीत

१. गोल २. पुष्प बेल ३. मोरे ४. अयोग्य ५. रात्र ६. गिरीपद्मी  
 ७. दरवाजे ८. तीन मन का ।

सुरवनिता नाचै तहँ एम । लावन-तोय-तरंगनि<sup>१</sup> जेम ॥  
 मंदहास मुख सोहँ खरीं । जिनमंगल गावें सुखभरीं ॥८५॥  
 बाजं बोन बांसली ताल । महा मुरजधुनि होय रसाल ॥  
 आगे बीथी अंतर धरे । दोनों दिसा धूपघट भरे ॥८६॥

सोरठा ।

स्याम वरन यह जानि, धूप धुआं नभकीं चलयौ ।  
 किधौ पुन्य-डर मानि, धुआं मिस पातक<sup>२</sup> भज्यौ ॥८७॥

चौपई ।

आगे चार बाग चहुँ ओर । प्रथम असोक नाम चितचोर ॥  
 सप्तपरन चंपक सहकार । ये इनकी संग्या<sup>३</sup> अविधार ॥८८॥  
 सब रितुके फल-फूलन-भरे । बिरछ बेलसौ सोहत खरे ॥  
 वापीमंडप महल मनोग । राजं जहां जथाबिध जोग ॥८९॥  
 चैत-बिरछ ऋतों बनमार्हि । मध्यभागसुन्दर छबि छार्हि ॥  
 जिनमुद्रामडित मन हरे । सुर नर नित पूजा विस्तरें ॥९०॥  
 बाग ओट बेदी चहुँओर । चार द्वारमंडित छबि-जोर ॥  
 अब इस बन-बेदीतें सही । गढ़परजंत गली जे रही ॥९१॥  
 तिनमें धुजापांति फहरार्हि । कंचनथंभ लगी लहरार्हि ॥  
 दसप्रकार आकार समेत । तिनके भेद सुनौ सुखहेत ॥९२॥  
 माला वसन<sup>४</sup> मोर अरविद<sup>५</sup> । हंस गरुड़ हरि वृषभ गयंद<sup>६</sup>  
 चक्रसहित दस चिहन मनोग । धुजा दुकूलनि<sup>७</sup> सोहँ जोग ॥



ये दस एक जातकी जान । एक एकसौ आठ प्रमान ।  
 दससँ असी सबें मिल भई । एक दिसामें सब बरनई ॥६४॥  
 चारों दिसिकी जोड़ सरीस । चार हजार तीनसँ बीस ॥  
 यह परमित जिनसासनमाहि । अतिविचित्र सोभा अधिकाहि ॥  
 हालें धुजा पवन-वस येह । जिनपूजन भवि आये जेह ॥  
 पंथखेद तिनकी मन आन । करत किधौं सतकार-विधान ॥६६  
 मानथंभ धुजथंभ अनूप । चैतबिरछ बेदी गढरूप ॥  
 इत्यादिक ऊंचे इकसार । जिन-तनतें बारह गुन धार ॥६७ ।  
 आगे रजतमयी निरमान<sup>१</sup> । तुंग<sup>२</sup> कोट अति धवल महान ।  
 किधौं सेत प्रभु-सुजस-प्रकास । फेरी देय फिरधौ चहुंपास ॥६८  
 पूरबवत दरवाजे चार । रतनमई अनुपमछबि-धार ॥  
 नौनिधि मंगलदरब समाज । तोरनप्रमुख और सब साज ॥६९  
 प्रथमकोटबरननसम जान । ठाड़े भवन देव दरवान ॥  
 यासौं लगी और अब गली । चारों तरफ एक सी चली ॥१००  
 कलपबिरछ-बन राजें तहां । दस बिध कलपतरोत्रर जहां ॥  
 भूषन वसन लगे जिन डार । सोभा कहत न लहिये पार ॥  
 मध्यभाग जिनबिंबसमेत । सिद्धारथ<sup>३</sup> तरुवर छबि देत ॥  
 चहुंदिसि बेदी चहुं दिसि द्वार । रचना और अनेक प्रकार ॥  
 इस बेदीके बाहर भाग । आगे फटिक कोट लौं लाग ॥  
 अति विचित्र महलनकी पांति । जिन सिर रतनकूट बहुभांति

चंद्रकांतिमनि-भासुर<sup>१</sup> भीत । सुवरनमय तहां थंभ पुनीत ॥  
 सुरनरनाग रमें जिनमाहिं । किन्नरगन बहु केलि कराहिं ॥१०१॥  
 बीथी<sup>२</sup> मध्यदेस सुभरूप । पद्मराग-मनिमय नव तूप ॥  
 धुजा छत्र घंटा छबि देहिं । जिनमुद्रासौं मन हर लेहिं ॥१०२॥  
 आगं तृतीय कोट बन एम । फटिकमई निर्मल नभ जेम ॥  
 अति उतंग सो बलयाकार । लालबरन मनिनिर्मित द्वार ॥  
 और कथन पूरबवत जान । ठाड़े सुरगदेव दरवान ॥  
 महामनोहर लोचनहारि । अनुपमसोभा अचरजकारि ॥१०३॥  
 अब सुनि मध्य भूमिकी कथा । फटिककोटभीतर विधि जथा ॥  
 गढ़सौं प्रथमपीठ लग लगी । फटिकभीत सोलह जगमगी ॥१०४॥  
 तिनपे रतनथंभ छबि देहिं । प्रभा-<sup>३</sup>जालसौं तम हर लेहिं ॥  
 तिनहीपे श्रीमंडप छयौ । फटिकमई नभमें निरमयौ ॥१०५॥

सोरठा ।

या श्रीमंडपमाहिं, निराबाध<sup>४</sup> तिहुं जग बसें ।

भीर<sup>५</sup> होय तहां नाहिं, त्रिभुवनपति अतिसय अतुल ॥११०॥

चौपई ।

भीतन बीच गली जे रहीं । बारहसभा तहां जिन कहीं ॥  
 बेंठे मुनि अपछर अज्जिया<sup>६</sup> । जोतिष-वान-असुर-सुर-तिया ।  
 भावन वितर जोतिषि देव । कल्पनिवासी नर-पसु एव ॥  
 तिनमें प्रथम पीठिका ठई । अनुपम बेंडूरज-मनिमई ॥११२॥

मोरकंठवत आभा जास । सोलह पैंड साल चहुँ पास ॥  
 बारह सभा महा दिसि चार । तिनकों यह पथ सोलह सार ।  
 मंगलदरब जहां सब धरे । जच्छदेव सेवक तहां खरे ॥  
 धमंचक्र तिनके सिर दिपे । जिनकों देखि दिवाकर<sup>१</sup> छिपे ११४  
 तापर दुतिय पोठिका बनी । चामोक<sup>२</sup>रमय राजत घनी ॥  
 मेरुशृङ्गवत<sup>३</sup> उन्नत एम । जगमगाय मंडल रवि जेम । ११५।  
 आठधुजा आठौं दिसि जहां । तिन सोभा बरनन बुधि कहां ।  
 तिनमें आठ चिहन चित्राम । चक्र गयंद वृषभ अभिराम ११६  
 वारिज वसन केहरीरूप । गरुड़ माल आकार अनूप ॥  
 मंदपवनवस हालें जेह । किधौं पापरज भारत येह ॥ ११७॥  
 तापर तृतिय पोठिका और । तीन मेखला-मंडित ठौर ॥  
 सर्वरतनमय भलकत खरी । किरन जास दस दिसि विस्तरी ॥  
 गंधकुटी तहां बनी अनूप । पंचरतनमय जड़ित सरूप ॥  
 जाके चार द्वार चहुँओर । भलकें मानिक होरा-होर । ११८।  
 तीनपीठ सिर सोहत खरी । किधौं<sup>३</sup> त्रिजगच्छबि नीची करी  
 परम सुगंध न बरनी जाय । सुन्दर सिखर धुजा फहराय ॥  
 तहां हेम-सिंहासन सार । तेजसरूप तिमिर छयकार ॥  
 नानारतन प्रभामय लसैं । जगलछमी प्रति किरनन हसैं ॥  
 वचनगम्य नहिं सोभा जहां । अंतरीच्छ<sup>४</sup> प्रभु राजें तहां ॥  
 त्रिभुवनपूजित पासजिनेस । ज्यों जगसिखर सिद्धपरमेस ॥

दोहा ।

समवसरन रचना अतुल, ताकौ अति विस्तार ।

संपति श्रीभगवानकी, कहत लहत को पार ॥१२३॥

सोरठा ।

जिन-बरनन-नभमाहि, मुनि विहंग उद्यम करें ।

पै उड़ि पार न जाहि, कौन कथा नर दीनकी ॥१२४॥

गीता

राजत उपंग असोक तरुवर, पवनप्रेरित थरहरें ॥

प्रभु निकट पाय प्रमोद नाटक, करत मानों मनहरें ॥

तिस फूलगुच्छन भ्रमर गुंजत, यही तान सुहावनी ।

सो जयौ पासजिनेन्द्र, पातकहरन जगचूडामनी ॥१२५॥

निज मरन देखि अनंग डरप्यौ, सरन दूँढत जग फिरचौ ।

कोऊ न राखे चोर प्रभुकौ, आय पुनि पायन गिरचौ ॥

यों हार निज हथियार डारे, पुहप-बरसा मिस भनी ।

सो जयौ पासजिनेन्द्र, पातकहरन जगचूडामनी ॥१२६॥

प्रभु अंग नील उतंग नगतै<sup>२</sup>, वानि<sup>३</sup> सुचि सीता ढली<sup>४</sup> ।

सो भेदि भ्रम गजदंत पर्वत, ग्यानसागरमें रली ॥

नय सप्तभंगतरंगमंडित, पापतापविधसनी ।

सो जयौ पासजिनेन्द्र, पातकहरन जगचूडामनी ॥१२७॥

चंद्राचिचय<sup>५</sup> छबि चारु चंचल, चमरवृंद सुहावने ।

ढोलें निरंतर जच्छनायक, कहत क्यों उपमा बने ॥

१. शिखामणी २. पहाड़ ३. वाणी ४. चयी ५. चन्द्रिका ।

यह नीलगिरिके सिखर मानौ, मेघभर लागी घनी ।  
 सो जयौ पासजिनेंद्र, पातकहरन जगचूड़ामनी ॥१२८॥  
 हीराजवाहरखचित<sup>१</sup> बहुबिध, हेमआसन राजए ।  
 तहं जगतजनमनहरन प्रभुतन, नीलवरन विराजए ॥  
 यह जटित वारिज<sup>२</sup> मध्य मानौ, नीलमनिकलिका<sup>३</sup> बनी ।  
 सो जयौ पासजिनेंद्र, पातकहरन जगचूड़ामनी ॥१२९॥  
 जगजीत मोह महान जोधा, जगतमें पटहा दियो ।  
 सो सुकलध्यान कृपानबल, जिन बिकट बंदी बस कियो ॥  
 ये बजत विजय निसान दुंदुभि, जीत सूचं प्रभुतनी ।  
 सो जयौ पासजिनेंद्र, पातकहरन जगचूड़ामनी ॥१३०॥  
 छदमस्त पदमें प्रथम दरसन, ग्यान चारित आदरे ।  
 अब तीन तेई छत्र छलसौं, करत छाया छबि-भरे ॥  
 अति धवलरूप अनूप उन्नत, सोमबिबप्रभा<sup>४</sup> हनी ।  
 सो जयौ पासजिनेंद्र, पातकहरन जगचूड़ामनी ॥१३१॥  
 दुति देखि जाकी चांद सरमें<sup>५</sup>, तेजसौं रवि लाजए<sup>६</sup> ।  
 अब प्रभामंडलजोग जगमें, कौन उपमा छाजए ॥  
 इत्यादि अतुल विभूतिमंडित, सोहिए त्रिभुवनधनी ।  
 सो जयौ पासजिनेंद्र, पातकहरन जगचूड़ामनी ॥१३२॥  
 यों असम<sup>७</sup> महिमासिंधु साहब, सक्र<sup>८</sup> पार न पावही ।  
 तजि हासभय तुम दास 'भूधर', भगतिवस जस गावही ॥

१. जड़ित २. कमल ३. कली ४. चन्द्रबिब ५-६. सज्जितहो ७. उपमारहित

अब होउ भव भव स्वामि मेरे, मैं सदा सेवक रहों ।  
कर जोर यह बरदान मांगों मोखपद जावत' लहों । १३३।

चौपई ।

इह विध समोसरनमंडान । कियौ कुबेर जथाविध थान ॥  
आये सुर बरसावत फूल । जयजयकार करत सुखमूल । १३४।  
अति प्रसन्नता सब विध भई । हरसत तीन प्रदछिना दई ॥  
धूलसालिमें कियौ प्रवेश । चकितभयौ छबि देखि सुरेस । १३५।  
मुदित महधिक<sup>२</sup> देवन साथ । जिनसनमुख आयौ सुरनाथ ।  
हस्तकमल जोरे अमरेस<sup>३</sup> । देखे दृग भरि पासजिनेस । १३६।  
मनि उतंग आसन पर ईस । मानों मेघ<sup>४</sup> रतनगिरि-सीस ॥  
फैल रही तनकिरनकलाप<sup>५</sup> । कोटभानुसौ<sup>६</sup> अधिक प्रताप । १३७।  
विकसत चित रोमांचित काय । प्रनम्यौ चरन सीस भुविलाय ॥  
मनिभारी भरि तीरथतोय । पूजे मघवा<sup>७</sup> जिनपद दोय । १३८।  
सुरग-सुगन्धनि भक्ति बढ़ाय । अरचे<sup>८</sup> इन्द्र जिनेसुरपाय ॥  
मुक्ताफलमय<sup>९</sup> अच्छत<sup>१०</sup> लिये । पुंज<sup>११</sup> परमगुरु आगे दिये १३९।  
पारिजात मंदार मनोग । पुहप चढ़ाये जिनवर जोग ॥  
सुधार्पिड चरु लेय पवित्त । पूजा करी सक्र धरि चित्त । १४०।  
रतनप्रदीप रवाने खरे । श्रीपति पांय सचोपति धरे ॥  
देवलोककी अग्रर अनूप । पासचरन खेई सुरभूप ॥ १४१ ॥

१. जवतक २. महा ऋद्धिघारी ३. इन्द्र ४. बादल ५. समूह ६. करोड़ों सूर्यों  
से ७. इन्द्र ८. पूजे ९. मोती समान १०. चावल ११. समूह ।

कलपतरोवरके फल रजे । जगपतिपाय पुरन्दर जजे ॥  
 सरबदरब धरिकरि परनाम । दीन्यौ इन्द्रअरघ अशिराम । १४२।  
 दोहा ।

करि जिनपूजा आठ बिध, भावभगति बहुभाय ।  
 अब सुरेस परमेसथुति, करत सीस निज नाय ॥ १४३॥  
 चौपई ।

प्रभु इस जग समरथ नहिं कोय । जापै जसबरनन तुम होय ।  
 चारग्यानधारी<sup>१</sup> मुनि थके । हमसे मन्द कहा करसके । १४४।  
 यह उर जानत निहचै कीन । जिनमहिमावरनन हम हीन ॥  
 पै तुमभगति करे बाचाल<sup>२</sup> । तिसवस होय गहूं गुनमाल । १४५।  
 जय तीर्थङ्कर त्रिभुवनधनी । जगचन्द्रोपम चूड़ामनी ॥  
 जय जय परनधरमदातार । करमकुलाचल<sup>३</sup> चूरनहार । १४६।  
 जय सिवकामिनिकंत महंत । अतुल अनंत चतुष्टयवंत ॥  
 जय जग आसभरन बड़भाग । सिवलछमीके सुभग सुहाग १४७।  
 जय जय धर्मधुजाधर धीर । सुरगमुकतिदाता वर वीर ॥  
 जय रतमत्रय रतनकरंड<sup>४</sup> । जय जिन तारनतरन तरंड<sup>५</sup> । १४८।  
 जय जय समोसरन-सिगार । जय संसयवनदहन तुसार<sup>६</sup> ॥  
 जय जय निर्विकार निर्दोष । जय अनंतगुनमानिककोष । १४९।  
 जय जय ब्रह्मचरजदल साज । कामसुभटविजयी भटराज ।  
 जय जय मोह-महानग-करी<sup>७</sup> । जय जयमदकुंजर<sup>८</sup> केहरि<sup>९</sup> । १५०।

१. गणधर २. बोलने योग्य ३. पर्वत ४. पिटारे ५. नाव ६. बकं ७. हाथी  
 ८. हाथी ९. सिंह ।

क्रोधमहानलमेघ प्रचंड । मानमहीधरदामिनिदंड ॥  
 मायाबेलधनंजयदाह । लोभसलिलसोषक दिननाह<sup>१</sup> ॥१५१॥  
 तुम गुनसागर अगम अपार । ग्यानजिहाज न पहुँच पार ॥  
 तट ही तट पर डोलत सोय । स्वारथ सिद्ध तहांही होय ॥१५२॥  
 प्रभु तुम कोतिबेल बहु बढी । जतनबिना जगमंडप चढी ॥  
 और अदेव सुजस नित चहैं । ये अपने घरही जस लहैं ॥१५३॥  
 जगतजीव घूमैं बिनग्यान । कीर्न मोहमहाविषपान ॥  
 तुमसेवा विषनासन जरी । यह मुनिजन मिलि निहच करी ।  
 जन्मलता मिथ्यामतमूल । जामनमरन लगैं जिहि फूल ॥  
 सो कबही बिन भगतिकुठार । कटें नहीं दुखफलदातार ॥१५५॥  
 कलपतरोवर चित्राबेल<sup>३</sup> । काम-पोरसा<sup>४</sup> नौनिधि मेल ॥  
 चित्तामनि पारस पाषान । पुन्यपदारथ और महान ॥१५६॥  
 ये सब एकजनमसंजोग । किंचित सुखदातारनियोग ॥  
 त्रिभुवननाथ तुमारी सेव । जनमजनम सुखदायक देव ॥१५७॥  
 तुम जगबांधव तुम जगतात । असरनसरन-बिरद-बिख्यात ॥  
 तुम जगजीवनके रक्षपाल । तुम दाता तुम परमदयाल ॥१५८॥  
 तुम पुनीत तुम पुरुष-पुरान<sup>२</sup> । तुम समदरसी तुम सबजान ।  
 तुम जिन जग्यपुरुष परमेस । तुम ब्रह्मा तुम विष्णु महेस ॥१५९॥  
 तुमही जगभरता जगजान । स्वामि स्वयंभू तुम अमलान ।  
 तुम बिन तीनकाल तिहुंलोय । नहिं नहिं सरन जीवकों कोय ॥

१. अग्नि २. सूर्य ३. अद्भुत बेल ४. इच्छापूर्णा करने वाली ५. पौराणिक पुरुष



तिस कारन करुनानिधि नाथ । प्रभु सनमुख जोरे हम हाथ ।  
जबलौ निकट होय निरवान । जगनिवास छूटं दुखदान ॥१६१॥  
तब लौ तुम चरनांबुज-बास । हम उर होहु यही अरदास<sup>१</sup> ।  
और न कछु बांछ्या भगवान । यह दयाल दीजं वरदान ॥१६२॥  
दोहा ।

इहिविध इन्द्रादिक अमर, करि बहु भगति विधान ।  
निज कोठे बंठे सकल, प्रभु सम्मुख सुखमान ॥१६३॥  
जीति कर्मरिपु जे भये, केवललब्धि-निवास ।  
ते श्रीपारसप्रभु सदा, करो विघन-घन<sup>२</sup> नास ॥१६४॥  
इति श्रीपाश्र्वपुराणभाषायां भगवत्ज्ञानकल्याणकवर्णनं  
नाम अष्टमोधिकारः ।

## नौवाँ अधिकार

—०-०-०—

सोरठा ।

पारसप्रभुकौ नाउँ, सार सुधारस जगतमें ।  
मैं याकी बलि जाउँ, अजर-अमर-पदमूल यह ॥१॥  
दोहा ।

बारह सभा सुथानमधि, यों प्रभु आनन्दहेत ।  
जथा कमलिनो<sup>३</sup> खंडकौ, ससिमंडल सुख देत ॥२॥  
विकसितमुख सुरनर सकल, जिनसन्मुख करजोर ।  
निवसैं प्यासे अमृतधुनि, ज्यों चातक घनओर ॥३॥

चीपई ।

तब-गनराज स्वयंभू नाम । चार ग्यानधारी गुनधाम ॥  
 करि प्रनाम पारसप्रभुओर । विनती करी करांजुलि जोर ॥४॥  
 भो स्वामी त्रिभुवनघर येह । मिथ्यातिमिर छ्यौ अति जेह ।  
 भूले जीव भमैं तामाहिं । हितअनहित कछु सूझै नाहिं ॥५॥  
 श्रीजिनबानी दीपक-लोच । ता बिन तहां उदोत<sup>१</sup> न होय ।  
 तातं करुनानिधि स्वयमेव । करि उपदेश अनुग्रह<sup>२</sup> देव ॥६॥  
 जाननजोग कहा है ईस । गहनजोग सो कह जगदीस ॥  
 त्यागनजोग कहो भगवान । तुम सबदरसो पुरुष प्रमान ॥७॥  
 कंसे जीव नरकमें परं । क्यों पसुजौनि पाय दुख भरं ॥  
 काहेसौं उपजं सुरलोच । कौन कर्मतैं मानुष होय ॥८॥  
 कौन पापफल जनमैं अंध । बहरा कौन क्रियासम्बन्ध ॥  
 किस अघ उदय होय नर पंग । गूंगा किस पातक-परसंग ॥९॥  
 कौन पुण्यतैं दरव अतीव । क्यों यह होय दरिद्री जीव ॥  
 पुरुष-वेद<sup>३</sup> किस कर्म उदोत । नारि नपुंसक किस विध होत ।  
 किम आचरन बड़ी थिति धरं । क्यों करि अल्प आयु धरि मरं ।  
 भोगहीन अरु भोगसमेत । सुखी दुखी दीखैं किस हेत ॥११॥  
 किस कारन मूरख मतिहीन । क्यों उपजं पंडित परवीन ॥  
 किस करनीतैं होय सरोग । किस अधर्मतैं पुत्रवियोग ॥१२॥  
 विकल सरीर पाय दुख सहै । नीच ऊंचकुल कैसें लहै ॥  
 किनभावनि भवथिति विस्तरै । भवथितिभेद कहाकरि करं ॥

ष्योकर होय सुरगमै इन्द्र । कैसै पद पावे अर्हमिन्द्र ॥  
 चक्रीपद किस पुन्यउदोत । किमि बांधे तीर्थकरगोत ॥१५॥  
 इत्यादिक यह प्रस्न समाज । इनकौ उत्तर कह जिनराज ॥  
 तुम सब संसयहरन जिनेस । जैसे भवतमदलन दिनेस ॥१५॥

दोहा ।

तब श्रीमुखवानी विमल, बिन अच्छर गम्भीर ॥  
 महामेघकी गरज सम, खिरी हरन जगपीर ॥१६॥  
 तालु होठ सपरस बिना, मुखविकार बिन सोय ।  
 सब भाषामय मधुरतर, श्रीजिनकी धुनि होय ॥१७॥  
 जथा मेघजल परिनमै, निबादिक रसरूप २ ।  
 तथा सर्वभाषामई, श्रीजिनवचन अनूप ॥१८॥

चौपई ।

छहौं दरब पंचासतिकाय । सात तत्त<sup>३</sup> नौ पद समुदाय ॥  
 जाननजोग जगतमै येह । जिनसौं जाहि सकल संदेह ॥१९॥  
 सब विध उत्तम मोखनिवास । आवागमन मिटै जिहि वास ॥  
 तातै जे सिवकारन भाव । तेई गहनजोग मन लाव ॥२०॥  
 यह जगवास महादुखरूप । तातै भ्रमत दुखी चिद्रूप ॥  
 जिनभावन उपजै संसार । ते सब त्यागजोग निरधार ॥२१॥  
 नरकादिक जग-दुख जावंत । पापकर्मबसतै बहुभंत ॥  
 सुरगादिक सुखसंपाति जेह । पुन्य तरौवरकौ फल तेह ॥२२॥

दोहा ।

इहि बिध प्रस्नसमाजकौ, यह उत्तर सामान ।  
 अब विसेस इनकौ लिखौ, जथासकति कछु जान ॥२३॥  
 जीव अजीव विसेस बिन, मूल दरब ये दोय ।  
 इनहीकौ फंलाव सब, तीनकाल तिहुं लोय ॥२४॥  
 चेतन जीव अजीव जड़, यह सामान्यसरूप ।  
 अनेकांत जिनमतविषै, कह्यौ जथारथरूप ॥२५॥  
 दरब अनेक नयात्मक<sup>१</sup>, एक एक नय साधि ।  
 भयो विबिध मतभेद यौ, जगमें बढ़ी उपाधि ॥२६॥  
 जन्मअंध गजरूप<sup>२</sup> ज्यौं, नहि जानै सरवंग ।  
 त्यौं जगमें एकांत मत, गहै एक ही अंग ॥२७॥  
 ता विरोधके हरनकौं, स्यादवाद जिनबैन ।  
 सब संसयभेटन विमल, सत्यारथ सुखदेन ॥२८॥  
 सात भंगसौं साधिधे, दरबजात जामाहि ।  
 सधे वस्तु निरविघन तब, सब दूषन मिट जाहि ॥२९॥

घनाक्षरी ।

अपने—चतुष्टैकी<sup>३</sup> अपेच्छा दब 'अस्ति' रूप,  
 परकी अपेच्छा वही 'नासति' बखानिये ।  
 एकही समं सो 'अस्ति नासति' सुभाव धरे,  
 ज्यौं है त्यौं न कहा जाय 'अवक्तव्य' मानिये ॥  
 अस्ति कहै नासति अभाव 'अस्ति अवक्तव्य',

१. नयात्मक २. हाथी का स्वरूप ३. सब चतुष्टय ( द्रव्य, क्षेत्र, काल, भाव )

त्यो ही नास्ति कहैं 'नास्ति अबक्तव्य' जानिये ॥  
 एकै बार अस्ति नास्ति कह्यौ जाय कसैं तातैं,  
 'अस्तिनास्तिअबक्तव्य' ऐसं परवानियैं ॥ ३० ॥

दोहा ।

इहि बिध ये एकांतसौं, सात भंग भ्रमखेत ।  
 स्यादवाद पौरुष धरें, सब भ्रमनासन हेत ॥३१॥  
 स्यादसब्दकौ अर्थ जिन, कह्यौ कथंचित जान ।  
 नागरूप<sup>१</sup> नयविषहरन, यह जग मंत्र महान ॥३२॥  
 ज्यो रससिद्ध कुधातु<sup>२</sup> जग, कंचन होय अनूप ।  
 स्यादवाद-संजोगतैं, सब नय सत्यसरूप ॥३३॥

चौपई ।

दरवदिष्टि जिय नित्तसरूप । परजयन्याय अथिर चिद्रूप ॥  
 नित्यानित्य कथंचित होय । कह्यौ न जाय कथंचित सोय ॥  
 नित्य अवाचि<sup>३</sup> कथंचित वही । अथिर अवाचि कथंचित सही ॥  
 नित्यानित्यअवाचक जान । कहत कथंचित सब परवान ॥३५॥  
 इहिविध स्यादवाद नयछाहि । साध्यौ जीव जैनमतमाहि ॥  
 और भांति विकल्प जे करें । तिनके मत दूषन विसतरें ॥३६॥  
 जीव नाम उपयोगी जान । करता भुगता देहप्रमान<sup>४</sup> ॥  
 जगतरूप सिवरूप अरूप । ऊरधगमन सुभावसरूप ॥३७॥

सोरठा ।

ये सब नौ अधिकार, जीवसिद्धिकारन कहे ।

इनको कछु विस्तार, लिखौ जिनागम देखिकं ॥३८॥

चौपई ।

चार भेद व्योहारी प्रान । निहचै एक चेतना जान ॥

जो इनसौं नित जीवित रहै । सोई जीव जैनमत कहै ॥३९॥

सोरठा ।

प्रथम आव अवधार<sup>१</sup>, इन्द्री सांस उसांस बल ।

मूल प्रान ये चार, इनके उत्तरभेद दस ॥४०॥

दोहा ।

पांच प्रान इन्द्रीजनित, तीनभेद बलप्रान ।

एक सांस उस्वास गनि, आवसहित दस जान ॥४१॥

चौपई ।

सैनी जीव जगतमें जेह । दसौं प्रानसौं जीवें तेह ॥

मनसौं रहित असैनी जात । ते नौप्रान धरें दिनरात ॥४२॥

कान बिना चौइन्द्री जिते । आठ प्रानके धारक तिते ॥

तेइन्द्रीके आंख न भनी । तातें सात प्रानके धनी ॥४३॥

नासा<sup>२</sup> बिन वेइन्द्री<sup>३</sup> जीव । तिन सबके षट प्रान सदीव ॥

जीभ-वचनवर्जित तन तास । एकेंद्री चउ प्राननिवास ॥४४॥

दोहा ।

इहिविध जीव अजीव सब, तीनकाल जगथान ।

सत्तासुख अवबोध चित, मुक्तजीव के प्रान ॥४५॥

चौपई ।

दोप्रकार उपयोग बखान । दरसन चार आठ बिध ग्यान ॥  
 चच्छु अचच्छु अवधि अवधार । केवल ये सब दरसन चार ॥४६॥  
 अब सुन वसु'विधग्यान-विधान । मति-स्रुतअवधिग्यानअज्ञान  
 मनपरजंय केवल निरदोख । इनके भेद प्रतच्छ परोख ॥४७॥  
 मतिश्रुतिग्यान आदिके दोय । ये परोख जानें सब कोय ॥  
 अवधि और मनपरजयग्यान । एकदेस<sup>२</sup>परतच्छ प्रमान ॥४८॥  
 केवलग्यान सकल परतच्छ । लोकालोक-विलोकन दच्छ<sup>३</sup> ॥  
 जहां अनंत दरबपरजाय । एक बार सब भूलकें आय ॥४९॥  
 दरसन चार आठ बिध ग्यान । ये व्यवहार चिहन जी जान  
 निहचंरूप चिदात्म येह । सुद्ध ग्यान दरसन गुनगेह ॥५०॥  
 कल्पित असदभूत व्यवहार । तिस नय घटपटादि कर्तार ॥  
 अनुपचरित अजथारथरूप । कर्मपिडकरता चिद्रूप ॥५१॥  
 जब असुद्धनिहचंबल धरें । तब यह रागदोषकों हरें ॥  
 यही सुद्ध निहचं कर जीव । सुद्ध भावकरतार सदीव ॥५२॥

सोरठा ।

प्राणी सुख दुख आप, भुगतें पुद्गलकर्मफल ।  
 यह व्यवहारी छाप, निहचं निजसुखभोगता ॥५३॥

दोहा ।

देहमात्र व्यवहार कर, कह्यौ ब्रह्म भगवा

अष्टिस्तल छंद ।

लघुगुरु देहप्रमान, जीव यह जानिये ।  
 सो विथार<sup>१</sup>-संकोच<sup>२</sup>-सकतिसौं मानिये ॥  
 ज्यों भाजन<sup>३</sup>परवान, दीपदुति विस्तरै ।  
 समुदघात विन राम<sup>४</sup>, यही उपमा धरै ॥५५॥

चौपई ।

तैजस कारमानजुत भेस । बाहर निकसैं जीवप्रदेस ॥  
 छांडें नहीं मूल तन ठाम । समुदघातविधि याकौ नाम ॥५६॥  
 सातभेद सब ताके कहे । गोमटसार देखि सरबहे ॥  
 प्रथम वेदना नाम बखान । दुतिय कषाय नाम उर आन ॥५७॥  
 तन-विकुर्वना<sup>५</sup> तीजो येह । चौथो मारनांत<sup>६</sup> सुनि लेह ॥  
 पंचम तैजस संग्या जान । छट्टम आहारक अभिधान<sup>७</sup> ॥५८॥  
 केवल समुदघात सातमा । ऐसी सकति धरै आतमा ॥५९॥  
 दुसह वेदनाके बस जहां । जीवप्रदेस कढ़त हैं तहां ॥  
 किसी जीवके हो परवान । पहला समुदघात यह जान ॥६०॥  
 जब नाहू रिपु करन विधंस । बाहर जाहि जीवके अंस ॥  
 अतिकषायसौ हो है तेह । दूजो समुदघात है येह ॥६१॥  
 नाना जात विक्रियाहेत । निकसैं ब्रह्मप्रदेस सचेत ॥  
 देवनारकीके यह होय । तीजो समुदघात है सोय ॥६२॥  
 किसी जीवके मरते समे । तंस<sup>८</sup> अंस



बांधी गतिके परसन<sup>१</sup> काज । चौथो भेद कह्यौ जिनराज । ६३ ।  
 जो मुनिकं कछु कारन पाय । उपजै क्रोध न थांभ्यौ जाय ॥  
 तेजस तनकौ औसर यही । वाम<sup>२</sup> कंधसौं प्रगटे सही ॥ ६४ ॥  
 ज्वालामई काहलाकार<sup>३</sup> । अर सिंदूरपुंज उनहार ॥  
 बारह जोजन दीरघ सोय । नौ जोजन विस्तोरन होय ॥ ६५ ॥  
 दंडकपुर वत प्रलय करेय । साधुसमेत भस्म कर देय ॥  
 असुभकषाय यही विख्यात । अब सुनि सुभ तेजसकी बात ॥  
 दुभिच्छादिक दुख अबिलोय<sup>४</sup> । दयाभाव मुनिवरकं होय ॥  
 सुभआकृतिसौं निकसं ताम । दच्छिन कांधेसौं अभिराम । ६७ ।  
 पूरवकथित देह-विस्तार । रोगसोग सब दोष निवार ॥  
 फिर निज थान करे पंसार । पंचम समुदघात यह धार । ६८ ।  
 करत साधु पदअर्थ-विचार । मन संसय उपजै तिहिं बार ॥  
 तहां तपोधन<sup>५</sup> चिंता करे । कैसे यह विकल्प निरवरै ॥ ६९ ॥  
 भरतखेत आदिक भूमाहिं । अब ह्यां निकट केवली नाहिं ॥  
 तातं करिये कौन उपाय । बिनभगवान भरम नहिं जाय । ७० ।  
 तब मुनि-मस्तकसौ गुनगेह । प्रगट होय आहारक देह ॥  
 एक हाथ तिस परमित कही । श्रीजिनसासनसौं सरदही । ७१ ।  
 फटिक वरन मनहरन अनूप । तहां जाय जह केवलभूप ॥  
 दरसनकरि संदेह मिटाय । फेरि आनि निरवध सुपाय । ७२ ।

दंड-कपाटादिक-विधि ठान । क्रमसँ होंहि लोकपरवान ॥  
 सप्तम समुदघात यह भाय । सरधा करो भविक मनलाय।७४  
 मरनांतक आहारक जेह । एक दिसागत जानौ येह ॥  
 बाकी पांच रहे जे आन । ते सब दसँ दिसागत जान ॥७५॥  
 दुबिध रास संसारी जीव । थावर जंगमरूप सदीव ॥  
 तहां पांच बिध थावरकाय । भू जल तेज वनस्पति वाय।७६।  
 चार जातके जंगम जंत । चलत फिरत दीखें बहुभंत ॥  
 संख सीप कौड़ी कृमि<sup>१</sup> जोक । इत्यादिक बेइन्द्री-थोक।।७७।  
 चैंटी दीम कुंथ पुनिआदि । ये तेइन्द्री जीव अनादि ॥  
 माखी माछर भृंगीदेह<sup>२</sup> । भ्रमरप्रमुख चौइन्द्री येह ॥७८॥  
 देव नारकी नर बिख्यात । केतक पसू पचेंद्री जात ॥  
 ये सब त्रस थावरके भेव । इनकौ विषयछेत्र सुन लेव ॥७९॥

छप्पय ।

फरस चारसँ पांच, जीभ चौसठ सँ नासा<sup>३</sup> ।  
 दृग जोजन उनतीस, सतक चौवन क्रम भासा ॥  
 दुगुन असैनी अंत, श्ववन वसु सहस धनुष सुनि ।  
 सैनी सपरस विषें, कह्यौ नौ जोजन भीमुनि ॥  
 नौ रसन<sup>४</sup> द्राण<sup>५</sup> नौ चच्छुप्रति, सैंतालीस हजार गिन  
 दोसँ त्रेसठि बारह स्रवनविषें-छेत्रपरवान भन ॥८६॥

दोहा

अथिर अर्थपरयाय<sup>१</sup> जो, हानिवृद्धमय रूप ।  
 तिसमें सिद्ध बखानिये, उतपति नाससरूप ॥८७॥  
 ग्येय<sup>२</sup> त्रिविध परनति धरै, ग्यान तदाकृत भास ।  
 यों भी सिवपदमें सधै, थित उतपत्ति विनास ॥८८॥  
 अथवा सब परनति नसे, भई सिद्धपर्याय ।  
 सुद्धजीव निहचल सदा, यों तीनों ठहराय ॥८९॥

अडिल्ल ।

वरन पांच रस पांच, गंध दो लोजिए ।  
 आठ फरस गुन जोर<sup>३</sup>, बोस सब कीजिए ॥  
 जीवविषै इनमाहिं, एक नहिं पाइए ।  
 यातें मूरतिहीन, चिदातम गाइए ॥९०॥  
 जगमें जीव अनादि, बंध-संजोगतें ।  
 छूट्यौ कबही नाहिं, कसंफलभोगतें ॥  
 असदभूत व्यवहार, पच्छ जो ठानिए ।  
 तो यह मूरतिवंत<sup>४</sup>, कथंचित मानिए ॥९१॥

दोहा ।

प्रकृतिबंध थितिबंध पुनि, अरु अनुभाग प्रदेस ॥  
 चारभेद यह बंधके, कहे पास परमेस ॥९२॥  
 बन्धविवर्जित आतमा, ऊरधगमन करेय ।  
 एकसमयकरि सरलगति, लोकअंत निवसेय ॥९३॥

दुनुक<sup>१</sup> आदि परमानुबन्ध । सो सूच्छमसूच्छम सुन बन्ध । ११३।  
 खट प्रकार पुद्गल इहि भाय । मुख्य गौन सबमें गुन थाय ॥  
 इनहीसों निर्मापत<sup>२</sup> लोक । और न दीखै दूजौ थोक । ११४।  
 सब्द बन्ध छाया तम जान । सूच्छम थूल भेद संठान ॥  
 अरु उदोत आतप बहु भाय । यह दसबिध पुद्गलपरजाय ११५।  
 जब जड़जीव चलै सतभाय<sup>३</sup> । धर्मदरब तब करै सहाय ॥  
 जथा मीनकी जल आधार । अपनी इच्छा करत विहार । ११६।  
 यों ही सहज करै थित सोय । तब अधर्म सहकारी होय ॥  
 ज्यों मगमें पंथीकों छ्राहि । थितिकारन है बलसों नाहि । ११७।  
 जो सब द्रव्यनकों अवकास । देय सदा सो द्रव्य अकास ॥  
 ताके भेद दोय जिन कहे । लोक अलोक नाम सरदहे । ११८।  
 जहं जीवादि पदारथवास । असंख्यातपरदेस निवास ॥  
 लोकाकास कहावै सोय । परें अलोक अनंता होय ॥ ११९॥  
 लोकप्रदेस असंखे जहां । एक एक कालानू तहां ॥  
 रतनरासि-वत निवसै<sup>४</sup> सदा । द्रव्यसरूप सुथिर सर्वदा । १२०।  
 बरतावन लच्छन गुन जास । तीनकाल जाकी नाहि नास ॥  
 समय घड़ी आदिक बहुभाय । ये व्यवहारकालपरजाय । १२१।  
 पहले कहाँ जीवअधिकार । और अजीव पंचपरकार ॥

ये ही छहों

३. उपासकाध्ययन

१. श्रावकाचार

उपोसके वा श्रावक जनाके जो चार-वनक प्रातःपादन करतवा  
 सूत्र, शास्त्र या ग्रन्थका उपासकाध्ययन-सूत्र, उपोसकाचार  
 श्रावकाचार नामसे व्यवहार किया जाता है । द्वादशांग श्रत  
 बारह अंगोंमें श्रावकोंके आचार-विचारका स्वतन्त्रतासे वर्णन

तातें पचअधिकाय' हैं, काय काल बिन मान ॥१२३॥

सवैया छन्द ।

जीवरुधर्म अधर्म दरब ये, तीनों कहे लोक-परवान ।

असंख्यात परदेसी राजें, नभ अनंतपरदेसी जान ॥

सख असंख अनंतप्रदेसी, त्रिबिधरूप पुद्गल पहिचान ॥

एकप्रदेस धरै कालानू, तातें काल कायबिन मान ॥१२४॥

दोहा ।

काल काय बिन तुम कह्यौ, एकप्रदेसी जोय ।

पुद्गल परमानू तथा, सो सकाय' क्यों होय ॥१२५॥

सवैया

अलख असंख्य दरब कालानू, भिन्नभिन्न जगमाहि बसाहि ।

आपसमाहि मिलें नहि कबहीं, तातें कायवंत सो नाहि ॥

रूप सचिक्कनतें परमानू, ततखिन बंधरूप हो जाहि ।

यों पुद्गलकों कायकलपना, कही जिनेसुरके मतमाहि ॥१२६॥

जितने मान एक अविभागी, परमानू रोकें आकास ।

ताकौ नाब प्रदेस कहावै, देय सर्व दरवनकों बास ॥

तहां एक कालानू निवसै, धर्म अधर्म प्रदेस निवास ।

रहैं अनंत प्रदेस जीवके, पुद्गल बन्ध लहैं अवकास ॥१२७॥

पोमावती

धर्म अधर्म कालअरु चेतन, चारों दरब अरूपी गाये ।

तातें एक अकास-देसमें, प्रभु सबके परदेस गाये ॥

इत अनंत न बन्धे ॥

अथात् इस पाचवें आश्वास तक तो मैंने महाराज यशो

परका चरित कट

मूरतवंत अनंते पुद्गल, ते उस नभमें क्योकर माये ।  
यह संसय समभाय कहो गुरु, दास होय हम पूछन प्राये ॥१२८॥

सोरठा

बहु प्रदीप परकास, जथा एक मन्दिरविषे ।  
लहै सहज<sup>१</sup> अक्कास, बाधा कछु उपजे नहीं ॥१२९॥

दोहा ।

त्यो हीं नभ परदेसमें, पुद्गल बन्ध अनेक ॥  
निराबाध<sup>२</sup> निवसे<sup>३</sup> सही, ज्यो अनन्त त्यो एक ॥१३०॥  
जो कर्मनको आगमन, आस्रव कहिये सोय ।  
ताके भेद सिद्धान्तमें, भावित<sup>४</sup> दरवित<sup>५</sup> दोय ॥१३१॥

चोपई ।

मिथ्या अविरत जोग कषाय । और प्रमाददसा दुखदाय ॥  
ये सब चेतनके परिणाम । भावास्रव इनहीको नाम ॥१३२॥  
तिनही भावनके अनुसार । ढिगवरती पुद्गल तिहि बार ॥  
आवे कर्म भावके जोग । सो दरवित आस्रव अमनोग<sup>६</sup> ॥१३३॥

सोरठा ।

रागादिक परिनाम, जिनसो चेतन बंधत है ।  
तिन भावनको नाम, भावबन्ध जिनवर कह्यौ ॥१३४॥

दोहा ।

जो चेतन परदेसमें, बैठे कर्म पुरान ॥  
नये कर्म तिनसो बन्धे, दरबबन्ध सो जान ॥१३५॥

१. अनायास २. बाधा रहित ३. बसे ४. भाव ५. द्रव्य ६. असुन्दर ।

दोहा ।

जीव जथारथदिष्टिसौ<sup>१</sup>, सरधं तत्त्वसरूप ।  
 सो सम्यक्दरसन सही, महिमा जास अनूप ॥१४५॥  
 नयप्रमान निच्छेप करि, भेदाभेद विधान ।  
 जो तत्त्वनकौ जाननो, सोई सम्यकग्यान ॥१४६॥  
 सो सामान्य विलोकिये, दरसन कहिये जोय ।  
 जो विसेस कर जानिये, ग्यान कहावै सोय ॥१४७॥  
 चारित किरियारूप है, सो पुनि दुबिध पवित्त ।  
 एक सकल चारित्र है, दुतिय देसचारित्त ॥१४८॥

ग्रहिल

जहाँ सकल सावद्य<sup>२</sup>, सर्वथा परिहरै<sup>३</sup> ।  
 सो पूरन चारित्र, महा मुनिवर धरै ॥  
 लेश<sup>४</sup>-त्याग जहं होय, देशचारित वही ।  
 सो गृहस्थकौ धर्म, गृही<sup>५</sup> पालै सही ॥१४९॥

दोहा ।

तीर्थकर निरग्रन्थपद, धर साधो सिवपंथ ।  
 सोई प्रभु उपदेसियो, मोखपंथ निरग्रन्थ ॥१५०॥  
 दसविध बाहिज<sup>६</sup> ग्रन्थमै<sup>७</sup>, राखै तिल-तुस भान ।  
 तौ मुनिपद कहिये नहीं, मुनि बिन नहिं निर्वानि ॥१५१॥  
 जे जन परिग्रहवंतकौ, मानै मुक्तिनिवास ।

१. यथार्थं दृष्टि से २. सदोष ३. छोड़ें ४. एक देश त्याग ५. गृहस्थ ६. बाह्य

७. परिग्रह - जोन्नामी वाणास ही माना जाता है । जो ही, चाहे अतीचारो

ते कबही न मुक्त लहैं, भ्रमैं चतुरगतिवास ॥१५२॥  
 क्रोधादिक जबही करै, बंधं कर्म तब आन ।  
 परिग्रहके संयोगसौं, बंध निरंतर जान ॥१५३॥  
 बंध अभावे मुक्ति है, यह जानै सब लोय ।  
 बंध हेत बरतैं जहां, मुक्ति कहांतें होय ॥१५४॥  
 पच्छिम भान न ऊगवै, अग्नि न सीतल होय ।  
 जथाजात<sup>१</sup> जिर्नालिंगबिन, मोख न पावै कोय ॥१५५॥

छापय ।

धन्य धन्य ते साधु, देह-भव-भोग विरचचे<sup>२</sup> ।  
 धन्य धन्य ते साधु, आप अपने रस रचचे ॥  
 धन्य धन्य ते साधु, पीठ जगकी दिसि कीनी ।  
 धन्य धन्य ते साधु, दिष्टि सिवसम्मुख दोनी ॥  
 तजि सकल आस बनवास वस, नगन देह मद<sup>३</sup> परिहरे ॥  
 ऐसे महंत मुनिराज प्रति, हाथ जोर हम सिर धरे ॥१५६॥  
 चौपई ।

पंच महाव्रत दुद्धर धरें । सम्यक पांच समिति आदरें ॥  
 तीन गुपति पालें यह कर्म । तेरहविध चारित मुनिधर्म ॥  
 यातें सधैं मुक्तिपदखेत । गिरहो<sup>४</sup>-धर्म सुरगसुख देत ॥  
 सो एकादस प्रतिमारूप । ते बरनों सच्छेष सरूप ॥१५८॥  
 पंच उदंबर तीन मकार<sup>५</sup> । सात व्यसन इनको परिहार ॥

वर्णन १२ व्रतोंके सातिचार वर्णनके पश्चात् और सल्लेख  
 ना धारण करनेके पूर्व किया है । इस उपासकदशासत्रमें वर्णित  
 शों ही श्रावकोंने बारह व्रतोंको जीवनके अधिकांश भागमें  
 कर मगधियागये गर्व ही ११ एतियागोंका एतन कर मल्लेखना स्वीकार की  
 है । उन



